

Siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

Sermip erngullu niuernermi atorneqarneri pillugit Inatsisartut inatsisissaatut siunnersuut sermimik, imermillu niuernermik siunertanut misissueqqaarnissamut, atuinissamut, avammullu tunisinissamut malittarisassanik aalajangersaavoq. Pisuussutit taakkua piujuartussamik, akisussaassuseqartumillu atorneqarnissaat Inatsisartut inatsisaata qulakkiissallugu siunertaraa, matumani sermip, erngullu niuernermik tunngavilimmik atorneqarnissaannut malittarissat, piumasaqaatillu malittarisassiuunneqarnissaat ilanngullugu.

#### *1.1. Siunnersuutip tunuliaqtaa*

Sermip erngullu niuernermi atorneqarnerisa eqaannerusumik, ersarinnerusumik, siumullu nalunangereernerusumik malittarisassiuunneqarnissaannik, Sermip erngullu niuernermi atorneqarneri pillugit Inatsisartut inatsisissaatut siunnersuut siunertaqarpoq. Sermip erngullu atorneqarnerisa ineriartorneranut naleqqussaajumalluni inatsit ukiut ingerlanerini allanngortinneqarnikuuvoq, taamaakkaluatorli pisuussutit niuernermi atorneqarnissaannut malittarisassat ersarissassallugit, suliallu suliarineqartarneri pisariillisassallugit sulii pisariaqarluni.

Kalaallit Nunaanni sermip, erngullu niuernermi atorneqarnerinut malittarisassiuussineq, Sermip erngullu avammut nioqqutissatut atorneqarnissaat pillugu Inatsisartut inatsisaatigut nr. 7, 31. maj 2001-imeersutigut (sermip erngullu avammut nioqqutiginnissaannut inatsit), 2001-imi juulip aallaqqaataani atuutilersutigut atuutsilersinneqarpoq. Inatsisartut inatsisaatigut nr. 3, 15. maj 2014-imeersutigut aamma Inatsisartut inatsisaatigut nr. 35, 28. november 2016-imeersutigut inatsit allanngortinneqarpoq, kingusinnerusukku Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersutigut, massakku atuuttutigut atorunnaarsinneqarluni.

Suliat suliarineqartarnerinut atatillugu misilittakkat takutippaat, suliassaqaarfiup naleqqunnerusumik malittarisassiuunneqarnissaa, aqunneqarnissaalu tunngavissikkumallugu suliat suliarineqartarnerat eqqarsaatigineqaaqqittariaqartoq. Taamaattumik massakku inatsimmut atuuttumut allannguutissatut siunnersuusiorani, Sermip erngullu niuernermi atorneqarneri pillugit Inatsisartut inatsisissaatut nutaaq Naalakkersuisunut siunnersuutigineqarpoq.

Suliassaqaarfiup ersarissumik, siumullu nalorninanngitsumik malittarisassiuunneqarnissaa, sulinermilu atorneqarnera tunngavissikkumallugu inatsisartut inatsisaata peqqissaarunneqarnissaa, ersarissarneqarnissaalu siunnersuuteqarnermi siunertaavoq. Matumani aamma sermimik, imermillu misissueqqaarnissamut, atuinissamut, avammullu

tunisinissamut akuersissutit pillugit aalajangiinissanut ersarissunik sinaakkutinik, piumasaqaatinillu aalajangersaanikkut. Ilutigisaanik Kalaallit Nunaanni sermeq, imerlu aamma issittumi pinngortitaq mianernartoq illersorumallugit piujuartitsinissaq, avatangiisillu siornatigut malittarisassiuussinermi ilaatinneqarsimanngitsut ilanngunneqarput.

Pisuussutininik piujuartitsisussamik atuinissamut tunngavissiiinnaasumik, ilutigisaanillu inuiaqatigiinni, avatangiisitigut, inuussutissarsiutitigullu eqqarsaatigisassanik eqqarsaatiginnittunik suliaasaqarfiup ersarissumik, assigiaartumillu malittarisassiuuneqarnissaanik qulakkeerinissamik pisariaqartitsineq, siunnersuutip tunuliaqutigaa. Kalaallit Nunaata sermiata, erngatalu niuernermik tunngavilimmik atorineqarnissaannut inuussutissarsiutillit soqutiginninnerat annertusisimavoq. Sulialli suliarineqartarnerisigut ersarissivoq, suliaasaqarfimmik ersarissumik, eqaatsumik, siumullu nalunangereersumik ingerlatsinissamik qulakkeerisumik nutaamik inatsisiliornissaq pisariaqartoq.

### *1.2. Inatsisissamik piareersaanermi pingaarnert*

Inuussutissarsiornermut, Aatsitassanullu Naalakkersuisoqarfiup malittarisassanik atuuttunik allaffissornerminut atatillugu misilittagai, unammillernartitaalu tunuliaqutaralugit siunnersuut suliarineqarpoq. Tassunga atatillugu massakkut malittarisassat eqaatsumik, siumullu nalorninangitsunik ingerlatsinissamut tunngavissiiinersoq nalilerumallugu, suliat suliarineqartariaasiat misissorneqarpoq.

Taassumap saniatigut qinnuteqartartut, piginnittussaataasullu massakkut inatsimmut atuuttumut misilittakkaminnut atatillugu isummersuutaat namminneq kajumissutsiminnik ataavartumik nassiuttarsimasaat, inatsisissamik piareersaanermi ilaatinneqarput. Uani pingaartumik qaqugukkut akuersissummik tunniussisoqarsinnaaneranut piumasaqaatit ersarissuunissaannik, suliat sivikinnerusumik suliarineqartarnissaanik kiisalu piumasaqaatinik aalajangersaanermut atatillugu eqaannerusumik ingerlatsisoqarnissaa kissaatigineqartarpoq. Tamanna tunuliaqutaralugu suliaasaqarfiup ataqatigiinnerunissaata, aqunneqarsinnaanerumillu malittarisassiuuneqarnissaata, ilutigisaanillu ingerlatsivimmi nukinnik atuiffiunnginnerunissaata, qinnuteqartumullu paasiuminartuunissaata qulakkeerneqarnissaa siunertaralugu siunnersuutip suliat suliarineqartarnerat allanngortippaa.

### *1.3. Ataatsimut isigalugu siunnersuutip imarisaa*

Sermip erngullu niuernermi atorineqarnerisa massakkut malittarisassiuuneqarnerinik siunnersuut naleqqussaaneruvoq. Piumasaqaatit atuuttut arlaqartut siunnersuummi ingerlateqqinneqarput, ilaneqarlutillu. Akuersissutitut aqqissuussaaneq allanngortinneqarpoq, akuersissutillu pillugit aalajangiinissanut piumasaqaatit aalajangersimasut atuutsilersinneqarlutik. Taassuma saniatigut akuersissutininik qinnuteqarnermut malittarisassat ersarissut siunnersuummi ilanngunneqarput, qinnuteqartariaatsimullu massakkut malittarisassaanut nutarterneqarlutik.

Taassumap saniatigut suliat suliarineqartarnerini pinngortitamut kingunissaanik naliliinerit aamma avatangisut kiisalu inuiaqatigiinni eqqarsaatigisassat ilaatinneqartarnissaat pillugu piumasaqaateqarnissaq siunnersuutitigut saqqummiunneqarpoq. Taamaalilluni suliaassat ilaannut siunnersuut ersarissaanerullunilu naleqqussaaneruvoq, ilutigisaanillu suliaassat sinnerisa malittarisassiuunneqarnerinik tunngaviumik allannguinerulluni.

## **2. Siunnersuummi immikkoortut pingaarnert**

Inatsisip ersarissarneqarnissaanik, akuersissutinillu suliaqarnermi siumut nalorninanngitsumik pilersitsinissamik siunnersuut siunertaqarpoq. Akuersissutit ilusissaat aamma annertussusissaat, siunnersuut malillugu aalajangiinissanut piumasaqaatissat aalajangersimasut kiisalu akuersissutit suliarineqartarnerinut, qinnuteqaatigineqartarnerinullu suleriaatsit siunnersuutitigut malittarisassiuunneqarput.

### *2.1. Atuuffia, akuersissutinillu aaqqissuussaannerat*

Inatsit massakkut atuuttoq malillugu akuersissutit assigiinngitsut pingasut tunniunneqarsinnaapput: § 3 malillugu misissueqqaarnissanut, § 4 malillugu sermimik, imermillu atuinissamut akuersissut aamma § 8 malillugu imermik sinneruttumik atuinissamut akuersissut. Inatsit massakkut atuuttoq malillugu atuinissamut akuersissutit kisermaassisussaataaaffilerlugit imaluunniit kisermaassisussaataaaffilernagit tunniunneqarsinnaapput, misissueqqaarnissamulli akuersissut kisermaassisussaataaaffilernagu tunniunneqartarluni. Akuersissutit avammut tunisinissamut akuersissutitaqartarput. Taamaakkaluartoq akitsuuserinermi oqartussanut takutinneqarsinnaasumik avammut tunisinissamut immikkut akuersissuteqartoqassanngilaq, avammullu tunisineq inatsimmi uani annerusumik malittarisassiuunneqarani.

Sermimut, imermullu atuinissamut akuersissutinut aamma imermut sinneruttumut akuersissutinut piumasaqaatit, malittarisassallu inatsimmi uani aamma atuupput. Suliat suliarineqartarnerini misilittakkat takutippaat, akuersissutit taakkua marluk malittarisassiuunneqarnerat immikkoortissallugit pisariaqartoq.

Taassumap saniatigut qaqugukkut kisermaassisussaataaaffilerlugu akuersissuteqartoqarsinnaanera missilioruminaatsillugu malittarisassat siammasissunik oqaasertaliussanik aallaaveqarput, tamannalu naleqqutinngitsunik oqartussanut, qinnuteqartunullu nalornilersitsisarlini.

Isumaliutiginninnerit taakkua tunuliaqutaralugit siunnersuutigineqarpoq, atuuffia aamma akuersissutit sannaat allanngortinneqassasut. Qulequttat ataasiakkaat tulluittumi ersarinnerusumik nassuiarneqassapput. Ataatsimut isigalugu siunnersuutip kingunerisaanik, imermik pilersuivinnit imermik sinneruttumik atuinissamut akuersissutit malittarisassani ilaatikkunnaarneqassapput, taamaalillunilu siunnersuut malillugu tassunga atuinissamut

akuersissutitunik tunniussisoqarsinnaassanani. Taassumap saniatigut siunissami misissueqqarnissamut akuersissut aamma atuinissamut akuersissut akuersissutissami ataatsimi ilaatinneqarlutik ataatsimoortinneqartalerisigut, akuersissutit aqqissuussaananer at allanngortinneqassaaq. Taamaakkaluartoq misissueqqaarnissamut akuersissummik immikkut qinnuteqarnissaq sul i periarfissaassaaq.

Kisernaassisussaataaffilerlugu atuinissamut akuersissummik tunniussinissamut periarfissaq siunnersuummi attatiinnarneqassaaq. Siumut nalorninanngitsiumalluni kisernaassisussaataaffilerlugu akuersissummik qaqugukkut tunniussisoqarsinnaassanersoq siunnersuut aalajangersimasunik piumasaqaateqarpoq.

Sermimik, imermillu misissueqqaarnissamut imaluunniit atuinissamut akuersissut immini avammut tunisinissamut akuersissutitaqarunnaarsillugu, avammut tunisinissamut akuersissut akuersissutinit immikkoortinneqassaaq. Taarsiullugu taanna qinnuteqartup qinnutigisassavaa, tamannalu misissueqqaarnissamut akuersissummik imaluunniit atuinissamut akuersissummik qinnuteqarnermut ilanngullugu, kingusinnerusukkulluunniit qinnutigineqarsinnaalluni. Nunani allani oqartussanut uppernarsaatitut ator neqarsinnaasumik avammut tunisinissamut immikkut akuersissummik Naalakkersuisut tunniussisinnaalissapput, tassungalu immikkut piumasaqaateqassalluni.

#### *2.2.1. Imeq sinneruttoq*

Inatsit atuuttoq malillugu, imermik sinneruttumik atuinissamut Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersup § 8-aa malillugu Naalakkersuisut atuinissamut akuersissummik tunniussisinnaapput. Taamaakkaluartoq akuersissummut tunngavissiissalluni piginnittussaataitaasup aamma pisortat pilersuiner mi ingerlatsiviata akornanni imermik pisinissamut piginnittussaataitaasup, pisortallu pilersuivia isumaqatigiissusiortoqarnissaat piumasaqaataassaaq. Tamanna suliat suliarineqartarnerini pisortat pilersuiner mi ingerlatsivii annertuumik peqataatinneqartarnissaannik kinguneqassaaq.

Imeq sinneruttoq pillugu akisussaaffiit agguataarneqarnissaat pillugu massakkut aaqqiineq ersarluppoq, soorluttaaq Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersumi § 4 malillugu atuinissamut akuersissut pinnagu § 8 malillugu akuersissuteqarfigisariaqarluni qaqugukkut imeq sinneruttoq pineqarner soq nassuiaat, killiliinerlu ersarluttut.

Imip sinneruttup, imermillu pilersuivinnit imeq sinneruttoq siunnersuummi immikkoortinneqarput. Imermut sinneruttumut atuinissamut akuersissummi imeq imermik pilersuviit atorsinnaasaat, kisianni imermik pilersuiner mut atunngisaat pineqartoq ersarisassallugu siunertaavoq.

Imermik sinneruttumik atuinissamik pilersaarutit sermimik, imermillu atuinissamik pilersaarutinit allaanerujussuupput. Imeq sinneruttoq imermik pilersuiviit pingaarnertut ingerlatsinerinit saniatigut pilersarpoq. Taamaattumik pilersaarutit taakkua pilersaarutinit allanut sanilliullugit annertunerusumik sanaartornissamik, misissueqqaarnissamillu qaqutigoortumik pisariaqartitsisarput. Imermik tunisassiornissamut imermik pilersuiviit sanaartukkanik, attaveqaasersuutinillu pisariaqartunik annertuutigut pigisaqareermata, pilersaarutit taakkua erngup aqqutaanut, assigisaanulluunniit atassusiinikkut piviusunngortinneqarsinnaasarput. Tamannarpiaq aamma patsisaalluni pilersaarutinit taakkununnunga misissueqqaarnissamik qaqutigoortumik qinnuteqartoqartarpoq, tamanna pisariaqanngimmat. Imermik pilersuivinnit imermik sinneruttumik suliaqarneq pilersuivinnut tunniunneqartariaqarneranik tamanna tunngavissiivoq, taakkuummata imermut isumalluutitut atuinissamik akuersissutinik kiisalu pilersuinermit attaveqaasersuutitut aqutsisooreersut, pisisartunullu imermik pisinissamik isumaqatigiissusiorsinnaareersut. Tamanna tunuliaqutaralugu nalilerneqarpoq, imermik pilersuivinnit imermik sinneruttumik atuinerup malittarisassiuunneqarnera immikkoortinneqaruni, pilersaarutinullu taakkununnunga naleqquttumik immikkut inatsimmi malittarisassiuunneqaruni naleqqunnerussasoq

Siulianiittut tunuliaqutaralugit siunnersuutigineqarpoq, imermik pilersuivinnit imermik sinneruttumik atuineq siunnersuummut ilanngunneqassanngitsoq. Taassumap kingunerisaanik siunnersuut malillugu imermik pilersuivinnit imermik sinneruttumik atuinissamut akuersissummik tunniussisoqarsinnaassanngilaq. Taarsiullugu isumalluutit taakkua imermik pilersuivinnut tunniunneqartariaqarpoq, taakkua inatsisip atuuttup sinaakkutaasa iluini, matumani aamma avatangiisinut aamma pilersuinermit malittarisassat naapertorlugit, imermik sinneruttumik aqutsisinnaammata, niuerutigisinnaallugulu.

Imermik sinneruttumik atuinermit nangitsilluni malittarisassiuussineq Inuussutissarsiornermut, Aatsitassanullu Naalakkersuisoqarfiup aamma imermik pilersuiviit kiisalu soqutigisallit allat akornanni oqaloqatigiinnikkut pissaaq. Siunnersuutip atortuulersinneqarnissaa sioqqullugu qinnuteqartoqassappat, taakkua allatigut malittarisassiuussinerup aalajangerneqarnissaata tungaanut Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 malillugu suliarineqassapput. Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 malillugu imermik sinneruttumik atuinissamut akuersissutit tunniunneqarsimasut, siunnersuut malillugu akuersissummik piumasaqaatigineqartut malillugit atatiinnarneqassapput.

Piffissami siunnersuutip suliarineqarfiani Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 naapertorlugu imermik sinneruttumik atuinissamut akuersissut ataaseq tunniunneqarsimavoq. Allanik qinnuteqaateqanngilaq. Taamaalilluni siunnersuut suliatigut killilimmik kinguneqassanganneqarpoq.

Siunnersuutip kingunerisaanik, imermik pilersuinermit ingerlatsiviit pilersuinissami pisussaaffimminnut pisuussut atareersoq akisussaaffigilissavaat. Ilutigisaanik allaffissornikkut piumasagaatit annikillissapput.

### *2.2.2. Akuersissut ataatsimoortoq*

Inatsit atuuttoq malillugu, Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 3 malillugu misissueqqaarnissamut akuersissutinik, § 4 malillugu atuinissamut akuersissummik imaluunniit § 8 malillugu imermik sinneruttumik atuinissamut akuersissummik Naalakkersuisut tunniussisinnaapput. Taamaakkaluartoq misissueqqaarnissamut akuersissut qinnuteqartumut annertuumik iluaqutaasinnaagaluartoq, taanna qaqtikkut qinnutigineqartarpoq.

Massakkut taamatut aaqqissuussaanermi piffissaliussap iluani ingerlatassat aallartinneqanngitsoortarnerisigut, akuersissutinik utertitsinermik kinguneqartartumik akuersissutinik atorneqanngitsumik tunniussisoqartarnera annertuumik unammillernarpoq. Tamanna suliat suliarineqartarnerini eqartumik suleriaaseqartitsivoq. Ilutigisaanik ingerlatsisoqanngikkaluartoq, sumiiffiit atorneqarsinnaatinngilai.

Pisuussutit sermeq aamma imeq, assersuutigalugu atortussiassanit immikkut akuersissuteqarfigissallugit naleqqunnerusunit allaanerupput. Atortussiassanut sanilliullugu sermeq imaluunniit imeq sumiiffiimmi pineqartumi tikinneqarsinnaassusaa nalornissutigineqanngisaannangajappoq, taamaattumillu misissueqqaarnissamut immikkut akuersissuteqarnissaq pisariaqarpallaartarani. Erngup pitsaassusaaq misiliinissaq eqqarsaatigalugu misissueqqaarnissaq pisariaqarnerusinnaavoq.

Suliat marloriaammik suliarineqarnissaat pinngitsoortikkumallugu, suleriaaserlu oqilisarumallugu siunnersuutigineqarpoq, misissueqqaarnissamut akuersissut aamma atuinissamut akuersissut akuersissummi ataatsimi ataatsimoortinneqassasut. Taassumap kingunerisaanik atuinissamut akuersissutiminut ilaatillugu, qinnuteqartut pisariaqartumik misissueqqaarnissaminut immiini akuersissuteqassapput.

Atuinissami ingerlatat piffissaliussatut aalajangersakkap iluani aallartinneqassasut suli piumasagaataassaaq, tassani atuinertaqanngitsumik naleqqutinngitsumik nunaminertamik inniminniisoqannginnissaa qulakkeerneqassammat.

Siunnersuut malillugu qinnuteqartoq misissueqqaarnissamut immikkut akuersissummik suli tunineqarsinnaassaaq. Assersuutigalugu erngup pitsaassusaaq nalornissutigineqartillugu imaluunniit pisuussut naleqqunnersoq annertunerusumik paasineqarnissaaninaleqqussinnaalluni.

### *2.2.3. Kisermaassisussaataitaneq*

Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi §§ 4 imaluunniit 8 malillugu inatsimmi atuuttumi, atuinissamut akuersissut kisermaassisussaatitaaffilerlugu imaluunniit kisermaassisussaatitaaffilernagu tunniunneqarsinnaavoq. Kisermaassisussaatitaaneq sumiiffimmut aalajangersimasumut, sermeqarfimmut imaluunniit imeqarfimmut imaluunnit alajangersimasumik annertussutsimik atuinissamut tunniunneqarsinnaavoq. Taamaakkaluartoq kisermaassisussaatitaaneq qaqugukkut tunniunneqarsinnaassanersoq killeqarpoq, matumani atuinissamut periarfissap atornissaanik naatsorsuuteqarnermut piumasaqaat, piginnittussaatitaasup akuersissummik pigisaqartup pisariaqartitaanik annertunerungaatsiartumik kisermaassilluni atuinissamut akuersissummi ilaatinneqarsinnaannginnera ilanngullugit.

Inatsimmi atuuttumi malittarisassat oqartussanut, qinnuteqartunullu paasiuminaatsitsillutik ingerlakkuminaatsut paasineqarpoq. Taamaattumik qaqugukkut, qanorlu annertutigisumik kisermaassisussaatitaaffilerlugu tunniussisoqarsinnanera pillugu pisariillisaasoqartariaqarlunilu ersarissaasoqartariaqarpoq.

Siunnersuutigineqarpoq, kisermaassisussaatitaaneq pillugu malittarisassat ersarissarneqassasut, inatsimmilu immikkut kapitalimi ataatsimoortinneqarlutik. Siunnersuutip kingunerisaanik, atuinissamut akuersissut kisermaassisussaatitaaffilerlugu imaluunniit kisermaassisussaatitaaffilernagu sulit tunniunneqarsinnaassaaq. Taassuma saniatigut qaqugukkut kisermaassisussaatitaaffilerlugu akuersissummik tunniussisoqarsinnaaneranut piumasaqaatit siunnersuummi aalajangersarneqarput. Siunnersuut malillugu piujuartitsisumik atuinissaq, tekniikkimut tunngasut, inuiaqatigiillu soqutigisaat eqqarsaatigalugit pisariaqartillugu imaluunniit suliniut naleqquttumik ingerlanneqarsinnaassanngikkaluartoq ingerlanneqarsinnaasunngortinniarlugu kisermaassisussaatitaaneq kisimi tunniunneqarsinnaassaaq.

Kisermaassisussaatitaaneq sumiiffimmut akuersissuteqarfimmut attuumassuteqassaaq. Taamaalilluni nunami piumasaqaatit tunuliaqutaralugit killilersuisoqassaaq. Akuersissuteqarfimmut tamarmut, ilaannaanulluunniit kisermaassisussaatitaaffilerlugu akuersissuteqartoqarsinnaavoq. Taamaalilluni sumiiffimmut aalajangersimasumut, sermeqarfimmut imaluunniit imeqarfimmut imaluunnit alajangersimasumik annertussutsimik atuinissamut siunnersuummi immikkoortinneqanngilaq, tamanna sulinermi ajornakusoortoq paasineqarmat.

Kisermaassinissammut immikkut piumasaqaatinik Naalakkersuisut sulit aalajangersaasinnaassapput.

Misissueqqaarnissamut akuersissut kisermaassisussaatitaaffilernagu tunniunneqartuaannartoq atatiinnarneqarpoq, atuinissamullu akuersissummik tunniussisoqassappat taanna tunniunneqartinnagu ingerlatsisut arlaqartut pisuusummik misissuisinnaanissaat taassumap qulakkiissammagu.

#### 2.2.4. *Avammut tunisineq*

Inatsimmi atuuttumi sermimik, imermillu Kalaallit Nunaannit avammut tunisineq, aatsaat Naalakkersuisut akuersissuteqarnerisigut pisinnaaneraniq piunasaqaateqarnikkut taamaallaat malittarisassiuunneqarpoq. Taassumap saniatigut ingerlatat aamma avammut tunisineq pillugit Naalakkersuisut piunasaqaatinik aalajangersaasinnaatinneqarput, piginnittussaataasut pilersuisunit paasissutissanik piniarsinnaatitaallutik. Taamaakkaluartoq avammut tunisinissamut akuersissutit ersarinnerusumik malittarisassiuunneqanngillat, matumani uppersaasiineq, pitsaassutimik nakkutilliineq imaluunniit allatigut nakkutilliinissat nunat tamalaat akornanni niueqateqarnermi pingaaruteqarsinnaasut ilanngullugit. Avammut tunisinissamut akuersissut, atuinissamut akuersissummut piunasaqaatitut, akuusutullu ilaavoq. Piginnittussaataasut nunani allani pisisuni oqartussanut takutissinnaasaminnik immikkut avammut tunisinissamut akuersissummik ujartuisarmata, tamanna sulineri unammillernartitsisimavoq. Ilutigisaanik avammut tunisineq Kalaallit Nunaata aningaasaqarnikkut, inuiaqatigiinnilu soqutigisat, pilersuinerup isumannaassusaa imaluunniit piujuartitsinissaq akigalugit ingerlanneqannginnissaa qulakkiissallugu aamma pisariaqarpoq.

Unammillernartut taakkua iliuuseqarfigiumallugit, avammut tunisisinnaanermut akuersissummik tunisissagaanni piunasaqaatinik ersarissaasumik avammut tunisineq ersarinnerusumik malittarisassiorfigineqassasoq siunnersuummi siunnersuutigineqarpoq. Siunnersuutip kingunerisaanik, avammut tunisineq Kalaallit Nunaata soqutigisaanut, matumani pilersuinerup isumannaassusaa ilanngullugu, naleqquttoq nalilerneqarpat aatsaat, avammut tunisisinnaanermut akuersissummik tunniussisoqarsinnaassaaq. Ilutigisaanik Naalakkersuisut immikkut piunasaqaatinik killilersuutinillu aalajangersaanissaminnut periarfissaqassapput, matumani immikkut pisoqartillugu avammut tunisinissamut inerteqquteqarneq ilanngullugu, matumani aamma nunat imaluunniit inuit pillaatitut iliuuseqarfigineqarsimasunut atatillugu.

Inatsit atuuttoq naapertorlugu avammut tunisinissamut piunasaqaatip, atuinissamut akuersissutip piffissaq atuuffigisaa malippaa. Imaappoq, ukiut 20-t tikillugit. Siunnersuutigineqarpoq, avammut tunisinissamut akuersissut ukiut tamaasa nutarterneqartassasoq. Ukiumut nutarterneqartarnissaani avammut tunisinissamut akuersissutit qaqugukkulluunniit pissutsinut atuuttunut naapertuunnissaat, ilutigisaanillu avammut tunisinissamut akuersissutip nunami tunisiffimmi uppersaataitut atuuttut akuerineqarsinnaanissaa qulakkiissallugu pingaarnertut siunertaavoq. Ilutigisaanik paasissutissat nutaangilisimasut tunngavigalugit avammut tunisisoqannginnissaa qulakkeerneqassaaq.

#### 2.3. *Suliamik suliaqarneq – Qinnuteqaammik ataatsimut suliaqariaaseq*

Inatsit atuuttoq avitamik suleriaaseqartitsivoq, tassani pisinnaatitsisummik pigisaqartoq siullermik atuinissamut akuersissummik pissarsiteriarlugu, tullertut immikkut

akuersissummik pissarsinissaanut atuinissamut, uninnissamullu pilersaarutininik nassitsitillugu. Pilersaarutit taakkua Naalakkersuisunit akuerineqarpata aatsaat, atuinissamut ingerlatat aallartinneqarsinnaapput.

Massakkut suleriaaseq sulianik annertuumik suliarinnittarnermik kinguneqarpoq, inatsisitigullu piumasaqaatit, piffissaliussallu tunuliaqutaralugit suliniutit piviusunngortinneqarnissaat suliatigut kinguarsaallunilu piviusunngortitsinngitsoorsinnaalluni.

Suliat suliarineqartarnerat pisariillisarumallugu atuinissamut, uninnissamullu pilersaarutininut piumasaqaatit atuinissamut akuersissummik qinnuteqaammut ilaatinneqalerlugit, ataatsimut qinnuteqartariaaseq siunnersuutigineqarpoq. Taassumap kingunerisaanik suliap ingerlanneqarnissaa, aningaasalersorneqarnissaa, avatangiisinut tunngasut kiisalu torersaanissami aamma uninnissami iliuusissat pisinnaatitsissummik pigisaqartup qinnuteqarnermini nassuiaatigissavai. Taassumap saniatigut qinnuteqaatip imassaanut, matumani qinnuteqarnissami nalinginnaasumik malitassanut Naalakkersuisut ersarinnerusunik piumasaqaasiornissaminnut piginnaatinneqarput.

Qinnuteqarnissamut tunngavissamut, suliallu suliarinissaannut piumasaqaatit siunnersuutitigut qaffanneqarput. Paasissutissanut piumasaqaataasut annerusumik taakkuuginnartussaagaluartut, atuinissamut aamma uninnissamut pilersaarutit kingusinnerusukkut akuerineqartussaangimmata, nassiussinissamut piffissarititaq siuartinneqarpoq. Taamaattorli malitsigisaanik akuersinermut atatillugu suliap marloriarluni suliarineqarani, qinnuteqartoq qinnuteqaammik ataasiinnarmik nassitsissaaq.

Akuersissut tunniunneqarniariartoq pisinnaatitsissummik pigisaqartup ingerlatassaminik aallartitsisinnaatillugu, eqaannerusumik suleriaaseqarnissaaq siunertaavoq. Tamanna akuersissutininik suliaqartarnermi piffissamik sivisunerusumik atuisarnissamik kinguneqarsinnaavoq, kisianni atuinissamut aamma uninnissamut pilersaarutininik akuersissutininik kingusinnerusukkut suliaqartussaanginneq tassunga nalogiissitsivoq. Ataatsimut isigalugu suliniutit iluatsittarnerininik siunnersuut annertusaassaaq, allaffikkornikkullu akimmiffinnik annikillitsilluni.

#### *2.4. Akuersissutininik tunniussisarnermut piumasaqaatit*

Inatsit malillugu akuersissummik tunniussisoqassanersoq pillugu naliliinissami inatsit atuuttoq malillugu Naalakkersuisut pingaarutilimmik naliliisussanngortinneqarput. Pisinnaatitsissummik pigisaqartumut ataasiakkaanik piumasaqaateqarpoq, matumani ingerlatseqatigiiffiup ilusaanut, angerlarsimaffeqarneralu ilanngullugit. Taassumap saniatigut ingerlatat ingerlannissaannut pisinnaatitsissummik pigisaqartup pisariaqartumik paasisimasaqassasoq, akissaqartissagaalu piumasaqaataavoq. Taassumap saniatigut naliliinissaaq eqqarsaatigalugu annerusumik malittarisassaqaranilu ilitersuutitaqanngilaq.

Ersarissuutitsinerunissaq qulakkeerumallugu, akuersissutinillu tunniussarnermi assigiinngitsuliornissaq pinngitsoortikkumallugu pisinnaatitsissummik pigisaqartumut, suliniummullu piumasaqaatinik ersarissaasinnaasunik piumasaqaatinik atuutsilersitsisoqartariaqarpoq. Aalajangeeriaatsimik assigiissaarnerusumik, siumullu nalunangereernerumik pilersitsiumalluni pisinnaatitsissummik pigisaqartumut aamma suliniummut aningaasatigut, inatsisitigut, teknikkikkullu piumasaqaatit ersarissarneqarnissaat aalajangiisuvoq. Tamanna suliniutit aningaasatigut, teknikkikkullu ingerlanneqarsinnaasut kisimik akuerineqartarnissaasa qulakkeerneqarnissaanut aamma tapertaassaaq.

Pisinnaatitsissummik pigisaqartup piginnaasai, suliniutillu ataannarsinnaassusaa piumasaqaatit ersarissut malillugit nalilerneqarlutik siumut nalunangereernerusumik, ersarinnerusumillu suleriaaseqarnissaq siunnersuutip qulakkiissavaa.

#### *2.4.1. Pisinnaatitsissummik pigisaqartumut piumasaqaatit*

Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-meersumi § 9 naapertorlugu atuinissamut akuersissut aktianik piginneqatigiiffimmut imaluunniit piginneqataassuteqarluni ingerlatseqatigiiffimmut, Kalaallit Nunaanni angerlarsimaffeqartumut taamaallaat tunniunneqarsinnaavoq. Inatsisartut inatsisaat malillugu akuersissummi ingerlatassat ilaatinneqartut taamaallat ingerlanneqassasut imaluunniit akuersissut malillugu ingerlatassat, ingerlatassallu allat ingerlatseqatigiiffiup ingerlassinnaagai aamma piumasaqaataavoq. Pisariaqartumik ingerlatassat ingerlannissaannut pisinnaatitsissummik pigisaqartup pisariaqartumik paasisimasaqarnissaa, akissaqarnissaalu eqqaassanngikkaanni pisinnaatitsissummik pigisaqartup aningaasatigut, aqutsinermilu tunngaviinut annerusumik piumasaqaateqanngilaq.

Pisinnaatitsissummik pigisaqartup atuinissamut akuersissummik tunineqarnissaminut piukkunnaateqarnersoq pillugu naliliinissamut, massakkut malittarisassaasut Naalakkersuisut pingaarutilimmik naliliisussanngortippaat. Taamak siammasitsigisumik naliliinissami piginnaatitsissuteqarneq assigiinngitsumik suleriaaseqarnissamik, ingerlatsisunullu akuersissutinik qinnuteqartunut nalornilersitsinermik kinguneqarsinnaavoq. Pisinnaatitsissummik pigisaqartut aningaasatigut, inatsisitigut, aqutsinermilu naammattunik piginnaasallit kisimik akuersissutinik tunineqartarnissaannik qulakkeerisinnaasunik ersarinnerusunik, kinaassusersiunngitsunillu atuutsilersitsisoqarnissaa pisariaqarpoq. Tamanna akuersissutinik tunniussiniarnermi siumut nalunangereersutsimik, ersarissuutitsinermillu pilersitseqataassaaq, ilutigisaanillu Kalaallit Nunaanni sermeqarfiit, imeqarfiillu illersorneqarlutik piumasaqaatinik.

Siunnersuut malillugu akuersissutinik tunniussinissami kinaassusersiunnginnerusumik, ersarinnerusumillu tunngavissamik pilersitsiumalluni, pisinnaatitsissummik pigisaqartumut piumasaqaatit siunnersuummi ersarissarneqarlutillu itisilerneqarput. Siullermik pisinnaatitsissummik pigisaqartoq Kalaallit Nunaanni angerlarsimaffeqartutut

nalunaarsoqqalluni aktianik piginneqatigiiffiunngikkuni piginneqataassuteqarluni ingerlatseqatigiiffiussasoq ersarissarneqassasoq siunnersuutigineqarpoq.

Pisinnaatitsissummik pigisaqartoq akiliisarnerninik unitsitsisimassanani, akiliisinnaajunnaarsimassanani, pinngitsaaliissummik atorunnaarsitaasimassanani, allatigulluunniit taakkununga nallersuunneqarsinnaasunik inissisimassasani aningaasatigut akiliisinnaassuseqassasoq aamma piumasaqaateqassaaq. Pisinnaatitsissummik pigisaqartoq aamma Kalaallit Nunaanni pisortanut 100.000 koruuninik amerlanerusunilluunniit akiitsoqassanngilaq. Taassumap saniatigut pisinnaatitsissummik pigisaqartup aqutsisuiut aamma piumasaqaateqassaaq: Aqutsisut, matumani qullersaqarfimmiut, siulersuisuni ilaasortat aamma teknikkikkut aqutsisut kiisalu piginnittuviit ilanngullugit, inaarutaasumik eqqartuunneqarnermikkut aningaasatigut pinerluttuliorsimasutut eqqartuunneqarsimassanngillat, suliffeqarfimmik ingerlatsisinnaajunnaarsinneqarsimassanngillat imaluunniit ingerlatseqatigiiffiup ingerlatsineranut sunniuteqarsinnaasunik allatigut killilersorneqarsimassanngillat.

Taassumap saniatigut akuersissut naapertorlugu ingerlatassat pisinnaatitsissummik pigisaqartup ingerlassinnaagai qulakkeerumallugu siunnersuutigineqarpoq, akuersissut malillugu ingerlatassanut pisinnaatitsissummik pigisaqartoq pisariaqartumik paasisimasaqassasoq.

Kiisalu siunnersuutigineqarpoq, pisinnaatitsissummik pigisaqartumut piumasaqaataasut qinnuteqarnermuinnaq atatillugu pisinnaatitsissummik pigisaqartup naammassinagit, piffissaq akuersissuteqarfiusoq tamakkerlugu naammassissagai.

*2.4.2. Suliniummut piumasaqaatit, piumasaqaatitalerlugu atuinissamut akuersissut*  
Inatsit atuuttoq malillugu akuersissummik tunniussisoqarnissaanisuliniummum tunngavilersukkanik piumasaqaasiortoqanngilaq. Suliniut teknikkikkut, aningaasatigullu ingerlanneqarsinnaanerani qinnuteqartoq takutitsisariaqartinnagu akuersissut tunniunneqarsinnaavoq, tamannalu suliap paasissutissinneqarnissaanut Naalakkersuisut pingaarutilimmik naliliisussanngortinneqarlutillu piumasaqarfigineqarlutik. Taamaakkaluartoq atuinissamut, uninnissamullu pilersaarutit akuerineqarnerinut atatillugu aatsaat, uppersaanissamik piumasaqaateqarpoq.

Suliniutit nalilernerqarnissaanni kinaassusersiunngitsunik piumasaqaateqarnissaa pisariaqarpoq, taamaalilluni aalajangeeriaaseq assigiingitsuliornernunnginnerullunilu ersarinneruniassammat. Erseqqissunik piumasaqaasiortoqanngippat, suliniutinut piviusunngortinneqarsinnaanngitsunut akuersissutinik tunniussisoqaratarsinnaavoq, tamannalu aningaasatigut aamma avatangiisitigut ajornartorsiuteqalernermik, siunertaanngitsumillu nunaminertamik inniminniinermik kinguneqarsinnaavoq.

Atuinissamut akuersissummik tunniussisoqartinnagu suliniut teknikkikkut, aningaasatigullu ingerlanneqarsinnaanerani qinnuteqartup uppersaanissaanik siunnersuut piumasaqaatitaqarpoq. Tamanna pisinnaatitsissummik pigisaqartup uppersaanissaanik piumasaqaasiivoq. Eqaassuseqarnissamik pisariaqartitsineq iliuuseqarfigiumallugu siunnersuutigineqarpoq, suliniutip ingerlanneqarsinnaaneranut piumasaqaataasup naammassineqarnerata uppersarneqarnissanut qinnuteqartup annerpaamik ukiut pingasut iluini uppersaasiinissaanik piumasaqaatigalugu, atuinissamut akuersissut tunniunneqarsinnaasassasoq. Piffissaliussap iluani piumasaqaataasoq naammassineqanngippat, piumasaqaatitalerlugu akuersissut erngertumik atorunnaassaaq.

Akuersissummi piumasaqaataasoq naammassineqartoq Naalakkersuisut akuersitinnagit, pisinnaatitsissummik pigisaqartup atuinarluni ingerlatsinerit aallateqqusaanngilai. Taamaattoq piumasaqaatitalerlugu atuisinnaanermut akuersissut misissueqqaarnissamut akuersissummut naleqqiunneqarmat, pisinnaatitsissummik pigisaqartoq misissueqqaarsinnaavoq. Taamaalilluni suliniutip teknikkikkut, aningaasatigullu ingerlanneqarsinnaanissaanik uppersaanissamut pisariaqartumik piumasaqaataasup qulakkeerneqarnissanut, pisinnaatitsissummik pigisaqartoq piffissalerneqassaaq.

Suliniutip ineriartortinneqarnerani siusissumi Naalakkersuisut akuersissummik tunniussisinaanissaat siunnersuutitigut qulakkeerneqassaaq, ilutigisaanillu naleqquttumik piffissaliussap iluani pisariaqartumik uppersaanissamik qinnuteqartup tunniussinissaa piumasaqaatigineqarsinnaassalluni.

Akuersissummik tunniussinissami tunngavissatut suliniutit teknikkikkut, aningaasatigullu ingerlanneqarsinnaanersut Naalakkersuisut naliliissasut siunnersuutigineqarpoq. Ilutigisaanik siunnersuutigineqarpoq, uppersaasiinissamut piffissaliussat eqqarsaatigalugit eqaassuteqartitsinissaq qulakkeerumallugu, Naalakkersuisut piumasaqaatitalerlugu atuisinnaanermut akuersissummik tunniussisinnaassasut.

## *2.5. Akuersissuteqarnissamut piumasaqaatit*

Sermimik, imermillu akisussaassuseqartumik, sunniuteqarluartussamillu atuinissamut akuersissuteqarnissamut piumasaqaatit aalajangiisuupput. Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersoq piffissaliussanut, ingerlatassanut, piffissanullu akuersissuteqarfiusut kiisalu piumasaqaatinik allanik aalajangersaanissamut ataasiakkaatigut piginnaatitsissutitut piumasaqaatitaqarpoq. Taamaakkaluartoq suliniutip angissusaa aamma ineriartornera, aammali pissutsit siumut ilisimaneqarsinnaanngitsut eqqarsaatigineqartussanngorlugit ersarinnerusumik, eqaannerusumillu malittarisassiuussinissaq pisiaqarpoq.

Aallartinissamut piffissaliussat, ingerlatsisussaataaneq, piffissallu akuersissuteqarfiusut siunnersuummi ersarissarneqarlutillu naleqqussarneqarput. Suliniutit siuariartornissaannik tunngavissiillutillu, naleqqussaanissamut pisariaqartumik periarfissiisunik, ilutigisaanillu

siunertaanngitsunik nunaminertamik inniminniisoqarnissaa illersorneqarluni  
ersarinnerusunik, eqaannerusunillu malittarisassiuussinissaq siunertaavoq.

#### *2.5.1. Aallartinnissamut piffissaliussaq, ingerlatsisussaatitaanerlu*

Inatsit atuuttoq malillugu, akuersissutip tunniunneranit atuneq qaqugu  
aallartinneqarsimassanersoq piffissaliussaq, atuinissamut akuersissummi  
aalajangersarneqassaaq. Piffissaliussaq naammassineqanngippat, atuinissamut akuersissut  
erngertumik atorunnaassaaq. Piffissaliussaq sivitsorneqaqqissinnaanani ukiunit tallimanit  
sivisunerusunnaanngilaq, immikkullu akuersissuteqarnissamut periarfissaqarani. Tamanna  
piginnittussaatitaasumut, naatsorsuutiginnngisamik kinguaattoornernik nalaataqartumut  
naleqqutinngitsunik inissiisarpog. Suliniutip ineriartornera, niuernermi pissutsit,  
piginnittussaatitaasullu aqussinnaanngisaanik naatsorsuutiginnngisamik pisinnaasut  
eqqarsaatigineqarsinnaatillugit, eqaannerusunik malittarisassiuussinissaq pisariaqarpoq.

Taassumap saniatigut ingerlatsinernik unitsitsigallarnissat Naalakkersuisunit  
akuerineqartariaqarmata, inatsisip atuuttup toqqaannanngitsunik ingerlatsinissamik  
piumasaqaat aalajangerpaa. Unitsitsigallarnissaq qaqugukkut akuerineqarsinnaanera pillugu  
naliliinissaq missiliugassaavoq, malittarisassallu itisilernerneqarnissaat aamma  
ersarissarneqarnissaat pisariaqartinneqarluni.

Ingerlatsisussaatitaaneq siunnersuummi nassuiaatigineqarpoq, aallartinnissamullu  
piffissaliussamut malittarisassat nutarterneqarlutik.

Atuinissami ingerlatsinissaq ukiut tallimat iluini aallartinnissaanik piumasaqaat  
siunnersuummi attatiinnaqarpoq. Misissueqqaarnissat eqqarsaatigalugit,  
misissueqqaarnissamut immikkut akuersissummik tunniussisoqarsimappat, misissueqqaarnerit  
ukiup siulliup iluani aallartinneqarsimassasut piumasaqaataalissaaq. Taassumap saniatigut  
piginnittussaatitaasup suliniutip piviusunngortinneqarnissaa sulissutigippagu imaluunniit  
paasinartumik siumut ingerlanissamut akimmiffiusimasoqarpat, Naalakkersuisut  
aallartinnissamut piffissaliussamik siunnersuutitigut sivitsuisinnaapput. Taamaalluni  
suliniutit aallartinneqanngisaannartussanut akuersissutit attatiinnaqannginnerussammata,  
siumut ingerlasoqarnissaa eqqarsaatigineqarpoq. Uani nunaminertamik inniminniisoqarnissaa  
pinngitsoortinniarneqarpoq.

Ingerlatsisussaatitaaneq eqqarsaatigalugu, piginnittussaatitaasup piffissaq  
akuersissuteqarfiusoq tamakkerlugu akuersissut malillugu ingerlatsissasoq siunnersuutip  
ersarissarpaa. Taamaakkaluartoq ukiut siulliit pinnagit, taakkua piginnittussaatitaasup  
aallartisaanissamut piffissalernerneqarluni aallartinnissamut piffissaliussami ilaatinneqarmata.  
Ingerlatanik sunilluunniit unitsitsigallarnissat akuerineqarnissaat attatiinnaqarpoq,  
tassungalit ersarinnerusunik piumasaqaasiortoqarluni. Ingerlatat unitsikkallarneqarnissaannik  
pisariaqalersitsisunik immikkut pissuteqassaaq, ingerlatallu aallarteqqinnissaannut  
pisinnaatitsisummik pigisaqartoq pilersaarummik saqqummiussissalluni.

### 2.5.2. *Piffissaq akuersissuteqarfiusoq*

Inatsit atuuttoq naapertorlugu atuinissamik akuersissut ukiut 20-t tikillugit atuuttussatut tunniunneqarsinnaavoq, sivitsorneqarnissanullu periarfissaqarluni. Misissueqqaarnissamut akuersissut ukiut pingasut tikillugit pinerit tamaasa tunniunneqarsinnaavoq. Taamaakkaluartoq suliniut iluatsikkaluarpalluunniit imaluunniit inuiaqatigiinnut iluaqutaagaluarpalluunniit, atuinissamut akuersissummi piffissaq akuersissuteqarfiusoq annerpaamik ukiunut 30-nut aalajangersarneqarsinnaavoq.

Akuersissut qanoq sivisutigisumik atuussinnaanissaanut qaffasinnerpaamik killiliissalluni naleqqutinngissinnaavoq. Suliniummi akisussaaffilimmik, piujuartussamik, ineriartornissamullu periarfissaqarluni ingerlanneqartoq pisortatigoortumik piffissaliineq patsisaaginnarluni matusariaqaratarsinnaalissammat. Tamanna suliffeqarfinnut pilersitsiumasunut, aningaasaleerusuttunullu nalorninartumik tunngavissaqalersitsivoq, siunissamummi ungasinnerusumut akuersissuteqarsinnaannginneq suliniutini taamak ittuni aningaasatigut annertuumik kinguneqarsinnaasuni akisussaaffeqarnissaq soqutiginarunnaarsinnaammat. Siunissamut ungasinnerusumut aningaasaliissutit tunngavissikkumallugit, eqaannerusumik malittarisassaqaarnissaa pisariaqarpoq.

Akuersissutit ukiut 20-t tikillugit piffissalerlugit tunniunneqarsinnaanerat siunnersummi atatiinnarneqarpoq. Piffissaq akuersissuteqarfiusoq ukiut qulikkaarlugit Naalakkersuisut sivitsorsinnaassagaat, piffissarlu annerpaamik akuersissuteqarfiusinnaasoq peerneqassasoq siunnersuutigineqarpoq. Tunngavilersukkamik naliliineq aallaavigalugu, akuersissummik qaqugukkut sivitsuisoqarsinnaanersoq piumasaqaatinik aalajangersaasoqassaaq. Piumasaqaatit ersarinnerusut piumasaqaatigalugit sivitsuineq aalajangersarneqassaaq. Pissutsit allanngorsinnaanerat, ilisimasallu nutaat eqqarsaatigineqarsinnaanerat malittarisassani siunertaavoq.

Taamaalilluni sivitsuinissamik aalajangiinerit suliniutip inuiaqatigiinnut pingaaruteqassusianik, aningaasatigut nammassinnaassusianik kiisalu avatangiisinut aamma piujuartitsisussanut tunngasunik tamat isiginnittumik naliliisoqartassalluni, malittarisassat eqaannerusut qulakkeerneqassapput. Tamanna piginnittussaataasumut siumut nalorninanngitsumik pilersitsissaaq, pisuussutinillu akisussaaffeqartumik atuinissaq qulakkeerneqarluni.

### 2.6. *Pinngortitamut kingunissaanik naliliineq aamma avatangiisit*

Sermimik, imermillu atuinermut atatillugu avatangiisinut tunngatillugu inatsit atuuttoq ataasiakkaanik aalajangersagaqarpoq. Atuinissamut pilersaarutit, atuinissamut akuersissummik tunniussereernerup kingorna akuerineqartussat, ingerlatat avatangiisinut kingunerisinnaasaannut tunngasunik ilaatigut naliliinertaqassapput. Taassumap saniatigut avatangiisinut, pisuussutinullu tunngasunut akuersissummi piumasaqaatinik

aalajangersaasoqarsinnaavoq, piginnittussaatitaasoq ingerlatat pillugit ukiumoortumik nalunaarusiortassaaq. Ilutigisaanik Avatangiisit innarlitsaaliorneqarnissaanik Inatsisartut inatsisaanni § 41 malillugu aamma Imaani avatangiisit illersorneqarnissaat pillugu Inatsisartut inatsisaanni § 36 malillugu illuliortiternerit, sanaartornerillu anginerusut imaluunniit suliffeqarfinnik allanik pilersitsinerit, Naalakkersuisut tamatumunnga akuersiteqqaarnagit aallartinneqaqqusaanngitsut. Akuersissummik qinnuteqarnermut atatillugu, suliniutip avatangiisinut sunniutissaanik nassuiaammik Naalakkersuisunut nassitsisoqassaaq.

Pinngortitamik illersuinissamik imaluunniit pinngortitamut kingunissaanik naliliinissamik Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersoq immikkut malittarisassaqaanngilaq. Pinngortitamik illersuineq pillugu Inatsisartut inatsisaanni § 4 malillugu, pisuussutiniq uumaatsunik misissueqqaarnernut, misissueqqissaarnernut, atuinnernullu atatillugu pinngortitamik illersuinissamut malittarisassanik aalajangersaaneq inatsisartut inatsisaanni ilaatinneqaanngilaq. Taakkua pillugit malittarisassat, ingerlatassanut taamak ittunut pisinnaatitsissummik imaluunniit akuersissummik tunniussinissamut inatsit tunngaviusoq tunngavigalugu kiisalu taakkuninnga oqartussat ataatsimut suliaqarnerinut atatillugu aalajangersarneqassapput. Sermeq, imerlu pisuussuutitut uumaatsutut isigineqarput. Taamaalilluni sermimik, imermillu misissueqqaarnermut aamma atuinnermut atatillugu siunnersuut manna, sermimik aamma imermik niuernerimik tunngavilimmik atuinnissamut, matumani misissueqqaarnissaq aamma atuinnissaq ilanngullugit, akuersissutiniq tunniussinissamut tunngaviuussasoq malillugu pinngortitamik illersuinissamut malittarisassanik aalajangersaasoqassaaq.

Annertuumik ajoqusiinnissamut pinngortitaq illersorneqartariaqarpoq, suliffeqarfiillu aamma piginnittussaatitaasullu ingerlatsinerminni kingunerisinnaasaannut akisussaaffimmik tigusiinnissat pingaaruteqarpoq. Taamaattumik sermimik, imermillu atuinnissamut akuersissummik tunniussisoqartinnagu, pinngortitamut kingunissaanik naliliinerit suliat suliarineqartarnerinut ilaatinneqartariaqarput. Suliniutinut nunamut, pinngortitamullu annertuumik sunniuteqarsinnaasunut akuersissummik tunniussisoqartinnagu peqqissaartumik naliliiffigineqartarnissaat pinngortitamut kingunissaanik naliliinerup qulakkiissavaa, akuersissummilu naleqquttunik, pisariaqartunillu piumasaqaasiortoqarsinnaanissaanut kiisalu paasissutissanik tunngavilimmik aalajangiisoqarnissaanut tunngavissiiinnaassalluni. Tamanna pillugu siunnersuutigineqarpoq, akuersissummik tunniussisoqartinnagu Avatangiisit innarlitsaaliorneqarnissaanik Inatsisartut inatsisaanni § 41 malillugu qinnuteqartoq pinngortitamut kingunissaanik naliliinnermik tunniussinissanik piumasaqaammik atuutsitsilersitsisoqassasoq. Naliliinnermi tassani nunamut, kangerlummot, immamut kiisalu pinngortitamut kingunerisinnaasai ilanngunneqassapput. Qinnuteqartoq isumaqaruni pinngortitamut kingunissaanik naliliisoqartariaqaanngitsaq, tamanna qinnuteqaammik tunngavilersorneqassaaq. Taassumap saniatigut suliniut avatangiisinut annertuumik ajoqusiissasoq nalilerneqarpat, Naalakkersuisut qinnuteqaammik itigartitsinnaanissaannut imaluunniit pinngortitap illersorneqarnissaa pillugu piumasaqaasiornissaannut periarfissinneqarput.

Taassuma saniatigut siunnersuutigineqarpoq, pinngortitamut kingunissaanik naliliinissamut piumasaqaat pillugu ersarinnerusunik malittarisassiornissaanut kiisalu sermimik, imermillu atuinissaq pillugu misissueqqaarnissamut aamma atuinissamut atatillugu pinngortitamik illersuinissaq pillugu malittarisassiornissaannik Naalakkersuisut piginnaatinneqassasut.

Taassumap saniatigut avatangiisinik, sumiiffimmillu eqqugaasumik iluarseeqqinnissamut piginnittussaataasup aningaasatigut qularnaveeqqusiinissaanik piumasaqaasiortoqarsinnaassasoq siunnersuutigineqarpoq. Taamaalilluni pissutsit annertuumik allanngussappata, iluarseeqqinnissami naatsorsuutigisamik aningaasartuutissat matussuserneqarnissaat taassumap qulakkiissavaa.

Suliniut inuiaqatigiinnut, avatangiisitigut imaluunniit inuussutissarsiutinut tunngasunut annertuumik sunniuteqassasoq nalilerneqarpat, akuersisummik tunniussisoqartinnagu tamanut tusarniaanissamut siunnersuut aamma periarfissiivoq.

Ataatsimut isigalugu pinngortitamut, avatangiisinullu tunngasut aalajangiinissami tunngavissami ilaatinneqarnissaat allannguutit taakkua qulakkiissavaat.

### **3. Pisortanut aningaasaqarnikkut allaffissornikkullu kingunerisassat**

#### *3.1. Pisortanut aningaasaqarnikkut kingunerisassat*

Immikkoortortaq ineriartortissallugu, sermillu erngullu niuernermik tunngavilimmik atornissaannik siunertalimmik suliffeqarfiit pilersitsinissaat soqutiginarsarnerussallugu siunnersuutip siunertaraa. Taamaattumik akiliuteqartitsisarnikkut aningaasatigut isertitat amerlinissaannik siunnersuut kinguneqassangatinneqarpoq.

Taassuma saniatigut akileraarutitigut isertitatigut, matumani sulisitat akileraarutissaat aamma ingerlatseqatigiiffiit akileraarutissaat ilanngullugit, malitsigisaanik isertitaqartoqassasoq naatsorsuutigineqarpoq.

Qinnuteqaatit qassiussanersut, akuersissutillu qassit tunniunneqassanersut isertitassanut apeqqutaasussaammata, isertitassat qanoq amerlatigissanersut missiliorneqarsinnaanngilaq.

Siunnersuut pisortanut aningaasartuuteqarnerunermik kinguneqassangatinneqanngilaq.

Siunnersuutip § 24-atigut aalajangersarneqarpoq, piginnittussaataasup sermimik, imermillu avammut tunisinermiut Namminersorlutik Oqartussanut akiliuteqarnissaa pillugu Naalakkersuisut akuersisummi piumasaqaatinik aalajangersaasinnaassasut. Sermip, erngullu avammut tunineqartup annertussusaat kiisalu nakkutilliinermi aningaasartuutit matussuserneqarnissaanut tunngaviusumik akiliutissaasoq malilillugit akiliutissaq aalajangersarneqartassaaq. Taamaalilluni nunatsinni sermimik, imermillu nioqquteqarnissamut akiliuteqartitsisoqartassanngilaq.

Taassumap saniatigut akiliutissap naatsorsorneqarnissaanut, annertussusilernerneqarnissaanullu ersarinnerusunik malittarisassiuussisunik malittarisassanik aalajangersaasoqassasoq siunnersuutigineqarpoq. Matumani suliarinninnerup annertussusaa tunuliaqutaralugu akiliutit annertussusissaa assigiinngisitaarsinnaassasoq ilanngullugu.

Imermik avammut tunisinermi tunisassiornermut akitsuut ullumikkut literimut 0,04 koruuniusumut aalajangersarneqartartoq aallaavigineqassasoq naatsorsuutigineqarpoq, kisiannili assigiinngisitaartillugu. Inaarutaasumik akiliutissaq akuersissummi aalajangersarneqassaaq, pilersaarullu tunuliaqutaralugu aalajangersarneqassalluni. Avammut tunisiniarnermi imeq, sermerlu piareersaqaarnagit avammut tunineqarnerinit sermimut, imermullu Kalaallit Nunaanni suliarineqaaqaarsimasunut akikinnerusumik akiliuteqartitsisarluni, akiliutissat aalajangersarneqassasut naatsorsuutigineqarpoq. Najukkami suliarinnittarnerup siuarsarneqarnissaa, Kalaallit Nunaannilu suliffinnik aamma suliffeqarfinnik pilersitsinissaq tunngavissinneqarnissaa siunertaavoq. Taamaattumik pisinnaatitsissummik atuineq isertitaqarnerulernikkut kiisalu malitsigisaanik inuussutissarsiutinik ingerlatsinikkut aningaasatigut pitsaasumik kinguneqassasoq naatsorsuutigineqarpoq.

### *3.2. Pisortanut allaffissornikkut kingunerisassat*

Siunnersuut allaffissornikkut annertuumik kinguneqassangatinneqanngilaq. Suliassat marlunnut avinnagit, ataatsimut suliarineqartalissapput. Suliat suliarineqartarnerisa ataatsimoortinneqarnerat, taamaalillunilu qinnuteqaammik suliaqarneq piffissamik sivisuumik atuiffiujunnaartussaassammat tamanna naatsorsuutigisamik oqilisaataassaaq.

Avammut tunisinissamut akuersissutit ukiut tamaasa nutarterneqartarnissaat piumasagaatigineqassasoq siunnersuummi siunnersuutigineqarpoq. Tamanna assersuutigalugu aalisarnermut suliassaqaarfimmi nalinginnaasumik suleriaasioreerpoq. Tassunga tunngatillugu sulianik suliaqartarneq annertusissangatinneqarpoq, annertuumiunngitsorli.

Suliffeqarfiit soqutiginninnerulernerisa kingunerisaanik suliat suliarineqartartut annertusineqassasut naatsorsuutigineqarpoq, tamannalu qinnuteqartut amerlinerinik kinguneqarsinnaalluni.

## **4. Inuussutissarsiortunut aningaasaqarnikkut allaffissornikkullu kingunerisassat**

### *4.1. Aningaasaqarnikkut kingunerisassat*

Siunnersuutip § 24-a malillugu piginnittussaataitaasup akiliuteqarnissaanik piumasagaasiortoqarsinnaassammat, siunnersuut suliffeqarfinnut sermimik, imermillu avammut tunisinissaminnik kissaateqartunut aningaasatigut kinguneqassangatinneqarpoq.

Avammut tunisat annertussusaat kiisalu ukiumut tunngaviusumik akiliutissaq tunngavigalugit akiliutissaq aalajangersarneqartassaaq.

Qinnuteqartariaatsip allanngornissaanik siunnersuut allaffissornermut pisariillisaassangatinneqarpoq. Qinnuteqaasiorarluni, malitsigisaanik atuinissamut aamma uninnissamut pilersarusiorani siunnersuut malillugu, qinnuteqartut qinnuteqarnerminni atortussanik suliaqaannaratarsinnaapput. Siunnersuut malillugu akuersissummik tunineqarniariarluni ingerlatassat aallartinneqarsinnaassammata, massakkutut piginnittussaataitasup atuinissamut akuersissummik tunineqareeruni atuinissamut aamma uninnissamut pilersaarutit akuersiteqqaartussaannngimmagit, piaarnerusumik kaaviiaartitaqalersinnaavoq.

Piumasaqaatitalimmik akuersissut piginnittussaataitasumut piumasaqaatinik tamanik suli naammassinninngitsumut, aningaasaliisussarsiortumullu imaluunniit aningaasassarsiortumut iluaqutaasinnaavoq.

#### *4.2. Inuussutissarsiutit aaqqissuussaannerinut kingunerisassat*

Sermip, erngullu atorneqarnerisa suliffeqarfinnik pilersitsinissami pilerinartunik sinaakkuteqalersitsinikkut, unammilleqatigiinnermi atugassarititanut siunnersuut pitsaanerulersitsissasoq nalilerneqarpoq. Tamanna immikkoortortami unammilleqatigiinnerunermik, ineriartortitsinermillu kinguneqarsinnaavoq, soorluttaaq Kalaallit Nunaata sermimik, imermillu pilersuisutut nunat assigiinngitsut akornanni niuerfinni inissisimaneranut nukittorsaataasinnaasoq. Taamaalilluni siunnersuut nioqqutissiornermut, suliffissaqartitsiniarnermullu pitsaasumik kinguneqarsinnaavoq.

#### *4.3. Allaffissornikkut kingunerisassat*

Sermip, erngullu niuernermik siunertanut atorneqarnerinut akuersissuteqarnissamik piumasaqaatip attatiinnarneqarnissaanik siunnersuut kinguneqarpoq, tamannalu qinnuteqartariaatsikkut, uppersaarnissamillu piumasaqaateqarnikkut suliffeqarfiit allaffissornikkut suliassaqaarnissaannik kinguneqassalluni. Ilutigisaanik sulianik suliaqartariaaseq akimmisaarfeerunnerussasoq naatsorsuutigineqarpoq, tamannalu piffissamik sivisuumik atuiffiulluni marloqiusamik suleriaaseqarneq eqqarsaatigalugu suliffeqarfiit piffissamik atuinerinut sivikillisaataasinnaassalluni.

Qinnuteqaammut, oqartussallu akuersinissaannut piumasaqaataasut annertuutigut atuuttut assigiinnartussaassammagit, ataatsimut allaffissornikkut suliassat annertuumik annertusissangatinneqanngillat. Taamaakkaluartoq paasissutissat manna tikillugornit siusinnerusukkut tunniunneqartassapput, qinnuteqaatillu imarisaanut ersarinnerusunik piumasaqaateqassalluni.

Avammut tunisinissamik akuersissutit ukiut tamaasa nutarterneqartassasut piumasaqaammik ilanngussisoqarpoq, tamannalu piginnittussaataitasup allaffissornerulernissaanik

kinguneqassasq naatsorsuutigineqarluni. Taamaakkaluartoq ukiut tamaasa nutarterinikkut, paasissutissat ataavartumik nutarterneqartarnissaat, avammullu tunisinermi aamma niuernermi pissutsit allanngornerini eqaatsumik naleqqussaasarnissaq qulakkeerneqassaaq.

## **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut, inuillu peqqissusaannut toqqaannartumik, toqqaannanngikkaluartumillu kinguneqassangatinneqarpoq.

### *5.1. Naasut, uumasullu*

Sermip, erngullu atorineqarnerat uumasut, naasullu pinngortitami najortagaannut akornusiisinnaavoq. Tamanna assersuutigalugu sumiiffinni pineqartuni erngup aqutigisaanik, kissassutsinillu allannguisinnaavoq, tamannalu pingaartumik pinngortitap ataqatigiinneranik eqqugaasinnaasunit uumasut amerlassusaannut, uumassuseqatigiillu siammasissusaannut sunniuteqarsinnaalluni. Taamaakkaluartoq atuineq sumiffimmut aalajangersimasunut killilersugaasussaammat, piffissamilu akuersissuteqarfiusumi pinngortitaq aamma avatangiisit eqqarsaatigineqartussaammata, siunnersuut uumasooqatigiinnut anginerusunut annertuumik sunniuteqassangatinneqanngilaq, matumani aamma akuersissutini ataasiakkaani piumasaqaatinik aalajangersaanermi.

### *5.2. Nuna, immallu naqqa*

Sermimik, imermillu pisuussutinik atuinissaq ukkatarineqarmat, toqqaannartumik ingerlatassanik nunamut annertuumik sunniuteqartussanik siunnersuut kinguneqassanngilaq. Taamaakkaluartoq suliniutit ilaat sanaartukkanik pilersitsiviusariaqarput, tamannalu pilersaarutitut inatsimmi malittarisassiuunneqarluni. Taamaalillunilu akuersissutit ilaat toqqaannanngitsumik nunamut, immallu naqqanut sunniuteqarsinnaassallutik. Sunniutit taakkua akuersissuteqariaatsimi, matumani aamma piumasaqaatinik aalajangersaanermi eqqarsaatigineqartussaammata, killilimmik sunniuteqassasut nalilerneqarpoq.

### *5.3. Aniatitsinerit, qinngornerillu*

Sermimik, imermillu atuinermut atatillugu ingerlatanik naatsorsuutigisamik aniatitsinissat killeqartorujussuussasut nalilerneqarpoq. Qinngornermik aniatitsisoqarniaviannngilaq, kisianni CO<sub>2</sub>-mik aniatitsinikkut imaluunniit teknologiinit, maskiinanillu pissarsinermi atorineqartunit gassinik silaannarmik kissakkiartortitsisartunik aniasoqarsinnaassalluni. Aniatitsinerit taakkua innuttaasut peqqissusaannut annertuumik kinguneqassangatinneqanngillat.

Akuersissummi piumasaqaatinik aalajangersaanermi silap pissusia, avatangiisillu eqqarsaatigineqarsinnaapput, matumani aamma nioqqutissiornermi CO<sub>2</sub>-mik minnerpaamik aniatitsisoqarnissaanik piumasaqaasiornikkut.

### *5.4. Nunap ilusaa*

Sumiiffinni sermimik, imermillu atuiffiusuni attaveqaasersuutitigut naleqqussaanerit, ingerlatsinerillu malitsigisaannik nunap ilusaa allanngorsinnaavoq. Taamaakkaluartoq ingerlatat killiliussat iluini ingerlanneqartussaammata, allannguutit taakkua killeqassangatinneqarput.

#### *5.5. Eqqagassalerineq*

Nioqqutissiat sinnerinik imaluunniit nioqqutissiat perlukuinik eqqagassalerumaartussat annikissangatinneqarput, taamaakkaluartorli eqqagassalerinermi malittarisast atuutissallutik.

#### *5.6. Peqqissuseq, sulinermilu avatangiisit*

Siunnersuutip kingunerisaanik innuttaasut peqqissusaannut kingunissanik uppersarneqarsinnaasoqanngilaq.

Sermimik, imermillu atuineri inunnut akuusunut sulinermi atugassarititaasuni tamanna pillugu malittarisassat nalinginnaasut atuuttussaammata, sulinermi avatangiisinut siunnersuut immikkut kingunissaqarsorineqanngilaq. Taamaakkaluartoq oqaatigineqassaaq, soorlu assersuutigalugu nakorsamik ikiorserneqarnissamut killilimmik periarfissaqarluni kiisalu atortut aamma maskinat ulorianarsinnaasut atorlugit avinngarusimasuni sulineq ingerlanneqarsinnammat.

Teknikkimut, isumannaallisaanermut, avatangiisinullu tunngasut kiisalu sermeq aamma imeq iluaqutissat, illup iluani imaluunniit assigisaanik atorneqassatillugit imaluunniit atorneqartussaattillugit pitsaassutsimut aamma peqqissutsimut tunngasut akuersissummi piumasaqaasiorfigineqarsinnaapput.

#### *5.7. Uumassusillit tappiorannartut, timitalimmillu sunniuteqarnerat*

Ingerlatat kingunerisaannik uumassusillit tappiorannartut, timitalimmillu soorlu assersuutigalugu pujoralaat, nipiliornerit imaluunniit tipit sunniuteqarsinnaapput. Sunniutit taamak ittut killeqassasut nalilerneqarpoq, avatangiisinullu aalajangersakkat naapertorlugit iliuuseqarfigineqassallutik.

Teknikkimut, isumannaallisaanermut, avatangiisinullu tunngasunut aamma torersaanissamut, iluarseeqqinnissamullu piumasaqaatinik aalajangersaasoqarsinnaassaaq.

Ataatsimut isigalugu nalilerneqarpoq, siunnersuut avatangiisinut, pinngortitamut imaluunniit inuit peqqissusaannut annertuumik sunniuteqarnerlussanngitsaq, kisianni sunniuteqassappat taakkua minnerpaaffimmiisinnissaat qulakkeerumallugu, pisariaqartumik piareersimasoqarlunilu nakkutilliisoqassaaq.

### **6. Inuit pisinnaatitaaffii, innuttaasunullu kingunerisassat**

Sermimik, imermillu niuernerimik siunertanut atuinissamut akuersissut aktianik piginneqatigiiffimmut imaluunniit piginneqataassuteqarluni ingerlatseqatigiiffimmut taamaallaat tunniunneqarsinnaassammat, siunnersuut innuttaasunut ataasiakkaanut

aningaasaqarnikkut, allaffissornikkullu pingaarutilimmik toqqaannartumik sunniuteqassanngatinneqanngilaq.

Tunngaviusumik inatsisitigut, Inuttut piginnaatitaaffiit pillugit Europami naalagaaffiit isumaqatigiissutaanni imaluunniit nunat assigiinngitsut akornanni isumaqatigiissutitigut il.il. qulakkeerneqartutut innuttaasut pisinnaatitaaffiit siunnersuut kingunissaqarsorineqanngilaq.

Illuaraqarfiup eqqaani akuersissuteqaraanni, assersuutigalugu sumiiffimmi ingerlatsinerulernikkut innuttaasunut eqqugaasunut tamanna sunniuteqarsinnaavoq. Taamaakkaluartoq inuussutissarsiutitigut taamatut ingerlatsinerit inatsit atuuttoq malillugu akuerisaareermata, tamanna innuttaasut inatsisitigut inissisimanerinit allannguissanngatinneqanngilaq.

Innuttaasut inatsisitigut inissisimanerinit, matumani nammineq pigisaannut iserneq imaluunniit maalaaruteqarnissamut periarfissaasa allanngorneri ilanngullugit, akuliunnissamik siunnersuut kinguneqassanngilaq. Ilutigalugu inooqatigiinnermut, matumani nunasittarnerup pissusia, imaluunniit innuttaasut inuunermi atugaat ilanngullugit, siunnersuut aamma annertuumik kinguneqassanngatinneqanngilaq.

Suliffissatigut periarfissaqarnerulernikkut siunnersuut innuttaasunut malitsigisaanik pitsaasumik kinguneqassanngatinneqarpoq. Kalaallit, nunaniillu allanit sulisut qanoq agguataarsimassanersut, suliniutit pilersaarummi ilaatigut paasissutissiissutigineqassaaq.

## **7. Nunanut allanut attaveqaatinut aamma nunap immikkoortortaani politikkinut kiisalu allatigut kingunerisassat**

Kalaallit Nunaata nunanut allanut attaveqarneranut imaluunniit nunat assigiinngitsut akornanni pisussaaffinnut siunnersuut kinguneqassanngatinneqanngilaq. Taamaakkaluartoq oqaatigineqassaaq, sermeq aamma imeq imaatigut assartorneqartussaq sumi, qanorlu annertutigisoq assartorneqassanersoq apeqqutaatillugu imaatigut assartuineq uumasunut ingerlaartartunut sunniuteqarsinnaavoq, tamannalu pillugu Nunat akimorlugit avatangiisinut sunniutinik naliliineq pillugu Isumaqatigiissut 25. februar 1991-imeersoq malillugu (Espoo-konventionen (ESPOO-konventionen) nunat eqqaamiut attuumassuteqartut ilannguneqartariaqarsinnaallutik. Taassuma saniatigut nunat assigiinngitsut akornanni Aasivissuartut toqqakkani sermimik, imermillu atuinissamut suliniutit nunat assigiinngitsut akornanni pisussaaffiusunik pisussaaffeqassapput.

## **8. Oqartussat kattuffiillu il.il. tusarniaaffiginerat**

Siunnersuut piffissami 20. juni 2025-mit, 15. august 2025-mut [www.naalakkersuisut.gl](http://www.naalakkersuisut.gl)-imi tusarniaavimmi tamanut tusarniutigineqarpoq, piffissamilu tassani tusarniaaffigisassanut tusarniutigineqarluni. Tusarniaaneq pillugu, tusarniaanermullu akissutitut tiguneqartunut ilanngussaq 1 innersuussutigineqarpoq.



**Siunnersuummi aalajangersakkanut ataasiakkaanut nassuiaatit***§ 1-imut*

Imm. 1-imut.

Aalajangersagassatut siunnersuutigineqartup, sermip erngullu niuerneramik siunertaqartumik atorneqarnissaannut malittarisassiuussilluni Inatsisartut inatsisaata pingaarnertut atuuffissaa aalajangersarpaa. Siunnersuummi pingaarnertut niuernissamik siunertaqartumik sermimik aamma imermik misissueqqaarnerit, atuinerillu kiisalu niuerneramik tunngavilimmik Kalaallit Nunaata avataanut tunisassiornissat pineqarput.

Siunnersuut tassaavoq sermimik, imermillu atuinissamut misissueqqaarnissamut Naalakkersuisut akuersissutinik tunniussinissaannut tunngavissamik imaqarluni sinaakkutissatut inatsimmut siunnersuut.

Imm. 2-mut.

Erngup nukingata nukissiornermut atorneqartarnera pillugu Inatsisartut inatsisaanni nr. 27. november 2018-meersumi § 1, imm. 2-mi aamma Aatsitassat pillugit ingerlatallu tamatumunnga pingaarutillit pillugit inatsisartut inatsisaanni 7. december 2009-meersumi § 1, imm. 2-mi siunertamut aalajangersagaq malillugu aalajangersagassatut siunnersuutaasoq suliarineqarpoq.

Inatsit malillugu ingerlatat ingerlatsinermi sillimaniarneq, peqqissuseq, avatangiisit, pisuussutinik atuneq aamma inuiaqatigiinni piujuartitsinissaq eqqarsaatigalugit illersorneqarsinnaasumik kiisalu naleqquttumik ingerlanneqassasut aalajangersagassatut siunnersuutip aalajangerpaa.

Naalakkersuisut akuersissummi piumasaqaatinik aalajangersaanerini pingaarnertut eqqarsaatigisassat Naalakkersuisut pingaartitassaat, § 1, imm. 2-mi aalajangersakkap aalajangersarpai.

Atuneq aamma sanaartukkanik, atortulersuutinik il.il. pilersitsineq aamma ingerlatsineq, tassungalu atatillugu ingerlatat tamaasa eqqarsaatigalugit piumasaqaatinik pingaarutilinnik tamanik Naalakkersuisut akuersissummi aalajangersaasinnaapput. Piumasaqaatit suut pingaaruteqarnersut pillugit, pisuni ataasiakkaani pissutsinik attuumassuteqartunik tamanik naliliinissaq apeqqutaavoq. Taamaalilluni akuersissut tunniunneqartoq naapertorlugu ingerlatat tamarmik siunnersuummi ilaatinneqarput, matumani aamma pisariaqartunik attaveqaasersuutinik pilersitsineq kiisalu misissueqqaarnek imaluunniit atuneq eqqarsaatigalugit tapertatut ingerlatat ilanngullugit.

Taamaalilluni ilaatigut sillimaniarneq imaluunniit sanaartornermi ingerlatsinermi sillimaniarneq, patajaassuseq il.il., ilaatigullu sanaartornermi, maqitsinermilu sulisut isumannaassusaat, peqqissusaallu siunnersuummi ilaatinneqarput.

Siunnersuummi peqqissutsimut tunngatillugu oqaatsit atorineqartut, sulinermi avatangiisit pillugit inatsimmi peqqissutsimut tunngatillugu oqaatsit atorineqartut assigaat, taassumallu kingunerisaanik sulinermi ajutoornerit aamma inuussutissarsiut aqutigalugu nappaateqalersinnaanerit pisarnertut illersorneqarlutik, soorluttaaq timikkut, tarnikkullu peqqissutsimut akornutaasinnaasunut allatigut sunniutaasinnaasunut illersorneqartut.

Kiisalu ingerlatanut atatillugu avatangiisit eqqarsaatigineqarnissaat kiisalu Kalaallit Nunaanni sermimik, imermillu atuinermi inunnut, uumasunut, naasunut, pinngortitamullu pingaarutilinnik avatangiisinut nalinginnaasumik eqqarsaatigisassat siunnersuummi ilaatinneqarput.

Pisuussutinik illersorneqarsinnaasumik atuneq ilaatigut ima paasineqassaaq, pisuussummik pisariaqaanngitsumik asuli atuinertaqaanngitsumik aamma siunissamut ungasinnerusumut inuiaqatigiit soqutigisaat eqqarsaatigalugit ingerlatsisoqassasoq. Siunnersuut manna malillugu ingerlatassanik pilersarusiorneq aamma ingerlatsineq, ingerlatat Kalaallit Nunaanni nuna tamakkerlugu aamma najukkami inuiaqatigiinnut kingunerisinnaasaannik naliliinermik aamma aallaaveqarnissaannik, inuiaqatigiinni pijuartitsinissamik malittarisassat qulakkeerinissamut tapertaassapput.

Taamaalilluni inatsit malillugu ingerlatat tamarmik tamakkerlugu isiginnittumik pilersarusiornissaannik, ingerlannissaannillu malittarisassatut siunnersuutigineqartut piumasaqaateqarput. Inuiaqatigiinni pijuartitsinissaamik piumasaqaateqarnermi ingerlatat, sanaartukkallu siunertaanngitsumik imaluunniit annertuumik ajortumik najukkami inuiaqatigiinnut sunniuteqarnissaat ilaatigut pakkersimaartinneqassaaq, matumani suliffissatigut periarfissat, inuiaqatigiinni nalogiissitsineq, kulturikkullu naleqartitat ilanngullugit. Taassuma saniatigut inuiaqatigiinni ineriartortitsineq pijuartitsinissamik tunngaveqartussanngorlugu ingerlatassat aqqissuunneqarnissaat, inuiaqatigiinnilu inuunermut sunniunnerlussinnaasut akiornissaannut pisariaqartumik iliuusissat iliuuserineqarnissaat piumasaqaatip qulakkiissavaa.

Imm. 3-mut.

Erngup nukinganik imaluunniit nukimmik pilersitsinissamut sermimik, imermillu misissueqqaarnernut, atuinernullu Inatsisartut inatsissat atuutinngitsoq aalajangersakkap ersarissarpaa. Misissueqqaarnerit, nukimmillu pilersitsinissanut erngup nukinganik atuinertit kiisalu tassunga atatillugu ingerlatat allat Erngup nukingata nukissiornermut atorineqartarnera pillugu Inatsisartut inatsisaanni malittarisassiunneqarput.

Imm. 2-mi atuutsitsinnginneq taamaallaat sermimut, imermullu erngup nukingata innaallagissiornermut atorineqartunut tunngavoq. Taamaakkaluartoq siunnersuutigineqarpoq, erngup nukinganik nukissiorfinnit, allatigullu nukimmik pilersitsivimmit niuernerimik siunertaqartumik imermik sinneruttumik atuinertit inatsimmut ilaatinneqassasut. Taamaalilluni

sermeq, imerlu erngup nukinganut allatigullu nukimmik pilersitsivimmi atorneqarsimallutik atorneeruttut inatsimmut ilaatinneqarput, matumani niuernermik siunertanut atorneqarnissaannut akuerissuteqarnissamik piumasaqaat ilanngullugu.

Imm. 4-mut

Kalaallit Nunaanni pisortat imermik pilersuinissaat siunertaalluni sermimik, imermillu atuinernut aalajangersagaq manna atuutinngilaq. Taassumap saniatigut imeq sinneruttoq, pisortat pilersuineramik ingerlatsiviisa atorsinnaasaat aalajangersakkami ilaatinneqanngilaq.

Sermeq, imerlu pilersuineramik ingerlatsiviisa pilersuinissaq siunertaralugu atorsinnaasaat, Inatsisartut inatsisaannut imaalluunniit Inatsisartut inatsisaanni matumani akuersissuteqarnissamik piumasaqaataasumut ilaatinneqanngitsaq aalajangersakkap ersarissarpaa.

Taamaakkaluartoq siornatigut inatsit malillugu imermik sinneruttumik niuernermik tunngavilimmik atuinissamut akuersissutitut tunniuteriikkanut, Inatsisartut inatsisaat sulii atuutissaaq.

## *§ 2-mut*

Nr. 1

Oqaaseq ”Avammut tunisineq” ima paasineqassaaq, Kalaallit Nunaannit nunanut allanut sermimik imaluunniit imermik tunisineq, annissinerlu. Avammut tunisinermi Kalaallit Nunaanni pisuusummik tunisineq, annissinerlu pineqartut nassuiaatip ersarissarpaa.

Nr. 2

”Avammut tunisinissamut akuersissut” tassaavoq, misissueqqaarnissamut akuersissummut imaluunniit atuinissamut akuersissummut ilaalluni sermimik, imermillu avammut tunisisinnaanermut akuersissut, akuersissullu pineqartoq malillugu sermimik, imermillu avammut tunisisinnaatitsisoq. .

Nr. 3

”Misissueqqaarnerit” tassaavoq, pisuussut niuernermik siunertaqartumik qanoq, qanorlu annertutigisumik atorsinnaanersoq nalilerneqarnissaa siunertaralugu misissuineramik ingerlatat. Sumiiffimmi killilikkami atuisinnaanertaqanngitsumik, pisuusummik atuisinnaanermut periarfissanik qulaajaanissanut tamanna ersarissaavoq.

Assersuutigalugu imip pitsaassusaa, annertussusaalu nalilerumallugit imermik misissueqqaarnerusinnaavoq, sermip sannaa qanorlu innera paasiumallugit nunamik, nunallu sannanik misissuinerusinnaavoq, eqqaani avatangiisit sunnerneqarsinnaanerat nalilerumallugu avatangiisinik misissuinerusinnaavoq, aqquataasinnaasullu aamma attaveqaasersuutigut pisariaqartitat pilersaarusiorniartugit misissuinerusinnaalluni.

Nr. 4

” Misissueqqaarnissamut akuersissut” tassaavoq, § 4, imm. 1 malillugu akuersissut tunniuneqartoq malillugu sermimik, imermillu misissueqqaarnissamut akuersissut.

Nr. 5

Sermeq aamma imeq suminngaanneersut Inatsisartut inatsisaannut ilaatinneqarnersut, matumani pisuussutit suut niuernermik siunertalimmik atornissaannut akuersissuteqarfigineqarsinnaanersut nassuiaammi nassuiarneqarpoq.

” Sermeq, imerlu”-mi Kalaallit Nunaanni nunamit aamma imaanit sermeq imaluunniit imeq, matumani ilanngullugit sersersuarmit imeq, sersersuaq, tatsinit kuunniillu imeq tarajuunngitsoq kiisalu imaani sermit pineqarput. Allattukkat tamakkiisuunngillat.

Nukimmik pilersuivimmit imeq sinneruttoq killiliinermut aamma ilaavoq.

Taamaattoq pisortat pilersuinerinit imeq, soorlu assersuutigalugu kalaanimit imeq killiliinermi ilaatinneqanngilaq.

Nr. 6

” Niuernermik siunertat” tassaavoq, ingerlatat suulluunniit aningaasatigut

iluanaaruteqarnissamik, matumani aamma tunisinissamik siunertaqartut suulluunniit.

Taamaalilluni assersuutigalugu ilisimatusarnermik ingerlatanut imaluunniit ingerlatanut

allanut niuernissamik siunertaqanngitsunut, soorlu assersuutigalugu tunisinertaqanngitsumik sermimik, imermillu nammineq atuinerit nassuiaammi ilaatinneqanngillat.

Nr. 7

” Suliniut” tassaavoq, kissaatigisatut siunertarisamut sermimik aamma imermik

misissuinissamut, aallernissamut, pissarsinissamut, piareersarnissaanut imaluunniit

atornissaanut qinnuteqartup ingerlatassatut kissaatigisai tamarmiusut. Tassani qinnuteqartup

ingerlatassai kiisalu suliniummut qinnuteqartup angunigai, pingaarnertullu siunertai

pineqarput. Assersuutigalugu pisuussummik atuisinnaanermut periarfissanik misissuinerit,

sermimik aamma imermik pissarsineq, pisuussutiniq teknikkikkut suliaqarneq imaluunniit

niuernermik siunertamut atuneq pineqarsinnaapput.

Nr. 8

”Pisuussut” tassaavoq, sermeq imaluunniit imeq, matumani sumiiffik imaluunniit puilasq

pineqartoq akuersissut naapertorlugu atorneqarsinnaasoq imaluunniit atugassatut

qinnutigineqartoq ilanngullugu. ”Pisuussut” pinngortitami pisuussummut atorneqarusuttumut

tunngasoq, nassuiaatip erseqqissarpaa.

Nr. 9

”Piginnittussaataitaasoq” tassaavoq, inuk inatsisitigut pisinnaatitaasoq, Inatsisartut inatsisaat

manna malillugu akuersissummik tunineqartoq, taassumallu kingunerisaanik tassunga

atatillugu pisinnaatitaaffeqartoq aamma pisussaaffeqartoq, matumani akuersissummi piumasaqaataasut malinneqarnissaannut akisussaaffeqartoq.

Inatsisartut inatsisaanni § 11-mut, piginnittussaataitaasup ingerlatseqatigiiffiata ilusaanut aamma nalunaarsukkamik angerlarsimaffianut piumasaqaasiortumut aalajangersagaq innersuussivoq.

Nr. 10

”Atuineq” tassaavoq, pisuussutip pinngorfianit peerlugu, matumani aamma katersorlugu, iluaqutigalugu, suliaralugu imaluunniit allatigut atorlugu ingerlataq sunaluunniit. Nassuiaat siammasissumik paasineqassaaq, sermillu aamma erngup peernerinik kinguneqartumik iliuutsinut tamanut atuulluni. Piginnittussaataitaasup kingorna pisuussummik tunisinersoq nassuiaammut ”atuinermi” apeqqutaanngilaq. Taamaattoq atuineq imak paasineqassaaq, piffissaq pisuussutip tiguneqarfia, soorlu assersuutigalugu sermeq katersorneqarpat imaluunniit imeq ruujorikkoortillugu katersorneqarpat.

Nr. 11

”Atuinermi ingerlatat” tassaavoq, § 4 malillugu atuinissamut akuersissutitigut imaluunniit ingerlatassatut qinnutigineqarlutik ingerlatat, ingerlatassatut akuersissuteqarfiusut. Taamaalilluni atuinissamut ingerlatat, killiliussami pineqarput.

Nr. 12

”Aallartinnissamut piffissaliussaq” tassaavoq, Inatsisartut inatsisaat malillugu akuersissut naapertorlugu ingerlatassatut akuerisat aallartinneqarsimanissaannut ulloq kingusinnerpaaq, tak. § 21.

Nr. 13

”Atuinissamut akuersissut” tassaavoq, § 4, imm. 1 malillugu tunniunneqarluni niuernermik siunertaqartumik sermimik, imermillu atuinissamut akuersissut. Pisuussummik niuernermik siunertalimmik atuinissamut periarfissiilluni atuinissamut akuersissut, misissueqqaarnissamut akuersissummit immikkoortoq killiliussap ersarissarpaa.

### *§ 3-mut*

Imm. 1-imut.

Aalajangersakkap aalajangersarpaa, Inatsisartut inatsisaat malillugu akuersissummik tunniussisoqarsimatillugu sermeq, imerlu niuernermik siunertanut taamaallaat atorneqarsinnaasut, avammullu tunineqarlutik. Ilutigisaanik aalajangersakkatigut piumasaqaataavoq, Inatsisartut inatsisaata aalajangersagai aamma Inatsisartut inatsisaat

naapertorlugu piumasaqaataatitut akuersissummik aalajangersarneqartut naapertorlugit atuineq pissasoq.

Imm. 2-mut.

Aalajangersakkap Naalakkersuisut pisinnaatippai, Inatsisartut inatsisaat malillugu akuersissuteqarnissamik piumasaqaatitaqanngitsumik imermut, sersersuaqarfinnullu tunngasunik misissueqqaarnissamut aammalu nalunaarsuiffiusunik ilisimatuussutsikkut suliaassatigullu misissuisinnaassasut.

Inatsisartut inatsisaanni § 31 malillugu akuersissutitik tunniussinissami neqeroortitsinissaq sioqqullugu tamanna naleqqussinnavoq.

#### *§ 4-mut*

Imm. 1-imut.

Inatsisartut inatsisaat malillugu akuersissutit suut tunniunneqarsinnaaneritut sinaakkutit aalajangersakkap aalajangersarpai. Tassunga tunngatillugu aalajangersakkap aalajangersarpaa, sumiiffimmut erseqqinnerusumik killilersorneqartumut, piginnittussaataasup piumasaqaatit malitassai akuersissummi allassimallutik erseqqinnerusumik aalajangersarneqartut malillugit akuersissut tunniunneqassasoq.

Aalajangersagaq malillugu misissueqqaarnissamut akuersissutitik aamma atuinissamut akuersissutitik Naalakkersuisut tunniussisinnapput.

Atuinissaq aallartitsinnagu pisuussutip ilimanassusaannik misissuinissamut misissueqqaarnissamut akuersissutit periarfissiisarput. Misissueqqaarnissamut akuersissutit annertussusaat, § 5-imi ersarinnerusumik malittarisassiuunneqarput.

Atuinissamik akuersissutit, pisuussutip niuernermik siunertaqartumik atornissaanut akuersissuteqartitsivoq. Atuinissamut akuersissutit annertussusaat, § 6-imi ersarinnerusumik malittarisassiuunneqarput.

Inatsisartut inatsisaata kapitali 6-ia akuersissutitut piumasaqaataasunik ersarinnerusumik malittarisassiuussivoq, matumani sumiiffiup akuersissuteqarfiup § 19-imi killilersorneqarnera ilanngullugu. Piumasaqaatit taakkua akuersissummi aamma aalajangersarneqarsinnaapput. Taassumap saniatigut Naalakkersuisut akuersissummi piumasaqaatinik annerusunik aalajangersaanissaminut § 28-mi piginnaatinneqarput. Tassani akuersissutitut piumasaqaatit ersarinnerusumik misissorusussagaanni, tassunga tunngatillugu nassuiaatit innersuussutigineqarput.

Misissueqqaarnissamut akuersissutit aamma atuinissamut akuersissutit aallaavittut avammut tunisinissamut akuersissutitaqanngillat. Taakkua kapitali 4-mi aalajangersakkat malillugit

tunniunneqartarput. Tamanna ersarinnerusumik misissorusussagaanni, tassunga tunngatillugu nassuiaatit innersuussutigineqarput.

Imm. 2-mut.

Inatsisartut inatsisaat malillugu akuersissutit sermimut, imermullu immikkut tunniunneqarsinnaasut aalajangersakkat ersarissarpai. Sumiiffimmit aalajangersimasumit sermimik, imermillu atuinissaminut qinnuteqartoq akuersissummik tunineqarsinnaavoq. Sermimik imaluunniit imermik atuinissamut qinnuteqartoq akuersissummik aamma tunineqarsinnaavoq.

Pisuussut suna atussallugu kissaatigineqarneris apeqqutaatillugu avatangiisitigut, niuernermillu assigiinngitsunik eqqarsaatiginnittoqarsinnaammat, qinnuteqartup pisuussummik atuinissaminik toqqaanera atuinissami piumasaqaasiornissamut aalajangiisuvoq.

Imm. 3-mut.

Aalajangersagaq manna malillugu misissueqqaarnissamut akuersissut, atuinissamullu akuersissut ataatsimut akuersissutitut ataatsitut tunniunneqarsinnaavoq. Atuinissamut akuersissut, misissueqqaarnissamut akuersissutitaqartuaannarpoq.

Pingaarnertut malitassatut atuinissamut akuersissut, piumasaqaatitalerlugu atuinissamut akuersissutitut tunniunneqartassaaq. Imm. 4 aamma §§ 32-33 malillugit paasissutissat pisariaqartut, qinnuteqartup misissueqqaarnissamut akuersissuteqartariaqarluni ingerlatseqaartigani, pissarsinissaminut pisuni tamani periafissaqartussaannnginneranik tamanna patsiseqarpoq.

Piumasaqaatitalimmik atuinissamut akuersissut misissueqqaarnissamut akuersissutitaqarpoq, taassumallu piginnittussaataasup atuilluni ingerlatsinissaminik ersarinnerusumik pilersaarusiornissaminut atugassaminik misissueqqaarnissaamut kiisalu misissueqqaarnissamut akuersissummik aamma atuinissamut akuersissummik immikkut qinnuteqaqqaarani akuersissutini pisariaqartunik allanik pissarsinissamut paasissutissanik katersinissamut periafississavaa.

Taamaakkaluartoq atuinissamut ammaassinngitsumik immikkut misissueqqaarnissamut akuersissummik tunniussisoqarsinnaavoq. Tamanna pisuussut niuernermut atorneqarsinnaanersaq sulit paasineqarsimatinnagu imaluunniit nalornisoqartillugu naleqquppoq. Assersuutigalugu erngup pitsaassusaa imigassatut naleqqunnersaq iluamik paasineqarsimatinnagu, pilersaarummullu kissaatigisamut tunngaviuppat taamatut pisoqarsinnaavoq. Misissueqqaarnermut akuersissuteqarnikkut, sumiiffimmut aalajangersimasumut atuinissamut akuersissummik qinnuteqartoqassanersaq isummerfigineqartinnagu, qinnuteqartup pisariaqartumik misissuisinnaanissaanut tamanna qulakkeerivoq.

Ataatsimut akuersissummut atatillugu misissueqqaartoqarnissaanik, Inatsisartut inatsisaanni erseqqissumik piumasaqaasiortoqanngilaq. Misissueqqaarnissaq pisariaqartinneqassanngippat, akuersissutillu allat pisariaqartut pigigaanni, tassungalu piumasaqaataasut allat naammassisimagaanni atuineq aallartinneqarsinnaavoq. Tassani assersuutigalugu misissueqqaarnissamut immikkut akuersissuteqarluni siornatigut misissueqqaartoqarsimatilluguusinnaavoq. Atuinissamilli akuersissut piumasaqaatilik pineqartillugu tamanna atuutinngilaq. Tamanna pillugu § 16 nassuiaatit innersuussutigineqarput.

Imm. 4-mut.

Aalajangersakkap aalajangersarpaa, Naalakkersuisut qinnuteqaammik naliliinerminni pissutsit suut ilaattissinnaaneraat. Oqaatigineqassaaq, ingerlatassatut qinnutigineqartup annertussusaanut misissuinerit aamma naliliinerit naleqqussarneqarsimassammata.

Nr. 1

Sivitsuinnissamik naliliinermi inuiaqatigiinni aamma najukkami soqutigisat, matumani attaveqaasersuutit imaluunniit pisortat pilersuinerat Naalakkersuisut ilanngussinnaavaat.

Nr. 2

Qinnuteqaammik naliliinermi pisuussutip qanoq issusaa, piujuarnissaalu ilanngunneqarsinnaapput. Tassani avatangiisit eqqarsaatigalugit akisussaassuteqartumik aamma aningaasaqarnikkut illersorneqarsinnaasumik pisuussut atorneqarsinnaanersoq nalilerneqarsinnaavoq.

Nr. 3

Qinnuteqaammik naliliinermi nunamut imaluunniit kangerlummot, immamullu naatsorsuutigisamik kingunissai Naalakkersuisut pingaartissinnaavaat. Taamaalilluni § 29-mi malittarisassat malillugit piginnittussaataasup pinngortitamut kingunerisinnaasaanik naliliissasoq, taannalu tunniutissagaa piumasaqaatigineqarpoq. Pinngortitamut kingunerisinnaasaanik naliliinermi nunaminertaq qinnuteqarfigineqartoq naliliiffigineqassaaq.

Nr. 4.

Avatangiisinut imaluunniit inuussutissarsiutinut pissutsit allat Naalakkersuisut pingaartissinnaagaat aalajangersakkat aalajangerpaa.

Tassani assersuutigalugu tassaasinnaapput uumasunut imaluunniit naasunut immikkuullarissunut pissutsit imaluunniit najukkami attaveqaasersuutit, inuiaqatigiinnut tunngasut kiisalu akuersissutinut imaluunniit ingerlatanut allanut ataqatigiissaarineq.

Imm. 5-imut.

Misissueqqaarnissamut akuersissutitut aamma atuinissamut akuersissutitut Naalakkersuisut malittarisassanik ersarinnerusunik aalajangersaasinnaannut aalajangersakkap inatsisitigut tunngavissaqartippai.

Qinnuteqartariaatsinut, qinnuteqaatinik suliaqartarnermut kiisalu akuersissutit malinneqarnersut nakkutilliinnissamut inatsisitigut tunngavissaqarnermi ilaatigut periarfissiissutigineqarpoq. Uani assersuutigalugu soorlu ingerlataq qaqugukkut akuersissuteqassanersoq, qaqugukkut akuersissuteqartoqassanersoq, nakkutilliinerlu qanoq ingerlanneqassanersoq.

Qinnuteqaatip misissornissaani pingaaruteqarlutik inuiaqatigiinnut sunniutaasinnaasunik naliliinerup (VSB) naliliiffigineqarnissaa imaluunniit assingusumik naliliinerit pillugit piumasqaatinik aalajangersaanissamut periarfissaqarneq inatsisitigut tunngavissaqarnermi aamma ilaavoq.

### *§ 5-imut*

Imm. 1-imut.

Atuinissamik ingerlatsinissaq aallartinneqartinnagu imaluunniit atuinissamut akuersissummik qinnuteqartoqartinnagu sermimik, imermillu niuernerimik siunertaqartumik atuinissami piginnittussaataasooq teknikkikkut, aningaasatigut, avatangiisitigullu periarfissanik misissueqqaarnissamut periarfissillugu, misissueqqaarnissamut akuersissutitut sinaakkutissat aalajangersakkap aalajangersarpai.

Ingerlatsinerit pingaarnerit misissueqqaarnissamut akuersissummi ilaatinneqartut nr. 1-imit 3-mut nassuiaatigineqarput:

Nr. 1

Misissuinissaq siunertaralugu sermimik, imermillu annertussutsimik taasamik pissarsinissaq imaluunniit katersinissaq, soorlu assersuutigalugu piareersaanissaq, misiligummik nioqqutissiornissaq, najoqqutassiamillu misiliinissaq aalajangersakkap pisinnaatippaa. Assersuutigalugu sermeq aatsitassatut katersorneqarsinnaavoq, imigassatullu puujaasanut misiligummik maqitsisoqarsinnaalluni.

Ingerlatsinerit misissueqqaarnermut atatillugu pisarmata, nalinginnaasumik annikitsuinnaassaput.

Immikku ittumik misissueqqaarnissamik akuersissummik tunniussisooqassappat, misissueqqaarnissamik akuersissut atuinnissamik akuersissutaanngimmat misissueqqaarnissami annertuussusissaq, siunertarlu Naalakkersuisut eqqumaffigissavaat. Qinnuteqartoq annertuumik atuinissaminik qinnuteqarpat, tamanna ingerlatsineq atuinertaqartoq takussutaasinnaavoq. Taamatut pisoqartillugu malittarisassat

unioqqutinneqannginnissaat pillugu atuinnissamut akuersissuteqartoqartariaqannginnersoq nalilerneqartariaqarpoq.

Nr. 2

Pisuussutip ilisimanassusaanik naliliinissaq siunertaralugu teknikkikkut, imermik, serminillu misissuinnissaq aamma misissueqqissaarnissaq aalajangersakkami pineqarput. Uani soorlu sermip aamma erngup pitsaassusaata, katitigaanerisa, tikikkuminassusaasa, annertussusaasalu naliliiffigineqarnissaat ilanngullugu.

Assersuutigalugu imip pitsaassusaa misissoqqissaarumallugu, matumani mingutsitsissutaasinnaasut soorlu uumasuaqqat isaannarmik takuneqarsinnaanngitsut imaluunniit sananeqaatit minnerit (partikkilit) ilanngullugit, qillerinikkut sermimik imaluunniit imermik misissugassamik tigusinerasinnaapput.

Pilersaarutip suunera apeqqutaatillugu, soorlu assersuutigalugu sumiiffiup iluaqutigineqarsinnaasup tikikkuminassusaa imaluunniit allanngujuissusaa nalilerumallugu, nunap qanoq inneranik misissuissalluni aamma naleqqussinnaavoq.

Nr. 3

Nr. 1-mi aamma 2-mi allattorsimasut tamakkiisuunngitsut nr. 3-mik ersarissarneqarpoq. Ingerlatat imaluunniit misissuinerit nr. 1-mi aamma nr. 2-mi pineqanngitsut, pisuussutilli niuernerimi atornissaata pilersaarusiornissaanut, nalilerneqarnissaanullu pisariaqartut ingerlanneqarnissaannut aalajangersagaq periarfissiivoq.

Assersuutigalugu aalaakkaassuseq, pisuussuutillu ataavartumik atuisinnaanissaq nalilerimallugit sermip nikittarnerata imaluunniit silap pissusaata sunniutaasa nakkutigineqarnissaat pineqarsinnaavoq.

Oqartussat allat akuersinissaannut atugassanik atortussanik suliaqarnissamut misissuinerusariaqarsinnaasut aalajangersakkami pineqarsinnaapput. Pisut ilaanni assersuutigalugu pilersaarutit ilaat avatangiisinut sunniutigisinnaasaanik nalilersuinissamik piumasaqaammut ilaasinnaasarput.

Imm. 2-mut.

Misissueqqaarnissamut ingerlatassatut akuerisaasut misissueqqaarnissamut akuersissummi aalajangersarneqassasut aalajangersakkap aalajangersarpaa. Suliniutip qanoq ittuuneranut, pisariaqartitanullu akuersissutip naleqqussarneqarsinnaanissaanut tamanna periarfissiivoq. Assersuutigalugu misiligutissatut imeq qanoq annertutigisoq tiguneqarsinnaassasoq misissueqqaarnissamut akuersissutip ersarissarsinnaavaa.

Ingerlatat imaluunniit misissuinnissat pisariaqartut allat assersuutigalugu tassaasinnaapput teknologiitigut allannguutit, pissutsit najukkami attaveqaasersuutitut, inuiaqatigiinnut imaluunniit avatangiisinut tunngasut kiisalu akuersissutitut imaluunniit ingerlatanut allanut ataqatigiissaarineq.

Imm. 3-mut.

Misissueqqaarnissamut akuersissut malillugu ingerlatat suut ingerlanneqarsinnaaneritut Naalakkersuisut ersarinnerusunik malittarisassiorsinnaanissaannut aajangersakkap piginnaatippai.

Assersuutigalugu sermeq, imerlu misiligitissatut qanoq annertutigisut tiguneqarsinnaaneritut imaluunniit misissuinerit suut akuerisaaneritik malittarisassat killissanik aalajangersaasinnaapput.

### *§ 6-imut*

Imm. 1-imut.

Sermimik, imermillu niuernermik siunertaqartumik atuinissamut akuersissut sunik imaarsinnaaneritut sinaakkutit, § 6-imi aalajangersakkap aalajangersarpai. § 4, imm. 1 malillugu atuinissamut akuersissutip ataani ingerlatat suut akuersineqarsinnaanersut aalajangersakkat nassuiarpaa. Imaanngilaq ingerlatat allattorsimasut tamarmik atuinissamut akuersissummi pinngitsooratik ingerlanneqartussatut imaluunniit akuerisatut ingerlanneqassasut. Pissutsit, suliniutissatullu qinnutigineqartoq apeqqutaatillugit, ingerlatat suut atuinissamut akuersissummi ilaatinneqassanersut naliliinermik tunngaveqassaaq.

Nr. 1

Sermimik, imermillu katersinissamut, pissarsinissamut, piareersaanissamullu akuersissummik tunniussisoqarsinnaavoq. Sermeq, imerlu niuernermut atornissaannut piukkunnarsarumallugit isumalluutitissat pissarsinermi, pisariaqartumik suliarinissaanut aamma piareersarnissaanut ingerlatat ilanngullugit pineqarput.

Assersuutigalugu imermut imigassamut imaluunniit suliffeqarfissuarmi atornissaanut piimasaqaatit naammassineqarnissaat siunertarlugu imermik pissarsineq, saliinerlu ilaatinneqarsinnaapput.

Nr. 2

Sermip, erngullu piginnittussaataasup pisinnaatitsissummik akuersissummik pigisaqartup atornissaanut akuersissummik pissarsissutigisimasaata tuninissaannut akuersissummik tunniussisoqarsinnaavoq. Uani atuisunut toqqaannartumik tunisinerit kiisalu suliffeqarfinnut imaluunniit niuernermik ingerlatsisunut allanut tunisinerit ilaatinneqarput.

Tunisineq, pingaartumik iluaqutissatut atorneqarnera pillugu akuersissummi immikkut piimasaqaatinik aalajangersaasoqarsinnaavoq. Tamanna pillugu § 28-mut nassuiaatit takukkit.

Nr. 3

Kalaallit Nunaanni sermimik, imermillu nassiussuinissamut aamma assartuinissamut akuersissummik tunniussisoqarsinnaavoq. Uani pissarsiffimmit aamma piareersarfimmit

atuisunut assigiinngitsunut assartuineq ilaatinneqarpoq, uanilu suliniutip angisussaa, pisariaqartitailu apeqqutaatillugit nunap iluani aamma avataani assartueriaatsit pineqarsinnaallutik.

Assartuinissaq, matumani isumannaallisaaneq, nassiussalerineq, avatangiisitigullu eqqarsaatigisassat pillugit Naalakkersuisut piumasaqaatinik aalajangersaasinnaapput. Tamanna pillugu § 28-mut nassuiaatit takukkit.

Atuinissamut akuersissut tunuliaqutaralugu sermimik, imermillu atukkamut avammut tunisineq, avammut tunisinissamut immikkut akuersissuteqartariaqarput. Tamanna pillugu § 10-mut nassuiaatit innersuussutigineqarput.

Nr. 4

Aalajangersakkap uumap, siuliani immikkoortuni ersarinnerusumik nassuiarsimanngisatut sermip, erngullu niuernermik tunngavilinnut allatut atorsinnaatippai. Pisuussutip suliffeqarfinni, nunalerinermi imaluunniit nutaaliorluni niuernermut atorneqarsinnaanissaat pineqarsinnaavoq.

Imm. 2-mut.

Atuinissami ingerlatat aalajangersimasut akuerisaasut, atuinissamut akuersissummi pineqartumi aalajangersarneqassasut aalajangersakkap erseqqissarpaa. Taamaalilluni pissutsinut, piumasaqaatinullu suliniummut qinnutigineqartumut atuuttunut, akuersissut naleqqussarneqarsinnaavoq.

Imm. 3-mut.

Misissueqqaarnissamut akuersissut malillugu ingerlatat suut ingelanneqarsinnaaneritut, Naalakkersuisut ersarinnerusunik malittarisassiorsinnaanissaannut aalajangersakkap piginnaatippai. Tassunga atatillugu ingerlatanik aalajangersimasunik aamma inerteqquteqartoqarsinnaassaaq. Taamaalilluni ingerlatanut sunut atuinissamut akuersissuteqartoqarsinnaaneranut killissanik aalajangersaanissaannut Naalakkersuisut pisinnaatinneqarput,

### § 7-imut

Inatsisartut inatsisaat manna malillugu akuersissutinut tunniunneqartunut piginnittussaataitaasoq imaluunniit allat Inatsisartut inatsisaanni matumani pineqartut, inatsisit allat malillugit akuersissutinik pisariaqartunik pissarsinissaannut pisussaajunnaarsinneqanngitsut aalajangersakkap ersarissarpaa. Assersuutigalugu illuliortiternissamut, sanaartornissamullu suliniutinut ataasiakkaanut nunaminertamik atugassiissutinik pissarsisoqarnissaa pisariaqarsinnaavoq.

Taassumap saniatigut illuliortiternissamik, sanaartornissamilu annerusunik suliassani Naalakkersuisut akuersissuteqarnissaat kiisalu Avatangiisit illersorneqarnissaat pillugu

Inatsisartut inatsisaat aamma Imaani avatangiisit illersorneqarnissaat pillugu Inatsisartut inatsisaat naapertorlugit avatangiisinut sunniutissaasa naliliiffigineqaaqqaarnissaat (VVM) piumasaqaataasinnaavoq.

Inatsisartut inatsisaat manna malillugu atuinissamut akuersisummik tunniussisoqartinnagu suliniutip ingerlanneqarnissaanut akuersissutit allat pisariaqartut qinnutigineqarsimanissaat imaluunniit pigineqarnissaat pillugu erseqqissumik piumasaqaateqanngilaq.

Taamaakkaluartoq aallartinnissamut piffissaliussaq pillugu § 21-mi nassuiaatit innersuussutigineqarput. Kisianni suliniutip ingerlanneqarnissaanut pisariaqartumik akuersisummik tunniussisoqassanngitsoq oqartussap paasisutissiissutigippagu, siunnersuut manna malillugu atuinissamut akuersisummik tunniussisoqarsinnaassanngilaq, taamaattoqassappat suliniut teknikkikkut ingerlanneqarsinnaassanngitsoq isigineqarsinnaassammat, tak. siunnersuutip § 15-iani piumasaqaat.

### § 8-mut

Imm. 1-imut.

Pissutsit pineqartut, suliniutillu pivisunngortinneqarnissaanut pisariaqartitat apeqqutaatillugit, § 4 naapertorlugu atuinissamut akuersissut kismaassisussaataaffilerlugu imaluunniit kismaassisussaataaffilernagu tunniunneqarsinnaanissaanut aalajangersagaq periarfissiivoq.

Kismaassisussaataaffilerlugu atuneq tassaavoq, sumiiffimmi kismaassisussaataaffiusumi sermimik, imermillu niuerneramik siunertalimmik kismaassilluni atuinissamut kismaassineq.

Kismaassinerup kingunerisaanik, inatsit malillugu sumiiffimmut kismaanneqartumut misissueqqaarnissamut akuersissutinik imaluunniit atuinissamut akuersissutinik piginnittussaataasunut allanut tunniussisoqarsinnaanngilaq. Taamaattoq kismaassinissamik akuersisummik tunisisoqanngippat sumiiffimmut tassunga piginnittussaataasunut arlalinnut misissueqqaarnissamut, atuinissamullu akuersissutinik tunniussisoqarsinnaassaaq.

Sumiiffimmut ataatsimut piginnittussaataasunut arlalinnut atuisinnaanermik akuersisummik tunniussisoqassappat, piginnittussaataasup pisinnaatitaaffiinik tamanna annikillisisinnginnersoq Naalakkersuisut eqqumaffigisariaqarpaat.

§ 4 naapertorlugu atuinissamut akuersisummik tamarmut kismaassisussaataaneq tunniunneqassaaq, imaappoq ataatsimoortumik akuersisummik tunniussisoqartillugu misissueqqaarnissamut akuersisummik aamma atuinissamut akuersisummik Aalajangersagaq § 9-mut innersuussivoq, taassumallu kingorna § 4, imm. 3 malillugu immikkut ittumik misissueqqaarnissamut akuersisummik kismaassisussaataaffilerlugu tunniunneqarsinnaassanani

Imm. 2-mut.

Sumiiffimmut sermimik imaluunniit imermik atuiffissatut akuersissuteqarfigineqarsimasumut tamarmut imaluunniit ilaanut kisermaassisussaatitaaneq tunniunneqassasoq aalajangersakkap ersarissarpaa.

Atuinissamut akuersissutip sumiiffiata iluani taamaallaat kisermaassisussaatitaaffilerlugu akuersissummik tunniussisoqarsinnaavoq. § 19-imut nassuiaatit innersuussutigineqarput.

Kisermaassisussaatitaaneq sumiiffimmut killilersukkamut attuumassuteqarmat, piginnittussaatitaasut allat pisuussummut pineqartumut kisermaassisussaatitaaffilerlugu imaluunniit kisermaassisussaatitaaffilernagu akuersissummik pissarsisinaanissaat aalajangersakkap mattutinngilaa. Assersuutigalugu taserujussuaq imaluunniit kuussuaq. Nunatami angisuumi atuinissamut periarfissagissaartumi pisuussummi atorneqarsinnaasut assigiinngitsut atornissaannik ingerlatsisut arlaqartut kissaateqartillugit, tamanna pingaaruteqarsinnaavoq. Piginnittussaatitaasumut pisuussummik tamakkerlugu atuisinnaanngitsumut ataasiinnarmut atuinissamut akuersissummik tunniussisoqarsinnaanissaa pinngitsoortinniarlugu, nunaminertamik inniminneisinnaaneq uani eqqarsaatigineqarpoq.

Imm. 3-mut.

Sermimik, imermillu atuinissamut qaqugukkut kisermaassisussaatitaaffilerlugu akuersissummik tunniussisoqarsinnaaneranut imm. 3 pingaarnertut piumasaqaasiivoq. Teknikkimut tunngasut, inuiaqatigiillu soqutigisaat, piujuartitsisussamik atuinissaq, imaluunniit suliniutip naleqquttumik ingerlanneqarsinnaassanngikkaluartup piviusunngortinneqarnissaanut pisariaqartillugu kisermaassisussaatitaaneq taamaallaat tunniunneqarsinnaasoq aalajangersakkap ersarissarpaa. Taamaalluni kisermaassisussaatitaaneq immi inatsisitigut piumasaqaataanilu aallaaviunngilaq, taamaattorli pisuussut iluatsittumik atorsinnaaqqullugu kisermaassisussaatitaanermik tunniussinissamut pissuteqarsinnaavoq.

Kisermaassisussaatitaaffilerlugu imaluunniit kisermaassisussaatitaaffilernagu akuersissummik tunniussisoqassanersoq Naalakkersuisut naliligassaraa. Tamatumani qinnuteqaatit ataasiakkaat, suliniutillu qanoq issusii tunngavigalugit naliisoqartassaaq. Qinnuteqartoq kisermaassinissaminik qinnuteqarsimatinnagu, nalinginnaasumik kisermaassisussaatitaaffilerlugu akuersissummik tunniussisoqartassanngilaq. Taamakkaluartoq tassunga atatillugu Naalakkersuisut qinnuteqaammik pituttorsimassanngillat.

Imm. 4-mut.

Kisermaassisussaatitaanermut Naalakkersuisut immikkut piumasaqaatinik aalajangersaanissaannut aalajangersakkap piginnaatippai. Piumasaqaatit atuinissamut akuersissummi aalajangersarneqassapput.

Assersuutigalugu Kisermaassisussaatitaanerup piujuartitsinissamik, nammassisaqarsinnaanermik, inuiaqatigiillu soqutigisaannik illersuisinnaanermik

siuarsaataasumik atorneqarnissaanik piumasaqaatinik qulakkeerisussat, atuinissamut piumasaqaatit ilaatinneqarsinnaapput.

Pisariaqanngitsumik nunaminertamik inniminniinissap pinngitsoortinneqarnissaa eqqarsaatigalugu, kismaassissusaatitaanerup atatiinnarneqarnissaanut aamma piumasaqaatinik aalajangersaasoqarsinnaavoq. Soorlu assersuutigalugu kismaassissusaatitaaneq atatiinnarumallugu sermimik, imermillu ersarinnerusumik taasamik atuisoqassasoq piumasaqaataasinnaapput. Piginnittussaatitaasoq pisuussummik atuinngikkuni imaluunniit killilimmik atuiguni pisariaqanngitsumik nunaminertamik inniminniineq pineqarsinnaavoq, taamaattoqartillugumi qinnuteqartut allat sumiiffimmi pineqartumi kismaassissusaatitaaneq patsisaalluni pisuussummik atuinissaannut akornuserneqassammata.

Allat namminneq atugassamittut imaluunniit siunertanut allanut pisuussummik atuisinnaaneriniq ersarissaasunik immikkut aamma piumasaqaasiortoqarsinnaavoq. Sumiiffik akuersissuteqarfik illuaraqarfimmiikkuni imaluunniit allanit pisuussummik sulit atuisussanik atorneqaruni tamanna naleqqussinnaavoq.

Imm. 5-imut.

Kismaassissusaatitaaneq qanoq, qaqugukkullu tunniunneqarsinnaanera pillugu, aalajangersakkap Naalakkersuisut ersarinnerusunik malittarisassiorsinnaatippai. Uani assersuutigalugu qaqugukkut kismaassissusaatitaaffilerlugu akuersissummiq tunniussisoqarsinnaanera pillugu § 8, imm. 3-mi piumasaqaatinik imaluunniit tunniussinissami pingaarnersiuinissami piumasaqaatinik ersarissaallutik malittarisassaasinnaapput.

#### *§ 9-mut*

Imm. 1-imut.

§ 4, imm. 3 malillugu misissueqqaarnissamut immikkut akuersissut, kismaassissusaatitaaffilerlugu tunniunneqarsinnaanngitsoq aalajangersakkap aalajangersarpaa. Misissueqqaarnissamuinnaq akuersissuteqartoqarpat, misissueqqaarnissamut pisinnaatitsissut immikkuullarissanngilaq. Ingerlatsisut allat sumiiffimmi tassani Inatsisartut inatsiaat malillugu akuersissummiq tunineqarsinnaassapput.

§ 8 naapertorlugu sumiiffimmi pisuussummik misissueqqaarnissamut aamma atuinissamut akuersissummut ataatsimoortumut ilaatillugu, kismaassissusaatitaaneq taamaallat tunniunneqarsinnaavoq.

#### *§ 10-mut*

Imm. 1-imut.

§ 4 malillugu akuersissut naapertorlugu sermip, erngullu atorneqartup avammut tunineqarnissaannut avammut tunisinissamut akuersissummik Naalakkersuisut tunniussisinnaasut aalajangersakkap aalajangersarpaa. Taamaalilluni misissueqqaarnissamut akuersissummut aamma atuinissamut akuersissummut avammut tunisinissamut akuersissummik tunniussisoqarsinnaavoq.

Avammut tunisinissamut akuersissummik tunisinissamik, avammut tunisinissaq Kalaallit Nunaata aningaasaqarneranut, inuiaqatigiinnilu soqutigisanut, matumani pilersuinerup isumannaassusaa ilanngullugu, naleqqutissasoq siunnersuummi pingaarnertut piumasaqaatigineqarpoq. Tamatuminnga Naalakkersuisut naliliissapput. Taamaalilluni piginnittussaataasup avammut tunisinissamut akuersissummik tunineqarnissaa inatsisitigut piumasaqaataanngilaq. Ilutigisaanik piumasaqaatit naammassineqarnersut nalilersugassaassaaq.

Avammut tunisinissamut immikkut piumasaqaatinik, avammut tunisinissamut akuersissummi aalajangersaasoqarsinnaavoq. Assersuutigalugu akiliutissanut piumasaqaatit, teknikkikkut isumannaallisaanermullu tunngasut, pitsaassutsimut tunngasut, uppersaasiisarnermullu tunngasinnaapput. Tassunga tunngatillugu §§ 24-mi aamma 28-mi nassuiaatit innersuussutigineqarput.

Avammut tunisinissamut akuersissut § 4 malillugu akuersissummut atavoq. § Taamaalilluni 4 malillugu akuersissummi piumasaqaataasut ataqqineqassapput. Assersuutigalugu annertussutsit atugassatut akuerisaasut pillugit § 4 malillugu akuersissummi aalajangersaasoqarsimappat, annertunerusumik avammut tunisisoqarnissaanut akuersissummik tunniussisoqarsinnaanngilaq. Taamaakkaluartoq avammut tunisinissamut piumasaqaatinik allanik, avammut tunisinissamut akuersissummi aalajangersaasoqarsinnaavoq.

§ 4 malillugu akuersissummi piumasaqaataasut naapertorlugit avammut tunisineq pissaaq. Avammut tunisineq suliniutip nassuiaataanit annertuumik allaaneruppat, § 4 malillugu akuersissummi piumasaqaatit allanngortissallugit imaluunniit ilassuteqarfigissallugit pisariaqarsinnaassaaq.

Avammut tunisineq Kalaallit Nunaata aningaasatigut, inuiaqatigiitsigullu soqutigisaannut naleqqutinngippat, ajoqusiisinnaappallu avammut tunisinissamik qinnuteqaammik Naalakkersuisut itigartitsisnaapput.

Piumasaqaataasut naammassineqarnersut naliliinermi tunngavigineqassaaq. Ilaatigut avammut tunisinissaq suliffissaqartitsiniarnermut, atukkatigut naligiissitsinissamut, kulturikkullu pingaartitanut tapertaassanersoq imaluunnit sunniuteqassanersoq kiisalu Kalaallit Nunaanni sermimik, imermillu niuernermik tunngavilimmik atuinertup ineriartortinneqarnissaanut

tunngavissiinersoq naliliinissamut ilaatinneqarsinnaavoq. Taassumap saniatigut avammut tunisineq immikkoortortami aningaasaliinernut piusunut imaluunniit periarfissaasunut, assersuutigalugu niuernermi akornusiinikkut imaluunniit naleqqutinngitsumik unammilleqatigiissitsinermik pilersitsinikkut sunniuteqarnerlussanersoq isiginiarneqarsinnaavoq, soorluttaaq avammut tunisineq Kalaallit Nunaanni inuussutissarsiutinut piusunut imaluunniit periarfisaasunut allanut sunniuteqarnerlussanersoq isiginiarneqarsinnaasoq.

Avammut tunisinerup inuiaqatigiinnut kingunissaanik naliliinermi, avammut tunisineq nunat imaluunniit inuit pillaatitut iliuuseqarfigineqarsimasunik ilaatitsinersoq, tamannalu Kalaallit Nunaata nunat tamalaat akornanni atassuteqaataannut kingunerlussanersoq, aningaasatigut imaluunniit politikikkut kinguneqassanersoq imaluunniit nunat tamalaat akornanni pillaaasisitsissutinik unioqqutitsinerussanersoq aamma isiginiarneqarsinnaavoq.

Pisut apeqqutaatillugit, pissutsit pingaaruteqartut allat naliliiniarnermi ilaatinneqarsinnaapput.

Avammut tunisineq sumiiffimmi pilersuinerup isumannaatsuuneranut assersuutigalugu imermik pilersuinerup, suliffeqarfimmut atatillugu imaluunniit attaveqaasersuutinut pisariaqartunut imeqarfiit pisariaqartut annikkillinerisigut imaluunniit atornissaannut aarlerinartumik sunniuteqassappat, avammut tunisinissamut akuersisummik tunniussisoqarsinnaanngilaq. Tamanna pisuussutip atorsinnaaneranik, pisuussutillu sumiiffiup qanitarisaani atorneqarnissaanut pisariaqaassutsip nalilerneqarneranik tunngaveqassaaq. Pilersuinerup isumannaassusaa, avammut tunisinissamut akuersisummik piffissami tunniussivimmi nalilerneqassaaq.

Imm. 2-mut.

Avammut tunisinissamut akuersissut, avammut tunisinissamut immikkut akuersissutitut imaluunniit akuersisummut piusumut ilassutitut atunniunneqassasoq aalajangersakkap aalajangersarpaa. Piginnittussaataasup nunamut tunitsiviusumut, assartorneqarneranilu takutissinnaasamik uppersaateqarnissaa siunertaavoq.

§ 4 malillugu akuersisummik tunniussinerup ilutigisaanik, avammut tunisinissamut akuersissut tunniunneqarsinnaavoq. Taamaalilluni suliniutini avammut tunisinissaq tunngaviusussaatiillugu, § 4 malillugu akuersisummik qinnuteqarnermut ilaatillugu avammut tunisinissamut akuersisummik qinnuteqartoqarsinnaavoq.

§ 4 malillugu akuersisummut piginnittussaataasooq avammut tunisinissamut akuersisummik kingusinnerusukkut aamma qinnuteqarsinnaavoq. Taamatut pisoqartillugu avammut tunisinissamut akuersisummi piumasaqaatit immikkut isiginiarneqassapput. Akuersisummut piumasaqaatinut allannguutit imaluunniit ilassutit pisariaqarsinnaapput.

Imm. 3-mut.

Qaammatisiutit ukiuisa naaneri tamaasa qinnuteqarnikkut avammut tunisinissamut akuersissut nutarterneqartassasoq aalajangersakkap aalajangersarpaa. Taamaalilluni akuersissut immini nutarterneqarneq ajorluni, piffissaligaasumik akuersissut pineqarpoq.

Akuersissutini paasissutissat, matumani avammut tunisinerup annertussusaa, siunertaa, avatangiisinullu tunngasut ilanngullugit, ataavartumik nutarterneqartarnissaat ukiumoortumik nutarterneqartarnissaanik piumasaqaatip qulakkiissavaa.

Taamaakkaluartoq § 4 malillugu akuersissummut ilaatillugu piginnittussaatitaasup sermimik, imermillu avammut tunisinissamut akuersissummik tunineqarneranit siusinnerpaamik qaammatit arfinillit qaangiunnerini ukiumoortumik nutartarinissamik piumasaqaat atuutissaaq. Assersuutigalugu avammut tunisinissamut akuersissut siulleq oktobarip qaammataani tunniunneqarsimappat, avammut tunisinissamut akuersissut siusinnerpaamik qaammatisiutit ukiuata tulliaata naanerani nutarterneqassaaq. Taassumap kingorna avammut tunisinissamut akuersissutit nutarterneqartut, qaammatisiutit ukiuata naanerani nutarterisarnissamik pingaarnertut malittarisassaq malissavaat.

Nutarterineq qinnuteqarnikkut pissaaq, siullermeertumillu qinnuteqarnermi suleriaaseq aamma piumasaqaatit malillugit suliarineqassalluni, tak. § 34, imm. 3.

Imm. 4-mut.

Avammut tunisinissamut akuersissutini tunniussisarnernut malittarisassanik ersarinnerusunik Naalakkersuisut aalajangersaanissaannut aalajangersakkap piginnaatippai. Tamanna avammut tunisinissamut akuersissutit ilusissaannut malittarisassanut tunngasinnaavoq, matumani avammut tunisinissamut akuersissutini oqaatsinut, imarisassaannut, ilusissaannullu piumasaqaatit imaluunniit avammut tunisinissamut akuersissummi saniatigut piumasaqaatit ilanngullugit.

Avammut tunisinissamut malittarisassanik aalajangersaanissamut Naalakkersuisut aalajangersakkatigut piginnaatinneqarput, matumani immikkut ittumik pisoqartillugu avammut tunisinissamut killilersuutini aalajangersaanissaq imaluunniit inerteqquteqarnissaq ilanngullugit. Tamanna avammut tunisineq assersuutigalugu politikkikkut imaluunniit aningaasatigut killilersuutinut, avatangiisinut tunngasunut imaluunniit pilersuinermi isumannaassutsimut atatillugu Kalaallit Nunaata aningaasaqarnikkut imaluunniit inuiaqatigiit soqutigisaannut aarlerinarsinnaatillugu pisariaqarsinnaavoq. Avammut tunisineq Kalaallit Nunaata nunat tamalaat akornanni atassuteqaataanik ajoqusiisnaappat imaluunniit aningaasatigut, politikkikkut imaluunniit avatangiisitigut aarlerinarsinnaappat inerteqquteqarnissaq aamma pingaaruteqarsinnaavoq.

*§ 11-mut*

Inatsisartut inatsisaat manna malillugu aktianik piginneqatigiiffinnut imaluunniit piginneqataassuteqarluni ingerlatseqatigiiffinnut, Kalaallit Nunaanni angerlarsimaffeqartunut akuersissutinik taamaallaat tunniussisoqarsinnaavoq.

Aktianik piginneqatigiiffiit aamma piginneqataassuteqarluni ingerlatseqatigiiffiit tassaapput ingerlatsiviit aningaasaliiffiusut, taakkulu Aktie aamma anpartsselskabit pillugit inatsisip Kalaallit Nunaanni atulersinnera pillugu danskit peqqussutaanni (ingerlatseqatigiiffinnut inatsit) Kalaallit Nunaanni ingerlatsivinnut aningaasaliiffiusunut inatsimmut ilaallutik.

Aktianik, piginneqataassuteqarlunilu ingerlatseqatigiiffiit misissueqqaarnissamut, atuinissamullu akuersissummik kisimik qinnuteqarsinnaanissaanni aamma akuersissummik tunineqarsinnaanissaanni, ingerlatseqatigiiffinni taakkunani aalajangersimasuni malittarisassiuussinissamut, matumani aamma nalunaarsuinissamut tunngaviusunik piumasaqaasiornissaq qulakkiissallugu siunertaavoq.

Taakkua saniatigut aalajangerneqarpoq, ingerlatseqatigiiffik piginnittussaataasooq Kalaallit Nunaanni inuussutissarsiutinik ingerlatsisutut nalunaarsorsimassasooq. Tassunga malittarisassat atuuttut malillugit imaappoq, ingerlatseqatigiiffik CVR-imi nalunaarsorsimassasooq. Ingerlatseqatigiiffiup akileraarutitigut nalunaarusiornissaa ilaatigut eqqarsaatiglaugu tamanna piumasaqaataavoq.

”Angerlarsimaffeqartunut” pineqartillugu, ingerlatseqatigiiffinnut inatsimmi aamma Aningaasarsianit akileraarutit pillugit Inatsisartut inatsisaanni nassuiaatit innersuussutigineqarput. Taassumap kingunerisaanik, Kalaallit Nunaanni aningaasaliilluni ingerlatsivinnut aamma akileraartussaataaneq pillugu malittarisassat atuuttut naapertorlugit, ingerlatseqatigiiffiit Kalaallit Nunaanni angerlarsimaffeqartutut Qitiusumik Suliffeqarfinnik Nalunaarsuiffimmi nalunaarsorsimassapput.

Inunnut, suliffeqarfinnut inunnit nammineq pigineqartunut, immikkoortortaqaarfinnut imaluunniit ingerlatseqatigiiffimmut nunani allani angerlarsimaffilinnut akuersissutinik tunniussisoqarsinnaanngilaq.

Ingerlatseqatigiiffittut iluseqarnissamut, sumilu angerlarsimaffeqarnissamut piumasaqaataasut piffissami akuersissuteqarfiusumi tamarmi piginnittussaataasup naammassisimassavai. Tassunga tunngatillugu § 14-imut nassuiaatit innersuussutigineqarput.

Akuersissummik qinnuteqaatip tunniunnerani, piumasaqaataasooq naammasseqartoq qinnuteqartup uppersassavai. Qinnuteqaatip imarisassanut piumasaqaatit pillugit § 32-mi nassuiaatit innersuussutigineqarput.

Ingerlatseqatigiiffik inuuussutissarsiutitigut ingerlatsinini aqqutigalugu Kalaallit Nunaannut ilumut attaveqarnissaa aamma Kalaallit Nunaanni sermimik, imermillu niuernermi atuinnermit isertitanik akileraarusineq Namminersorlutik Oqartussanut tunnissaa, Kalaallit Nunaanni angerlarsimaffeqarnissamik piumasaqaat ilaatigut qulakkeerinneqataassaaq. Kalaallit Nunaanni Namminersorneq pillugu inatsimmi § 7-imi isertitat nassuiarneqarnerinut naapertuuppoq.

### *§ 12-imut*

Aalajangersagaq piginnittussaatitaasumut, taassumallu aningaasaqarnikkut inissisimaneranut piumasaqaasiivoq.

Pisuni ataasiakkaani aningaasaqarnermut tunngatillugu piumasarineqartuni ingerlatap annertussusaa, ataqatigiinnera, aarlerinassusaa il.il. apeqqutaassapput. Ingerlatat annertuussusaata, qanoq issusaata, akuersissullu aalajangersimasooq malillugu piginnittussaatitaasumut piumasaqaataasut akornanni naleqqutsitsinissaaq anguniarneqarpoq. Atuinissamut akuersissut malillugu ingerlatat, misissueqqaarnissamut akuersissummut sanilliullugit annertunerujussuarnik, pingaaruteqarnerusunillu pisussaaffeqartussaammata, misissueqqaarnissamut akuersissut malillugu piginnittussaatitaasumut sanilliullugu piginnittussaatitaasup aningaasatigut piginnaasaanut piumasaqaatit sakkortunerusariaqarput.

Piffissaq akuersissuteqarfiusooq tamakkerlugu piumasaqaatit naammassineqarsimassapput. Tassunga tunngatillugu § 14-imut nassuiaatit innersuussutigineqarput.

Akuersissummik qinnuteqaatip tunniunnerani, piumasaqaataasooq naammassineqartoq qinnuteqartup uppersarsassavaa. Qinnuteqaatip imarisassaanut piumasaqaatit pillugit § 32-mi nassuiaatit innersuussutigineqarput.

### *Imm. 1-imut.*

Inatsisartut inatsisaat malillugu piginnittussaatitaasooq akuersissummut pigisaqartoq akiliisinnaassuseqassasooq, pigisaminullu aamma aningaasaatiminut tamakkiisumik atuisinnaassasooq piumasaqaataavoq. Piginnittussaatitaasooq akiliisarnerminik unitsitsisimappat, akiliisinnaajunnaarsitaasimappat, pinngitsaaliissummik atorunnaarsitaasimappat, allatigulluunniit taakkununga nallersuunneqarsinnaasunik inissisimappat, piumasaqaataasooq naammassineqarsimassanngilaq.

Inatsisartut inatsisaat malillugu akuersissutit inuinnarmut tunniunneqaratik taamaallaat aktianik piginneqatigiiffimmut tunniunneqarsinnaammata, tak. § 11, aningaasaqarnermut tunngatillugu piumasaqaatit ingerlatseqatigiiffiup naammassisassarai. Taamaalilluni ingerlatseqatigiiffimmi peqataasut, matumani aamma piginnittuviit aningaasaqarnerinut tunngasut imm. 1-imi piumasaqaatinut attuumassuteqanngillat. Taamaattoq

iginnittussaataitaasut aqutsisuinut aamma piginnittuviinut piumasaqaatit pillugit imm. 3-mut nassuiaatit innersuussutigineqarput.

Imm. 2-mut.

Piginnittussaataitaasoq akilersimanngisaminik 100.000 koruuninik imaluunniit amerlanerusunik Kalaallit Nunaanni pisortani oqartussanut akiitsoqassanngitsoq, imm. 2-mi ersarissarneqarpoq.

Piginnittussaataitaasut akuersissummik pissarsisut aningaasatigut akisussaassuseqarnissaat, ingerlatamullu akuersissuteqarfiusumut sunniuteqarsinnaasumik aningaasatigut ajornartorsiuteqarnermik ersersitsisinnaasumik, pisortanut akilersimanngisaminnik akiitsoqannginnissaat aalajangersakkap taassumap qulakkiissavaa.

Piumasaqaat ingerlatseqatigiiffimmut akuersissummik tunineqartumut atuuppoq. Tassunga atatillugu piginnittut pisortanut akiitsorisinnaasai sunniuteqassanngillat.

Imm. 3-mut.

Piginnittussaataitaasoq aamma pisinnaatitsissummik pigisaqartup aqutsisui kiisalu piginnittuviit ilanngullugit – inaarutaasumik eqqartuunneqarnermikkut aningaasatigut pinerluttuliorsimasutut eqqartuunneqarsimanngissaannik imm. 3-mi aalajangersagaq piumasaqaasiivoq. Imaappoq, inuit pinerluttuliorsimasutut taamatut eqqartuunneqarsimasut ingerlatseqatigiiffiup ingerlataannut akisussaasuusinnaanngillat imaluunniit suliffeqarfiup akuersissummik qinnuteqartup ingerlatsineranut akulerussimassanatik. Taassumap saniatigut arlaannaalluunniit suliffimmik ingerlatsisinnaajunnaarsinneqarsimassanngilaq, ingerlatseqatigiiffiulluunniit ingerlatsineranut sunniuteqarsinnaasunik allatigut killilersorneqarsimassanatik.

Tassunga atatillugu "aqutsisut" tassaapput aqutsinermut pingaarnertut akisussaaffeqarlutillu aalajangiisinnaatitaasut, matumani qullersaqarfimmiut, siulersuisut, teknikkikkullu aqutsisut ilanngullugit. Ingerlatseqatigiiffiup akuersissutaannut, piumasaqaatillu malinneqarnissaannut sunniuteqarsinnaallutik ingerlatseqatigiiffiup qullersai ilaatinneqarput. Taamaalilluni akunnerani aqutsisut, teamlederit, allalluunniit ulluinnarni ingerlatsinermut assigisaanulluunniit akisussaaffeqartut aalajangersakkami ilaatinneqanngillat.

Aningaasatigut pinerluttuliorsimanernut assersuutitut taaneqarsinnaasut taassapput peqquserlunneq, imminut paarititanik peqquserluuteqarneq, allat sinnerlugit iliuuseqarsinnaatitaanermi peqquserlunneq, akiitsoqarluni peqquserlunneq, akileraarutitigut peqquserlunneq, pinerlunnikkut aningaasarsianik malunnarunnaarsaaneq, allatigulluunniit aningaasatigut peqquserlunnerit.

### *§ 13-imut*

Piginnittussaatitaasup akuersissut malillugu ingerlatassanik ingerlatsisinnaanissaminut pisariaqartunik suliamut paasisimasaqarnissaa, aalajangersagaq piumasaqaasiivoq. Taassumap kingunerisaanik ingerlatanut akuersissut malillugu ingerlanneqarsinnaatitaasunut ingerlatsisinnaanissamut piginnittussaatitaasup pisariaqartumik suliatigut ilisimasaqassaaq, misilittagaqassaaq, piginnaasaqarlunilu. Paasisimasaqarnissaaq pillugu piumasaqaat teknikkikkut ilisimasaqarnissamut, niuernerimik paasisimasaqarnissamut aamma inatsisitigut, malittarisassiuussanullu naleqquttumik ilisimasaqarnissamut tunngassuteqarsinnaavoq, taamaalilluni ingerlatsinerit illersorneqarsinnaasumik, malittarisassanullu atuuttunut naapertuuttumik ingerlanneqarsinnaatillugit.

Pisariaqartumik piginnaasassatut taaneqarsinnaasut tassaapput akuersissummi pineqarlutik pisuussutitut pineqartunut ilisimasaqarneq, assersuutigalugu sermimik aamma imermik atuinissamut ilisimasaqarneq, niuerfimmuut pineqartumut ilisimasaqarneq, ingerlatanullu avatangiisitigut aamma aningaasatigut piumasaqaatinut ilisimasaqarneq.

Imaanngilaq piginnittussaatitaasoq suliffeqarfiup iluani paasisimasassanut tamanut nammineerluni paasisimasaqassasoq. Siunnersortit imaluunniit suleqatigisat aqqutigalugit naleqquttumik ilisimasassat ilisimanissaat qulakkeersimagaanni, piumasaqaat naammassineqassaaq. Pisumi aalajangersimasumi paasisimasaqartariaqarnermi ingerlatap annertussusaa, ataqatigiinnera, aarlerinarnera il.il. apeqqutaassapput.

Akuersissummik qinnuteqaatip tunniunnerani, piumasaqaataasoq naammassineqartoq piginnittussaatitaasup uppersarsassavaa. Qinnuteqaatip imarisassaanut piumasaqaatit pillugit § 32-mi nassuiaatit innersuussutigineqarput.

#### *§ 14-imut*

##### **Imm. 1.**

Piginnittussaatitaasup piffissaq akuersissuteqarfiusoq tamakkerlugu §§ 11-13-imi piumasaqaatit naammassissagai, § 14, imm. 1-imi aalajangersakkap aalajangersarpaa. Imaappoq, piffissami akuersissutip tunniunneqarfiani, aammali akuersissutip piffissaq atuuffia tamakkerlugu ingerlatseqatigiiffittut iluseqarnissamut, sumilu angerlarsimaffeqarnissamut piumasaqaataasut, aningaasatigut piumasaqaataasut, pisariaqartumik paasisimasaqarnissamut piumasaqaataasoq piginnittussaatitaasup naammassissagai.

Piginnittussaatitaasumut piumasaqaat ataaseq, arlallilluunniit piginnittussaatitaasup naammassiunnaarpagit, § 38, nr. 1-imi aalajangersakkat malillugit akuersissut utertinneqarsinnaavoq. Taamaalilluni assersuutigalugu ingerlatseqatigiiffik akuersissummik tunineqarsimasooq pinngitsaaliisummik atorunnaarsinneqarsimaguni,

akiliisinnaajunnaarsimaguni assigisaanilluunniit aqqusaagaqaruni. Assinganik aamma piginnittussaataitaasoq nunamut allamut nuuppat. Ersarinnerusumik misissornissaannut §§ 11-13 aamma § 38, nr. 1-imut nassuiaatit innersuussutigineqarput.

Utertitsisoqartinnagu § 39-mi malittarisassat qimerloorneqaqqaassapput, taamaalilluni piginnittussaataitaasup utertitsinissamut tunngavissiisup iluarsineqarnissaanut piffissalernerqassalluni. Taassuma saniatigut ingerlatsinermut inatsimmi malittarisassat nalinginnaasut naapertorlugit, pisumi tassani utertitsineq naleqquttumik kinguneqartitsinerunersoq nalilerneqassaaq. Assersuutigalugu piginnittussaataitaasoq pisortanut 100.000 koruunit sinnerlugit akiitsoqarluni aningaasatigut unammillernartoqassappat, ajornartorsiut qaangiuttussaasoq nalilerneqarpat, utertitsinissaq naleqqutitsinngitsutut nalilerneqassaaq.

Imm. 2-mut.

Piginnittussaataitaasumut §§ 11-13-imi piumasaqaatinik itisiliisunik, Naalakkersuisut ersarinnerusunik malittarisassiorsinnaanissaannut imm. 2-mi aalajangersagaq pisinnaatitsivoq. Uani assersuutigalugu tassaasinnaapput ilinniarsimassuseq, misilittakkat, allagartat imaluunniit piginnaasat naleqquttut allat pillugit pisinnaatitsissummik pigisaqartup imaluunniit taassumap sulisuisa naammassisassaar piumasaqaatit aalajangersimasut.

### *§ 15-imut*

Imm. 1-imut.

Naalakkersuisut atuinissamut akuersissummik tunniussitinnagit, suliniut teknikkikkut aamma aningaasatigut ingerlanneqarsinnaasoq qinnuteqartup qularnarunnaarsissagaa, aalajangersagaq suliniummut pingaarnertut piumasaqarpoq.

§ 4 malillugu atuinissamut akuersissutit aalajangersakkami ilaatinneqarput. § 5, imm. 1 malillugu misissueqqaarnissamut akuersissummik atatillugu ilaatigut uiginnittussaataitaasup sermimik, imermillu atuinissamut teknikkikkut, aningaasaqarnikkullu periarfissanik misissuisinnaanissaa siunertaammat, § 4, imm. 3 malillugu misissueqqaarnissamut immikkut akuersissutit piumasaqaammik ilaatinneqanngillat. Taassuma saniatigut aalajangersagaq § 16, imm. 1-imut atasutut isigineqassaaq, taassuma kingorna piumasaqaatitalerlugu atuinissamut akuersissummik tunniussisoqarsinnaammat. Piginnittussaataitaasoq piumasaqaatitalimmik atuinissamut akuersissutaatilik, naak suliniut teknikkikkut, aningaasaqarnikkullu ingerlanneqarsinnaasoq qularnarunnaarsinneqarsimanngikkaluartoq, § 16, imm. 2 malillugu misissueqqaarsinnaavoq. Piumasaqaatitalimmik atuinissamut akuersissutit pillugit malittarisassat ersarinnerusumik misissornissaanut § 16-imut nassuiaatit innersuussutigineqarput.

Teknikkikkut aamma aningaasatigut ingerlanneqarsinnaanissaanik piumasaqaat naammassineqarnersoq paasiumallugu, suliniummik tamarmik naliliinermik tunngaveqassaaq.

Suliniut teknikkikkut ingerlanneqarsinnaanersoq nalilerneqarnissaani ilaatigut sumiiffik qinnutigineqartoq, pilersaarutigisamillu ingerlatassat pingaartinneqarsinnaapput. Assersuutigalugu sumiiffik imeqarfiup killeqarfianiippat, tassungalu avatangiisinut inatsit naapertorlugu immikkut malittarisassanik aalajangersaasoqanngippat, pilersaarut teknikkikkut ingerlanneqarsinnaanngitsutut aallaavittut isigineqarsinnaassaaq.

Suliniutip ingerlanneqarnissaanut suliaasat akornutaasut nalilerneqarpat, suliniut aamma teknikkikkut ingerlanneqarsinnaanngitsutut isigineqassaaq. Uani assersuutigalugu tassaasinnaapput suliniutit sumiiffinni erngup qummut killinga, imaani angallavik nerukitsoq imaluunniit ikkarluit patsisaallutik umiarsuit angalasinnaanngippata imaluunniit sumiiffiit tikikkuminaappata. Qinnuteqartup pigisaqartup aaqqiissutissatut siunnersuutaa naliliinermi isiginiarneqarsinnaavoq.

Suliniutip aningaasatigut ingerlanneqarsinnaanissaanut piumasaqaatip kingunerisaanik, suliniut aningaasatigut piviusorsiorpalaartumik tunngavissaqartoq qinnuteqartup qularnarunnaarsissavaa. Tamanna ima paasineqassaaq, suliniutip aallartisarneqarnera aamma ingerlanneqarnera aningaasalersorneqarsinnaassaaq. Taassumap saniatigut suliniut illersorneqarsinnaasumik ingerlanneqarsinnaaniassammat, aningaasatigut aarlerinarsinnaasut suliniutip nammassinnaasariaqarpai, allanngujaatsumillu ingerlatsinissaq qulakkeersinnaasariaqarlugu.

Piffissami qinnuteqarfiusumi piginnittussaataasup piffissaq akuersissuteqarfiusoq tamakkerlugu matusussernissaanut aningaasaateqassasoq piumasaqaatigineqanngilaq. Taamaakkaluartoq suliniutip aallartisarneqarnera aamma ingerlanneqarnissaa, assersuutigalugu aningaasalersuinissamik pilersaarutitigut, matumani allat aningaasaliissappata taakkua taanerisigut, qanoq aningaasalersorneqarsinnaassanersoq qinnuteqartup qularnarunnaarsissinnaavaa.

Suliniutimik ataatsimut naliliineq tunngavigalugu, aningaasatigut tunngavissat piviusorsiorpalaarnersut, naammassineqarsinnaanersullu naliliinermi isiginiarneqarsinnaavoq.

§ 4 malillugu atuinnissamut akuersissut, aningaasalersuinissamut pilersaarummik ilalimmik suliniutimut pilersaaruteqarnissaanik piumasaqaatitaqarpoq. Aningaasalersuinissamut pilersaarutitut piumasaqaatit ersarinnerusumik atuarnissaannut § 333, imm. 1, nr. 5-imut nassuiaatit innersuussutigineqarput.

Imm. 2-mut.

Suliniutip teknikkikkut, aningaasatigullu ingerlanneqarnissaanut uppersaanaissaq siunertaralugu qinnuteqartup uppersaanaatit suut nassiussanera pillugu ersarinnerusunik malittarisassiornissamut, imm. 2-mi aalajangersakkap Naalakkersuisut aalajangersaasinnaatippai. Taassumap saniatigut suliniutip teknikkikkut aamma aningaasatigut ingerlanneqarnissaanut uppersaanaissamut piumasaqaatissat pillugit Naalakkersuisut ersarinnerusunik malittarisassanik aalajangersaasinnaatinneqarput.

## Imm. 1-imut

§ 15-imi suliniummut piumasaqaammut, aalajangersagaq atuutsitsinnginneruvoq. Suliniutip ingerlanneqarsinnaanerani uppersaanissaq piffissami qinnuteqarfiusumi naammassineqarsinnaanngippat, piginnittussaataasooq piumasaqaatitalerlugu atuinissamut akuersissummik aalajangersakkap tunineqarsinnaatippaa.

Suliniutip ersarinnerusumik piffissaliussap iluani teknikkikkut, aningaasatigullu ingerlanneqarsinnaanerani piumasaqaat pisinnaatitsissummik pigisaqartup naammassillugulu qularnarunnaarsissavaa. Taassumap pisinnaatitsissummik pigisaqartup paasissutissanik, uppersaatissanillu pisariaqartunik katersinissaanut piffissalerneqassaaq, ilutigisaanillu siumut ingerlanissaq qulakkiissallugu.

Piffissaliussaq Naalakkersuisut aalajangissavaat, piffissaliussarluk ukiunik pingasunik sivilisunerusinnaanngilaq. Piginnittussaataasup piumasaqaammik qaqugukkut naammassinnaannissaanik naliliineq tunuliaqutaralugu, piffissaliussaq aalajangersarneqassaaq.

Atuinissamut akuersissut piumasaqaatitaqaraluartoq, Inatsisartut inatsisaata malittarisassaanut allanut atatillugu, aalajangersagaq malillugu piumasaqaatitaerlugu atuinissamut akuersissut piffissami tunniunneqarfianit tunniunneqarsimasutut isigineqassaaq.

## Imm. 2-mut.

Suliniutip teknikkikkut aamma aningaasatigut ingerlanneqarsinnaanerani qularnarunnaarsitsinissamik imm. 1-imi piumasaqaataasooq naammassineqartinnagu, atuinissamut ingerlatat aallartinneqaqqusaanngitsut aalajangersakkap ersarissarpaa. Suliniutip teknikkikkut aamma aningaasatigut ingerlanneqarsinnaanerani qularnarunnaarsitsinissamik imm. 1-imi piumasaqaataasooq naammassineqartoq, Naalakkersuisut akuersissutigissavaat. Taamaakkaluartoq piumasaqaataasup naammassineqarnerani Naalakkersuisut akuersinissaasa tungaannut, pisinnaatitsissummik pigisaqartoq misissueqqaarsinnaavoq. Taamaalluni piumasaqaatip naammassineqarnissaanut pisinnaatitsissummik pigisaqartoq paasissutissanik, uppersaatissanillu katersinnaatinneqarpoq.

## Imm. 3-mut.

Piffissaliussatut aalajangersarneqartoq tikitsinnagu imm. 1-imi piumasaqaataasooq naammassineqarsimanngippat, piumasaqaatitalerlugu akuersissut erngertumik atorunnaassaaq.

Piumasaqaatitalerlugu atuinissamut akuersissut atorneqanngikkuni atorunnaatussaalluni piffissaligaasooq, aalajangersakkap ersarissarpaa. Tamatumani nunaminertamik pisariaqanngitsumik inniminniisoqannginnissaa pillugu.

Imm. 4-mut.

Immikkut ittumik pisoqartillugu imm. 1-imi piffissaliunneqartumut, aalajangersakkap Naalakkersuisut immikkut akuersissuteqarsinnaatippai. Piginnittussaatitaasup aqussinnaanngisaanik pisoqartillugu, piffissaliussatullu aalajangersarneqartoq tikitsinnagu suliniutip teknikkikut, aningaasatigullu ingerlanneqarnissaanik qularnarunnaarsitsinissamik piumasqaataasup naammassineqarnissaanut tamanna akornutaatillugu pingaaruteqarsinnaavoq. Taamaattumik piginnittussaatitaasup pisinnaatitaaffini annaanngikkaluarlugu, piumasqaatit naammassineqarnissaannut piffissaqarnerunissaanut immikkut akuersissut eqaannerusumik piffissaqartitsisinnaavoq. Taamaakkaluartoq immikkut akuersissuteqartoqassanersoq pisuni ataasiakkaani nalilersorneqartassaaq.

Immikkulli akuersissummut atatillugu § 21-mi aallartinnissamut piffissarititaasumut malittarisassat eqqarsaatigineqartassapput. Tassunga tunngatillugu nassuiaatit innersuussutigineqarput.

Imm. 5-imut.

Piumasqaatitalerlugu akuersissutitut ersarinnerusunik malittarisassanik, aalajangersakkap Naalakkersuisut aalajangersaasinnaatippai.

### *§ 17-imut*

Imm. 1-imut.

§ 4 malillugu misissueqqaarnissanut aamma sermip, erngullu niuernermik siunertanut atorneqarnissaannut akuersissut, piffissamut ukiut 20-t tikillugit akuersissuteqarfilerlugu tunniunneqarsinnaasoq aalajangersakkap aalajangerpaa.

Piffissaq akuersissuteqarfiusoq Naalakkersuisut aalajangersassavaat, taannalu akuersissummi allassimassalluni. Suliniutip annertussusaa, aningaasaliinissamik pilersaarutit, pisuussummik ineriartortitsinissamut aamma atuinissamut naatsorsuutigisamik piffissamik atuinissaq, inuiaqatigiinni aamma avatangiisitigut eqqarsaatigisassat, pissutsillu allat tunuliaqutaralugit naliliinikkut piffissaq akuersissuteqarfiususaaq aalajangersarneqassaaq.

§§ 21 aamma 22 malillugit aallartinnissamut piffissaliussamik aamma ingerlatsisussaatitaanermut piumasqaatinik piginnittussaatitaasup naammassinninnissaa, piffissami akuersissuteqarfiusumiaalajangiisuvoq. Piumasqaatit taakkua naammassineqanngippata, piffissaq akuersissuteqarfissatut aalajangersarneqaaqqaartoq apeqqutaatinnagu akuersissut atorunnaarsissinnaavoq. Piumasqaatit taakkua ersarinnerusumik misissornissaannut, aalajangersakkanut taakkununga nassuiaatit innersuussutigineqarput.

Imm. 1 malillugu aalajangersarneqarluni piffissap akuersissuteqarfiusup atorunnaarneranut atatillugu, piffissamik akuersissuteqarfiusumik aalajangersakkap Naalakkersuisut sivitsuisinnaatippai. Piffissaq akuersissuteqarfiusoq piginnittussaataitaasup qinnuteqarnerit tamaasa ukiut qulit tikillugit Naalakkersuisut sivitsorsinnaavaat.

Piffissamik akuersissuteqarfiusumik sivitsuineq piumasaqaatinik ilasinissamut imaluunniit allannguissamut tunngavissiisinaavoq. Tamanna pillugu imm. 4-mi nassuiaatit takukkit.

Piffissap akuersissuteqarfiusup sivitsorneqarnissaa inatsisitigut piumasaqaataanngilaq. Piffissaq akuersissuteqarfiusoq sivitsorneqassanersoq aalajangiinissami, nr. 1-5-imi pissutsit tunuliaqutarlugit Naalakkersuisut aalajangiinissaanni naliliinissaq apeqqutaassaaq.

Imm. 2-mut.

Aalajangersakkap aalajangerpaa, Naalakkersuisut qinnuteqaammik naliliinermi pissutsit attuumassuteqartut ilanngussinnaagaat.

Nr. 1

§42-mi aalajangersagaq malillugu piginnittussaataitaasup ingerlatat pillugit ataavartumik nalunaarusiai aamma sermeq, imerlu qanoq annertutigisup atorneri pillugu naluraarutai naliliinissami Naalakkersuisut ilanngussinnaavaat. Tassani inernerit nalunaarutigineqartut kiisalu nalunaaruteqarneq piffissaagallartillugu pisimanersoq Naalakkersuisut pingaartissinnaavaat.

Taassuma saniatigut suliniummik ingerlatsinissami, ineriartortitsinissamilu siunissami periarfissat Naalakkersuisut ilanngussinnaavaat.. Uani suliniut teknikkikkut, aningaasatigullu sulit ingerlanneqarsinnaanersoq, pisuussutillu atorneqarnera sulit ineriartorteqqinneqarsinnaanersoq pillugit naliliinerusinnaavoq, matumani pinsinnaatitsissummik pigisaqartup ataavartumik nalunaarusia ilanngullugit..

Nr. 2

Piffissami akuersissuteqarfiusumi akuersissuteqarnermi piumasaqaataassunik piginnittussaataitaasoq eqqortitsinersoq naliliinermi isiginiarneqarsinnaavoq.

Imm. 3-mut.

Imm. 1-imi piffissap akuersissuteqarfiusup imaluunnit imm. 2 malillugu piffissaliussamik sivitsuisimanerup naanissaa kingusinnerpaamik qaammatinik arfinilinnik sioqqullugu, piginnittussaataitaasoq sivitsuinissamik qinnuteqarsimassaaq. Piffissaliussap iluani qinnuteqaat tunniunneqassaaq. Piffissaliussap qaangiutinnginnerani qinnuteqaatip nassiunneqarsimanissaa aalajangiisuuvoq.

Imm. 4-mut.

Piffissamik akuersissuteqarfiusumik sivitsuineq, atuinissamut akuersissummut tapiliussami ersarinnerusumik piumasaqaatit malillugit aalajangersarneqassaaq. Uani annerusumik

nalunaarusiornissamut immikkut piumasaqaasiornierit, avatangiisinut aamma inuiaqatigiinnut sunniutissaanik nalileeqqinnerit imaluunniit pisuussutip atuinnaarnissaanut pissutsit allat pingaaruteqarsinnaasut pineqarsinnaapput.

### *§ 18-immut*

Imm. 1-immut.

§ 4, imm. 3 malillugu misissueqqaarnissamut immikkut akuersissut, piffissamut ukiut pingasut tikillugit akuersissuteqarfilerlugu tunniunneqarsinnaasoq aalajangersakkap aalajangersarpaa.

Piffissaq akuersissuteqarfiususaaq Naalakkersuisut aalajangersassavaat, taannalu misissueqqaarnissamut akuersissummi allassimassalluni. Ingerlatassatut qinnutigineqartut, misissueqqaarnissallu naammassineqarnissaanut piffissaq atussangatinneqartup naliliiffiginerisigut, piffissaq akuersissuteqarfiususaaq aalajangersarneqassaaq.

§§ 21, imm. 2 aamma 22 malillugit ingerlatat aallartinneqarnissaannut piffissaliussamik, ingerlatsisussaataitanermillu piginnittussaataasoq naammassisimanissaa, piffissamut akuersissuteqarfissamut aalajangiisuvoq. Piumasaqaatit taakkua naammassineqanngippata, piffissaq akuersissuteqarfissatut aalajangersarneqaaqqaartoq apeqqutaatinnagu misissueqqaarnissamut akuersissut atorunnaarsinnaavoq. Piumasaqaatit taakkua ersarinnerusumik misissornissaannut, aalajangersakkanut taakkununga nassuiaatit innersuussutigineqarput.

Imm. 2-mut.

Pisinnaatitsissummik qinnuteqartup qinnuteqarneratigut, piffissaq akuersissuteqarfiusoq qinnuteqarnerit tamaasa ukioq ataaseq tikillugu aalajangersakkap sivitsorneqarsinnaatippaa. Taamaattoq misissueqqaarnissamut piffissaq akuersissuteqarfiusoq ukiunik tallimanik sivilunerusinnaanngilaq.

Sivitsuinissaaq pillugu aalajangiinissami, naliliinissaaq apeqqutaassaaq. Uani ilaatigut misissueqqaarnerup siuariartornera, ingerlatseqqinnissamullu naatsorsuutigisat isiginiarneqarsinnaapput.

Imm. 3-mut.

Piffissap akuersissuteqarfiusup qaangiunnissaa kingusinnerpaamik qaammatinik pingasunik sioqqullugu, piginnittussaataitasup sivitsuinissamik qinnuteqassaaq. Piffissaliussap iluani qinnuteqaat tunniunneqassaaq. Piffissaliussap qaangiutinnginnerani qinnuteqaatip nassiunneqarsimanissaa aalajangiisuvoq.

Imm. 4-mut.

Piffissamik akuersissuteqarfiusumik sivitsuineq, misissueqqaarnissamut akuersissummut tapiliussami ersarinnerusumik piumasaqaatit malillugit aalajangersarneqassaaq. Uani misissueqqaanissamut piumasaqaataaqqartut aamma misissoqqinneqarsinnaapput.

### *§ 19-imut*

Imm. 1-imut.

§ 4 malillugu akuersissummi sumiiffiup ersarinnerusumik killilersugaasup iluani, piginnittussaataasooq taamaallaat ingerlatsisinnaasooq aalajangersakkap aalajangersarpaa.

Kisermaassisussaataitaaffilerlugu atuinissamut akuersissummik tunniussisoqarsimanngippat, sumiiffimmi ataatsimi iginnittussaataasunut arlalinnut Naalakkersuisut akuersissuteqarsinnaapput. § 8-mi nassuiaatit innersuussutigineqarput.

Piginnittussaataasunut arlalinnut akuersissuteqartoqartinagu, piginnittussaataanermik pigisaqareersup akuersissutiminik atuinissaminut periarfissai annikillissanersut nalilerneqassaaq. Tassunga atatillugu pisuussutip tunngavia erseqqissumik naliliiffigineqassaaq, tamarmiusumillu atuneq piujuartitsissasooq qulakkeerneqarluni. Taamaalilluni pisuussut sinnerlugu akuersissutinik arlalinnik tunniussisoqannginnissaaa tunngaviuvoq.

Piginnittussaataasooq sanaartussalluni kissaatigissappagu tamanna immikkut akuersissuteqartariaqarpoq, matumani aamma inatsit alla malillugu nunaminertamik atugassinneqarnissaa ilanngullugu. Taamatut tunniussinerni suliniutit arlaqartut akornanni aaqqiagiinngissutaasinnaasut aamma eqqarsaatigineqassapput.

Aalajangersakkap ersarissarpaa

Aalajangersakkap ersarissarpaa, sumiiffik akuersissuteqarfiusooq naleqqanik, killinik imaluunniit nunami naleqquttunik aalajangersaanikkut killilersorneqarsinnaasooq, tamannalu akuersissummi allassimassasooq. Sumiiffiup ingerlatat ingerlanneqarsinnaaffia ersarissumik, eqqortumillu killilersorsimanissaa aalajangiisuuvoq, taamaalilluni pisinnaatitsissummik pigisaqartup ingerlataminut ersarissunik sinaakkuteqarsinnaaniassammat.

Imm. 2-mut.

Akuersissummik ersarissarneqartumik sumiiffik akuersissuteqarfiusooq naleqqanik, killiliussanik imaluunniit sumiiffimmut allatigut pingaarutilinnik aalajangersakkatigut killilersorneqarsimasinnaasooq aalajangersakkap ersarissarpaa. Sumiiffiup ingerlatat ingerlanneqarsinnaaffia ersarissumik, eqqortumillu killilersorsimanissaa aalajangiisuuvoq, taamaalilluni pisinnaatitsissummik pigisaqartup ingerlataminut ersarissunik sinaakkuteqarsinnaaniassammat.

### *§ 20-mut*

**Imm. 1-imut.**

Sumiiffiup akuersissuteqarfiusup allinissaanut imaluunniit allanngortinnissaanut, aalajangersagassatut siunnersuutip Naalakkersuisut aalajangiisinnaatippai. Piginnittussaataitaasup nammineerluni tamanna qinnutigissavaa.

Allannguinerup kingunerisaanik, pisinnaatitsissummik pigisaqartoq sumiiffimmik atuiunnaarluni sumiiffik akuersissuteqarfioqqaartoq nuunneqarsinnaavoq, kisiannili sumiiffimmi angeqqataanik ingerlatsisinnaassalluni. Sumiiffik akuersissuteqarfioqqaartoq eqqarsaatigalugu qaleriisitsisoqarsinnaavoq.

Allannguneq sumiiffimmik akuersissuteqarfiusumik aamma milliliinerusinnaavoq. Piginnittussaataitaasup sumiiffimmik tamakkerlugu atuinnginnerani, taamaalillunilu sumiiffimmik mikinerusumik atuinissaminik pisariaqartitsinerani pingaaruteqarsinnaavoq.

Sumiiffik akuersissuteqarfiusoq allilernerqarpat, sumiiffimmik akuersissuteqarfioqqaartumik piginnittussaataitaasup atuisinnaatitaanini pigiinnassavaa, kisiannili sumiiffiup saniani sumiiffimmi, ataatsimullu isigalugu sumiiffimmi anginerusumi ingerlataminik ingerlatsisinnaassalluni.

Taamaakkaluartoq sumiiffimmik akuersissuteqarfiusumik allannguneq imaluunniit alliliineq ilaatigut nunaminertanut oqartussanit akuersissuteqarfiusariaqarsinnaammat, imaluunniit avatangiisinut tunngatillugu akuersissuteqarfiusariaqarsinnaammat pisinnaatitsissummik pigisaqartup pisuni tamani eqqumaffigissavaa. Tamanna sanaartukkamik pilersitsisoqarpat, piiasoqarpat imaluunniit nuutsisoqarpat pisariaqarsinnaavoq.

**Imm. 2-mut**

Sumiiffimmik akuersissuteqarfiusumik alliliinissaq imaluunniit allatigut allannguinissaq pillugu aalajangiineq, nr. 1-2-mi pissutsit tunuliaqutaralugit pissaaq. Allattukkat tamakkiisuunngillat, taamaalillunilu tunngavissat allat Naalakkersuisut ilaatissinnaavaat, ingerlatsinermullu inatsimmi tunngavik naapertorlugu suliap naammattunik paasissutissinneqarnissaa qulakkeerlugu.

§ 4, imm. 3 malillugu misissueqqaarnissamut immikkut akuersissummi sumiiffimmik akuersissuteqarfiusumik alliliinissamik qinnuteqaatit eqqarsaatigalugit, qinnuteqaatit tamarmik immikkut naliliiffigineqartartussaammata nr. 1-2-mi piumasaqaatit sakkukillisamik naliliiffigineqarsinnaapput.

**Nr. 1**

Allannguinermi imaluunniit annertusaanermi pisuussutip atornerani naatsorsuutigisamik pitsanngorsaatisaaq Naalakkersuisut aamma pingaartissinnaavaat.

Siullertut piginnittussaatitaasup tamanna nassuiarsinnaassavaa, kisiannili tusarniummut akissutit, tak. § 36, avataaniillu paasissutissat allat naliliinermut aamma ilanngunneqarsinnaapput.

Aningaasatigut iluanaarutit naliliinermi ilanngunneqarsinnaapput. Ilaatigut piginnittussaatitaasup kaaviiaartitaasa naatsorsuutigisamik amerlinissat, matusissutissallu kiisalu inuiaqatigiit aningaasaqarnerini toqqaannartumik, malitsigisaanillu iluanaarutissat ilaatinneqarsinnaapput. Tamatumani aamma Inatsisartut inatsisaanni malittarisassat malillugit qaavatigut akiliutit, akileraarutit akiliutit, sulisunik najukkameersunik sulis pisariaqartitsineq il.il. ilaatinneqarsinnaallutik.

Naliliinermut ilaatillugu pisinnaatitsissummik pigisaqartoq sumiiffimmik alliliinissamik imaluunniit allanngortitamik atuinnissaminik pisariaqartitsinersoq, piginnaasaqarnersorlu pingaartinneqarsinnaavoq.

Siunissami qaninnerusumi, ungasinnerusumilu kingunissat naliliinermi pingaartinneqarsinnaapput.

Nr. 2

Suliniummik ingerlatsinissami, ineriartortitsinissamilu siunissamut missiliuussat Naalakkersuisut pingaartissinnaavaat.

§ 42 malillugu piginnittussaatitaasup sumiiffimmut akuersissuteqarfioqqaartumut ataavartumik nalunaarusiai naliliinermi ilaatinneqarsinnaapput. Tassani ilaatigut § 42, imm. 2 naapertorlugu sermeq, imerlu qanoq annertutigisut atorineqarsimaneri pillugit pisinnaatitsissummik pigisaqartup nalunaarusiai ilaatinneqarsinnaapput.

piginnittussaatitaasup allannguinnissaq imaluunniit annertusaanissaq pisariaqartinneraa pillugu naliliinissami, paasissutissat taakkua tunngavissiiinnaapput. Piginnittussaatitaasoq ukiumi kingullermi pitsaasunik angusaqarsimappat, piginnittussaatitaasoq pisuussummik annertunerusumik atuisinnaaneranut tamanna takussutaasinnaavoq.

Ukiup siuliani angusaq pitsaasimanngippat, akuersissuteqarfiup annertusinissaanut tamanna akerliusinnaavoq. Killuani sumiiffiup akuersissuteqarfiup allanngornera imaluunniit annertusineqarnera allanik periarfissiisinnaavoq, tamannalu sumiiffiup akuersissuteqarfiup nuunneqarnissaanut imaluunniit allanngortinneqarnissaanut naliliinikkut tunngaviusinnaalluni.

Ataavartumik nalunaarusiornissamut piumasaqaatit ersarinnerusumik misissornissaannut § 42, tassungalu nassuiaatit innersuussutigineqarput.

Imm. 3-mut.

Sumiiffimmik akuersissuteqarfiusumik allannguinnissaq imaluunniit allilliinnissaq pillugu aalajangiinnissaq eqqarsaatigalugu, § 36-mi tusarniaaneq pillugu malittarisassat aamma atuuttut aalajangersakkap ersarissarpaa.

Taamaalilluni sumiiffiup akuersissuteqarfiusup allineqarnissaa imaluunniit allanngortinneqarnissaa pillugu aalajangiisoqartinnagu, kommunalbestyrelsi tusarniaaffigineqassaaq. Uani kommunip pilersaarusiørnermi pisinnaatitaaffia, najukkamilu pissutsinik isumaginninnissaminut periarfissaa, matumani aamma nunaminertanik atuineq, avatangiisinut tunngasut, kommunillu pilersaarusiørfigineqarnerani ataqatigiinnerit eqqarsaatigineqarput.

Sumiiffimmi akuersissuteqarfiusumi allannguneq imaluunniit alliliineq inuiaqatigiinnut, avatangiisinut imaluunniit inuussutissarsiutinut annertuumik kinguneqassasoq nalilerneqaruni, aamma tamanut tusarniaasoqassaq, tak § 36, imm. 2.

Tusarniaaneq pillugu malittarisassat ersarinnerusumik misissornissaannut § 36-mut nassuiaatit innersuussutigineqarput.

Imm. 4-mut.

Imm. 3-p aalajangersarpaa, sumiiffiup akuersissuteqarfiusup allanngortinneqarnera imaluunniit allilerneqarnera, § 4 malillugu akuersissummut tapiliussatigut aalajangersarneqassasoq.

Allannguinnissamut imaluunniit alliliinnissamut Naalakkersuisut piumasaqaatinik ersarinnerusunik aalajangersaasinnaapput, matumani uppersarsaanissamik piumasaqaat, sumiiffimillu atuinissaq ilanngullugit. Taamaalilluni assersuutigalugu allannguinnissap annertussusissaanut, atuinissami ingerlatassanut killissanik imaluunniit piumasaqaatinik, il.il. piumasaqaasiortoqarsinnaassaaq. Taassumap saniatigut piumasaqaatinik allanik aalajangersaaneq pillugu § 28-mut atatillugu piumasaqaat isigineqassaaq. Tamanna pillugu nassuiaatit innersuussutigineqarput.

Imm. 5-mut

Sumiiffiup akuersissuteqarfiup allilernissaanut imaluunnit allanngortinnissaanut qinnuteqaatinik suliaqarnissamut malittarisassanik ersarinnerusunik, Naalakkersuisut aalajangersaasinnaannissaanut aalajangersakkap pisinnaatippai. Assersuutigalugu qinnuteqaatip imarisaanut, uppersarsaanissamut, assinullu piumasaqaataasinnaapput.

Taassuma saniatigut sumiiffiup akuersissuteqarfiup allilernissaanut imaluunniit allanngortinnissaanut akuersissutinut piumasaqaatit pillugit, matumani teknikkikkut piumasaqaatit, nalunaarusiørtussaataaneq, isumannaallisaanerit kiisalu avatangiisit, nuna imaluunniit sumiiffiup atorneqarnerata illersorneqarnissaa siunertaralugu nalinginnaasumik

killersuutaasinnaasut ilanngullugit malittarisassanik ersarinnerusunik aalajangersaanissaannut Naalakkersuisut pisinnaatinneqarput.

### § 21-mut

Aallartinnissamut piffissaliussaq § 21-mi aalajangersakkat aalajangersarpaat, Inatsisartullu inatsisaat malillugu akuersissut tunniunneqartoq naapertorlugu ingerlatassat akuerisaasut ulloq kingusinnerpaaq aallartinneqarsimaffissaat aalajangersarlugu.

Imm. 1-imut.

Aallartinnissamut piffissaliussaq aalajangersakkap aalajangersarpaa. § 4 malillugu atuinissamik akuersissutip tunniunneqarneranit kingusinnerpaamik ukiut tallimat iluini piginnittussaataitaasup atuinissami ingerlatassat aallartissimassagai, tassani aalajangersarneqarpoq.

Atuinissami ingerlatassat aallartisarneqarnissaannut piginnittussaataitaasoq aalajangersakkap piffissalerpaa. Taassumap saniatigut akuersissutinik allanik pisariaqartunik pissarsinissamut, soorlu nunaminertamik atugassinneqarnissamut, avatangiisinut sunniutigisinnaasaanik nalilersuinnermut, oqartussallu akuersissutaannut allanut piffissaq atorneqarsinnaavoq. Ilutigisaanik piginnittussaataitaasoq siuariaateqarani akuersissut pigiinnarnagu imaluunniit nunaminertamik inniminniiginnarani, suliniutip piviusunngortinneqarnissaa eqeersimaartumik sulissutigigaa aallartinnissamut piffissaliussap qulakkeerpaa.

Pisuussutip pissarsiarineratigut, atorneratigullu suliniutip piviusunngortinneqarnissaanik siunertaqartunik, atuinissamut ingerlatsinernik pisinnaatitsisummik pigisaqartup aallartitsinissaa piumasaqaatigineqarpoq. Ingerlatassat piffissaliussap iluani aallartinneqarsimasussat tassaapput ingerlatassat § 4 malillugu atuinissamik akuersissummi ingerlatassatut akuerineqarsimasut. Kaaviiartitaqalersimanissaq piumasaqaataangilaq. Piumasaqaatip nammassineqarsimanissaa, pisinnaatitsisummik pigisaqartup qularnarunnaarsitassaraa. Taamaakkaluartoq pisuni tamani nalilersugassaassaaq.

Imm. 1-imi aallartinnissamut piffissaliussaq atuinissamut ingerlatassanut taamaallaat tunngassuteqarpoq. Taamaalluni § 4 malillugu misissueqqaarnissamut akuersissutitaqarluni aamma atuinissamut akuersissutitaqarluni ataatsimoortumik akuersissummi, misissueqqaarnissamut ingerlatassani pisariaqartitat assigiinngissinnaammata, taakkua aallartissimanissaannut piumasaqaateqanngilaq. Taamaakkaluartoq immikkut ittumik misissueqqaarnissamut tunngasut imm. 2-mi takukkit.

Aallartinnissamut piffissaliussap iluani misissueqqaarnerit ingerlanneqarsinnaapput, aallaavittulli piumasaqaatip naammassineqarnissaanut naammassanani. Taamaakkaluartoq misissueqqaarnissamut ingerlatat, aallartinnissamut piffissaliussamik sivitsuinnissamut

tunngavissiiinnaapput. Tamanna pillugu imm. 3-mi nassuiaatit innersuussutigineqarput.

Imm. 2-mut.

§ 4, imm. 3 malillugu misissueqqaarnissamut immikkut akuersissutitut tunngatillugu, ingerlatassap aallartissimanissaannut sivikinnerusumik piffissaliisoqarluni ukiumik ataatsimik piffissaliisoqarpoq.

Akuersissutip tunniunneqarneranit kingusinnerpaamik ukiup ataatsip kingorna, akuersissut malillugu misissueqqaarnermi ingerlatassat piginnittussaataasup aallartissimassavai.

Aalajangersagaq misissueqqaarnissamut immikkut akuersissutitut taamaallaat atuuppoq, taamaalillunilu § 4 malillugu misissueqqaarnissamut akuersissutitut aamma atuinissamut akuersissutitut ataatsimut tunniunneqartunut atuutigani.

Imm. 3-mut.

Imm. 1-imi aallartinnissamut piffissaliussamik, imm. 2-milu misissueqqaarnissat aallartisarsimanissaanut piffissaliussamik Naalakkersuisut sivitsuisinnaasut aalajangersakkap aalajangersarpaa. Qinnuteqarnerit tamaasa ukioq ataaseq tikillugu sivitsuisoqarsinnaavoq.

Piginnittussaataasup qinnuteqarneratigut, Naalakkersuisut piffissaliussamik sivitsuisinnaapput. Piffissamik sivitsuisoqarsinnaanissaani, nr. 1-imi imaluunniit nr. 2-mi piunasaqaatit naammassineqartut piginnittussaataasup uppersarsaanissaa piunasaqaataavoq. Taamaakkaluartoq piffissaliussamik sivitsuisoqarnissaa akuerineqassanersoq, tunngavilersuilluni naliliisoqassaaq. Naalakkersuisut naliliinermi tunngavissatigut eqqarsaatigisassat allat ilanngussinnaavaat, matumani assersuutigalugu § 15 malillugu suliniut teknikkikkut, aningaasaqarnikkullu sulii ingerlanneqarsinnaanersoq ilanngullugu.

Nr. 1

Suliniutip piviusunngortinneqarnissaa piginnittussaataasup piffissap ingerlanerani eqeersimaartumik sulissutigisimallugu uppersarsarpagu, Naalakkersuisut piffissaliussamik sivitsuisinnaapput. Suliniut siuariaateqarneris, suliniullu piviusorsiorpalaarnersoq, naleqquttumillu piffissap iluani piviusunngorsinnaarpassinnersoq naliliinermi isiginiarneqarsinnaavoq.

Imm. 1-imi aallartinnissamut piffissaliussaq eqqarsatigalugu, misissueqqaartoqarsimanersoq isiginiarneqarsinnaavoq. Ingerlatsinerit taamak ittut imm. 1-imi aallartinnissamut piffissaliussamik naammassinninnissamut imminermi naammangillat. Taamaakkaluartoq ingerlatat atuinissamut ingerlatanut, suliniutillu piviusunngortinneqarnissaannut imak

qanitsigisut isigineqartariaqartillugit, misissueqqaarnermik ingerlatat piffissaliussamik sivitsuinnissamut naleqquttumik pissuteqartillugu sivitsorneqarsinnaassapput. Taamaakkaluartoq misissueqqaarnermi ingerlatat anginerusut, soorlu najoqqutassiamik misileraanerit pineqartariaqarput. Ingerlatat annikinnerit, soorlu killilimmik imermik misiliinerit naammakkunnaangillat. Taamaakkaluartoq pisunik naliliinnissamik tunngaveqassaaq.

Taassumap saniatigut piffissami tassani akuersissutinik allanik imaluunniit oqartussanit akuersissutinik pisariaqartunik pissarsinissani, piginnittussaataasup eqeersimaartumik sulissutigisimaneraa isiginiarneqarsinnaavoq.

Suliniutip ingerlanneqarnissaanut aalajangiisuusumik akuersissummik oqartussaq itigartitsisimappat, § 15 naapertorlugu suliniut ingerlanneqarsinnaassanngimmat, sivitsuinnissamut aallaavittut tunngavissaqassanngilaq. Taamaakkaluartoq maalaaruteqarnissamut periarfissat tamakkerlugit misilinneqarsimanersut isiginiarneqartariaqarpoq.

Atuivinnissaq piginnittussaataasup imak qanitsigippagu, suliniullu imak siuarsimatillugu, imm. 1-imi piffissaliussap qaangiutsiarnerani atuinissamik ingerlatassat imaluunniit imm. 2 eqqarsaatigalugu misissueqqaarnermik ingerlatassat aallartinneqarsinnaatillugit, akuersissut atorunnaarsinneqartariaqanngitsoq aalajangersakkap kingunerivaa.

Nr. 2

Siumut ingerlanissamut akimmiffiusoqarsimatillugu, pisinnaatitsissummillu pigisaqartup aqussinnaasimanngisaanik paasinartumik pisoqarsimatillugu Naalakkersuisut piffissaliussamik sivitsuisinnaapput.

Assersuutigalugu pisut tassaasinnaapput, oqartussat pisariaqartumik akuersissutissaat suliap suliarineqarneratigut kinguaattoorsimasut. Taamaakkaluartoq akuersissutit pisariaqartut allat pissarsiarinissaat, piginnittussaataasup piffissap naleqquttup iluani eqeersimaartumik sulissutigisimaneraa isiginiarneqarsinnaavoq. Pisut aqunneqarsinnaanngitsut aamma tassaasinnaapput avataani immikkut pisut, matumani ajunaarnersuit imaluunniit niuernermi pissutsit suliniutip siuariartornissaanut sunniuteqarsimasut.

Kinguaattoorneq piginnittussaataasup aqussinnaanngisaanik pisimatillugu, pissutsillu taakkua siumut ingerlanerup attatiinneqarsinnaannginneranut aalajangiisuusimappata aatsaat, nr. 2 malillugu sivitsuisoqarsinnaassaaq.

Assersuutigalugu suliniutip siuariartornissaanut aalajangiisuullutik immikkut ittumik pisunut assingusinnaapput soorlu ajunaarnersuit, ajutoornerit imaluunniit naatsorsuutiginnngisamik pisut.

Imaassinnaavoq aamma oqartussat suliamik suliaqarnerat kinguaattoorsimasooq, naak suliap suliarineqarnissaa piffissaliussatut ilisimaneqartoq sioqqullugu pisinnaatitsissummik pigisaqartoq piffissaagallartillugu qinnuteqaammik tamakkiisumik nassitsisimagaluartoq.

Silap pissussaa aallaavittut patsisaasinnaangilaq. Taamaakkaluartoq immikkut naliliisoqartariaqarpoq, tassani ilaatigut pisinnaatitsissummik pigisaqartup ingerlatassaminik ingerlatsinissaminut piffissaanut sunniuteqartumik silarlussimanersoq pingaartinneqarluni.

Killuanik pissutsit pisinnaatitsissummik pigisaqartup ilimagereersinnaasariaqarai patsisitut isigineqarsinnaassanngillat. Soorlu assersuutigalugu tikinneqarsinnaaneranut killiliisut, soorlu assersuutigalugu piffissat eqqissisimatitsiffiusut, ukiuuneranilu nalinginnaasumik pissutsit ilisimallugit pilersarusiorsimannginneq imaluunniit oqartussat akuerisariaqagai pillugit kingusinaarluni qinnuteqarnerit.

Imm. 4-mut.

Aallartinnissamut piffissaliussap qaangiunnissaanut kingusinnerpaamik qaammatit pingasut sioqqullugit, pisinnaatitsissummik pigisaqartoq sivitsuisoqarnissaanik qinnuteqaammik nassitsissasooq aalajangersakkap aalajangersarpaa. Aallartinnissamut piffissaliussap qaangiutinnginnerani qinnuteqaatip nassiunneqarnissaa aalajangiisuvoq.

Imm. 5-imut.

Aalajangersakkap aalajagersarpaa, imm. 1-2-mi piffissaliussatut aalajangersarneqartup imaluunniit imm. 3 malillugu piffissaliussamik sivitsuisinnaanerup iluani piumasqaataasumik ingerlatassat aallartinneqanngippata, akuersissut erngertumik atorunnaassasooq. Taamaalilluni ingerlatsinngikkaluarluni akuersissutit atatiinnarneqarsinnaapput.

Erngertumik atorunnaarsitsisoqassaaq, imaappooq oqartussanit immikkut aalajangiisoqartariaqanngitsoq, piffissaliussalli malinneqarnissaanut piginnittussaataitaasup nammineerluni akisussaaffigaa.

Aalajangersakkap kingunerisaanik, aallartinnissamut piffissaliussap iluani ingerlatassat piginnittussaataitaasup aallartissimanagit akuersissut atorunnaarpat, malitsigisaanik imm. 3 malillugu sivitsuinissamik qinnuteqartoqarsinnaangilaq. Taamaattoqassappat Inatsisartut inatsisaat malillugu akuersissummik nutaamik qinnuteqartoqartariaqarpoq, taannalu malittarisassat atuuttut malillugit nalilernerqarluni. Erngertumilli aallartitsinissamut periarfissat pillugit tulluuttumi imm. 5-imi nassuiaatit takukkit.

Imm. 6-imut.

Imm. 3-mi piffissaliussap iluani piginnittussaataitaasup sivitsuinissaq qinnutiginnitsoorsimappagu, akuersissutip imm. 4-aa malillugu atorunnaarsimasup atuutsilerseqqinnissaanut aalajangersagaq periarfissiivoq. Atuutsilersinneqaqqissappat

patsiseqartariaqarpoq. Taamaalilluni piffissaliussamik qaangiinnermi akuersissutip erngertumik atorunnaarnissaa pillugu pingaarnertut malittarisassamit, atuutsilersitseqqinneq atuutsitsinnginneruvoq qaqutikkut atorneqarsinnaasoq.

Taassumap saniatigut atuutsilersitseqqinnissamut tunngavilersuisinnaasumik immikkut pisoqarsimappat, piginnittussaatitaasup imm. 3-mi piumasaqaataasut naammassissavai. Taassumap kingunerisaanik suliniut teknikkikkut, aningasaqarnikkullu sulii ingerlanneqarsinnaappat aatsaat, tak. § 15, piginnittussaatitaasullu suliniutip piviusunngortinneqarnissaa eqeersimaartumik sulissutigisimappagu imaluunniit siumut ingerlanissamut piginnittussaatitaasup aqussinnaanngisaanik pisoqarsimatillugu, atuutsilerseqqinnissamut qinnuteqaat Naalakkersuisut taamaallaat akuerisinnaavaat.

Akuersissutip atorunnaarneranit kingusinnerpaamik qaammatit pingasut kingorna, atuutsilersitseqqinnissamik qinnuteqaat tunniunneqassaaq. Piffissaliussaq malinneqanngippat, atuutsilersitsisoqarqittoqarsinnaanngilaq. Taamaattoqassappat Inatsisartut inatsisaat malillugu akuersissummik nutaamik ingerlatseqatigiiffik qinnuteqartariaqassaaq.

### § 22-mut

Ingerlatsisussaatitaanissamik § 22-mi aalajangersagaq aalajangiivoq, taanna malillugu Inatsisartut inatsisaat malillugu akuersissut tunniunneqartoq malillugu, piffissaq akuersissuteqarfiusoq tamakkerlugu piginnittussaatitaasup ingerlatassat ingerlatissagai. Piginnittussaatitaasup ingerlatsisussaatitaaneq naammassinngippagu, § 38, nr. 2-mi aalajangersagaq malillugu Naalakkersuisut akuersissut utertissinnaavaat. Akuersissutininik utertitsisarneq pillugu malittarisassat ersarinnerusumik misissornissaannut, § 38-mut nassuiaatit innersuussutigineqarput.

Imm. 1-imut.

Inatsisartut inatsisaat malillugu akuersissut tunniunneqartoq malillugu ingerlatassatut akuerisaasut, piffissaq akuersissuteqarfiusoq tamakkerlugu pisinnaatitsissummik pigisaqartup ingerlatissagai aalajangersakkap aalajangerpaa.

Aalajangersagaq § 21-mi aallartinnissamut piffissaliussamut atatillugu isigineqassaaq. § 21, imm. 1-2-mi aallartinnissamut piffissaliussap imaluunniit § 21, imm. 3 malillugu piffissaliussamik sivitsuinerup atorunnaarnerani, ingerlatsisussaatitaaneq atuutilissaaq. Akuersissutip tunniunnerani piffissami siullermi, aallartinnissamullu piffissaliussap atorunnaarnissaata tungaanut ingerlatsisussaatitaanerup naammassinissaanut, piginnittussaatitaasoq pisussaaffeqanngilaq.

Aalajangersagaq § 26, imm. 2-mut innersuussivoq, taassuma kingorna sillimmasiissuteqarnissamik imaluunniit qularnaveeqquteqarnissamik piumasaqaat naammassineqartinnagu ingerlatsinerit aallartinneqaqqusaanngimmata. Innersuussinerup

kingunerisaanik, imaanngilaq ingerlatsisussaatitaaneq piginnittussaatitaasumut atuutinngitsoq. Sillimmasiissuteqarnissamik imaluunniit qularnaveeqquteqarnissamik piumasaqaat naammassineqanngippat ingerlatsisoqqaqusaanngilaq, taamaalillunilu pisinnaatitsissummik pigisaqartup ingerlatsisussaatitaaneq naammassisinnaassanagu. Ingerlatsisussaatitaaneq naammassineqarsinnaaqullugu, piginnittussaatitaasup piumasaqaatit piffissaagallartillugu naammassisassarai.

Akuersissutit suussusaannik aalajangersagaq immikkoortitsinngilaq, taamaalilluni Inatsisartut inatsisaat malillugu akuersissutinut tunniunneqarsimasunut tamanut atuulluni.

Ingerlatsisussaatitaanerup naammassineqarnissaanut akuersissutit ataasiakkaat, piginnittussaatitaasumullu suut ingerlatissanerai apeqqutaapput. § 5-mi, § 6-mi aamma § 10-mi aalajangersakkat naapertorlugit ingerlatassat akuersissummi aalajangersarneqassapput. Ingerlatassat annertussusissaat, suussusaallu nalinginnaasumik piginnittussaatitaasup qinnuteqarnerminut atatillugu paasissutissanik nassiussimasaanik kiisalu tusarniaanermut atatillugu paasissutissanik tiguneqaratarsimasinnaasunik allaaveqassapput. Taamaalilluni piginnittussaatitaasup nammineerluni qinnutigisimasaanut, ingerlatassatullu akuersissuteqarfigisimasaanut ingerlatsisussaatitaanermik piumasaqaat pissusissamisuuginnartumik malitsiuvoq.

Soorlu assersuutigalugu sikusarnera aamma ukiuunera imaluunniit pissutsit allat ingerlatsinissamut killiliisut imaluunniit sumiiffimmut tikikkuminaatsitsisut eqqarsaatigalugit, ingerlatat piffissani aalajangersimasuni ingerlanneqassasut akuersissummi ersarissarneqarsinnaavoq. Taamaalilluni piffissani taaneqartuni taakkunani ingerlatassat ingerlanneqarnissaannut pisussaaffiussaaq.

Akuersissuteqarnermi siunertaasup naammassineqarnissaanut ingerlatassanut pisariaqartunut, soorlu assersuutigalugu atuinissamut akuersissutip ataani pissarsinermut imaluunniit misissueqqaarnissamut akuersissummut atatillugu imermik misiliinermut, ingerlatsinissamik piumasaqaat attuumassuteqarpoq. Taamaakkaluartoq aningaasatigut iluanaarutit imaluunniit kaaviiartitat, piumasaqaatip naammassineqarnissaanut aalajangiisuunngillat.

Ingerlatassatut akuerisaasut, akuersissut naapertorlugu ilumut ingerlanneqartut, nunaminertamillu inniminiiisoqarnissaata pinngitsoortinneqarnissaa ingerlatsisussaatitaanerup isumagaa. Ilutigisaanik piginnittussaatitaasup aallartisarnissaminut piffissamik pisariaqartitsisinnaanera eqqarsaatigineqarpoq, taamaattumillu aallartinnissamut piffissarititaasooq atorunnaartinnagu, ingerlatsisussaatitaaneq atuutilissanani.

Imm. 2-mut.

Piginnittussaatitaasooq ingerlatanik unitsitsigallarsinnaatillugu, imm. 1-mi ingerlatassatut piumasaqaataasumut, aalajangersakkap Naalakkersuisut immikkut akuersissuteqarsinnaatippai.

Immikkut akuersissut ukiut marlukkaarlugit tunniunneqarsinnaavoq.  
Piginnittussaataasoq ingerlatat unitsitinnagit, ingerlatanik unitsitsigallarnissamik qinnuteqassaaq.

Immikkut akuersissuteqassagaanni, nr. 1-imi aamma 2-mi piumasaqaataasut piginnittussaataasup naammassisimassavai.

Nr. 1

Ingerlatat unitsikkallarneqartariaqarnissaannut immikkut pissuteqartoq, piginnittussaataaup uppenarsassavaa. Assersuutigalugu immikkut pisut tassaasinnaapput naatsorsuutiginnngisamik pisut, ajunaarnersuit, pissutsilluunniit allat piffissami pineqartumi ingerlatanik ingerlatsisinnanani piginnittussaataasup aqussinnaasimanngisai.

Nr. 2

Taassumap saniatigut ingerlatat qanoq aallarteqqinnissaanut pilersaarummik pisinnaatitsissummik pigisaqartoq saqqummiussissaaq. Pilersaarut taanna piviusorsiorpalaassaaq, ingerlatallu unitsikkallarneqarnissaannut pisut pissutaasut malillugit nalilerneqarsinnaatillugu, ingerlatat aallarteqqinnissaannut piffissaliussamik ersarissumik takutitsissalluni.

Immikkut akuersissuteqartoqassappat, unitsitsigallarneq pineqassaaq. Ingerlatat aallarteqqinnissaat ilimanaateqanngippat, immikkut akuersisummik tunniussisoqarsinnaanngilaq.

Imm. 3-mut.

Aalajangersakkap aalajangersarpaa, ingerlatat unitsinneqartinnagit ingerlatat unitsinneqarallarnissaannut immikkut akuersisummik qinnuteqartoq qinnuteqaammik nassitsissasoq. Ingerlatsisussaataitaanermi immikkut akuersissuteqarani ingerlatat unitsinneqarpata, piginnittussaataasup aallaavittut § 22, imm. 1-imi ingerlatsisussaataitaanermut akerliussaaq. Taamaalilluni piffissamut unitsitsivioersumut kingumut atuuttussamik immikkut akuersissuteqarnissamut, § 22, imm. 2-mi inatsisitigut tunngavissaqanngilaq.

Piginnittussaataasup ingerlatsisussaataitaneq naammassinngikkuniuk, § 38, nr. 2-mi aamma § 39-mi aalajangersakkat malillugit Naalakkesuisut akuersisummik utertitsisinnaapput. Akuersissutinik utertitsineq pillugu malittarisassat ersarinnerusumik misissornissaannut, tassunga nassuiaatit innersuussutigineqarput.

*§ 23-mut*

Sumiiffimmi akuersissuteqarfiusumi piginnittussaataitaasup saniatigut allat ingerlatsisinnaanerat pillugu piumasaqaatinik ersarissaasunik, aalajangersakkap Naalakkersuisut akuersissummi aalajangersaasinnaatippai, tassani akuersissut kisermaassisussaataitaaffilerlugu imaluunniit kisermaassisussaataitaaffilernagu tunniunneqarsimanera apeqqutaatinnagu. Uani assersuutigalugu illuaraqarfinni illuaqqap piginnittua kuummit illuaqqamut imermut aqqusiisimatillugu imaluunniit aalisarnermut imaluunniit takornarialerinermit atatillugu ingerlatat imminerminni piginnittussaataitasut pisuussummik atuinerinut akornusiitinnagit pingaaruteqarsinnaavoq.

#### *§ 24-mut*

Imm. 1-imut.

Piginnittussaataitaasup pisuussummik avammut tunisinermiut Namminersorlutik Oqartussanut akiliuteqarnissaa pillugu, aalajangersakkap Naalakkersuisut akuersissummi piumasaqaatinik aalajangersaasinnaatippai.

Imm. 2-3-mi aalajangersakkat malillugit akiliutissaq aalajangersarneqassaaq.

Sermeq, imerlu misissueqqaarnissamut akuersissummi imaluunniit atuinissamut akuersissummi ilaatinneqartut, Inatsisartullu inatsisaat malilluug avammut tunisinissamut akuersissut naapertorlugu avammut tunineqartut aalajangersakkami pineqarput.

Akiliisussaataitaneq atuutilernersoq, kingorna atuineq pinnagu avammut tunisineq aalajangiisuvoq. Taamaalilluni pisuussut misissueqqissaarnissamik siunertamut atorneqarnersoq, misiligummik tunisassiortoqarnersoq imaluunniit toqqaannartumik niuernissamik siunertaqartoqarnersoq apeqqutaatinnagu akiliisussaataitaneq atuutilissaaq.

Akiliuteqartussaataitaneq akuersissummi aalajangersarneqassaaq. Akiliutissaq minnerpaamik ukiumut ataasiarluni akiligassanngortinneqartassaaq. Taassuma saniatigut piumasaqaatit akuersissummi aalajangersarneqartut malillugit piginnittussaataitaasoq akiliissaaq. Nalinginnaasumik § 42, imm. 3 malillugu avammut tunisinerup nalunaarutigineqarneranut atatillugu akiliuteqartoqartassaaq. Nalunaaruteqartussaataitaneq pillugu malittarisassat ersarinnerusumik misissornissaannut § 42, imm. 3-mut nassuiaatit innersuussutigineqarput.

Imm. 2-mut.

Tunisassiormermit akitsuutitigut, ukiumoortumillu tunngaviusumik akiliuteqartarnikkut kiisalu naatsorsuinissami ersarinnerusumik tunngavissatigut akiliutissaq ataavartumik akilerneqartarsinnaasoq aalajangersakkap aalajangersarpaa.

Akilerarusiineq pineqanngilaq.

Sermeq, imerlu iluaqutigineqartut tunuliaqutaralugit, tunisassiornermut akitsuut naatsorneqassaaq. Taamaalilluni akiliutissaq nikerarsinnaavoq.

Sermimut, imermullu niuernermik tunngavilimmik atuinissaq siunertaralugu avammut tunineqartumut Namminersorlutik Oqartussat akiliiffigineqarnissaat, tunisassiornermut akitsuutip qulakkiissavaa.

Kalaallit Nunaannit anninneqartup annertuussusaa naatsorsuinermit tunngavissiissaaq. Naatsorsuinermit imermut kubikmeter, sermimullu tons aallaavigineqassapput.

§ 42, imm. 3 naapertorlugu piginnittussaatitaasup avammut tunisani nalunaarutigissallugu pisussaaffeqarpoq. Qanoq annertutigisumik avammut tunisisoqarnerseqqat nalunaarummi allassimassaaq. § 42, imm. 3-mut nassuiaatit innersuussutigineqarput.

Sermimik, imermillu avammut tunisinernut Namminersorlutik Oqartussat allaffissornermit aningaasartuutaanut matussutissatut, ukiumut tunngaviusumik akiliutissaq aalajangersarneqassaaq. Piginnittussaatitaasut ataasiakkaat sermimik imaluunniit imermik avammut tunisaasa annertuussusaaq imaluunniit ingerlatat qanoq annertutiginersut apeqqutaatinnagit, tunngaviusumik akiliutissaq ukiumut akiliutissaavoq aalajangersimasooq. Taamaakkaluartoq Namminersorlutik Oqartussat sermimik, imermillu avammut tunisinermut atatillugu siammasissumik allaffissornermit aningaasartuutaannut matussusiissapput. Assersuutigalugu siunnersuutip § 40-a malillugu nakkutilliinissamut aningaasartuutissat ilaatinneqarsinnaapput. Tassunga tunngatillugu oqaatigineqassaaq, suliniutip angissusaa katitigaaneralu kiisalu nakkutilliineq sumi ingerlanneqarnerseqqat, matumani aamma sumiiffiit tikikkuminaannersut apeqqutaatillugit aningaasartuutit taakkua annertussusilerneqaratarsinnaammata. Taamaalilluni akiliutissat taakkununga aningaasartuutitut naapertuutissapput.

Imm. 3-mut.

Tunisassiorneq Kalaallit Nunaanni imaluunniit avataani pinersooq imaluunniit bulkimut avammut tunisisoqarniarnersooq apeqqutaatillugu, akiliutit nikerarsinnaasut aalajangersakkap aalajangersarpaa.

Taamaalilluni aalajangersagaq ima paasineqassaaq, tunisassiornermut akitsuut aamma ukiumut tunngaviusumik akiliutissat nikerarsinnaasut. Taamaalilluni suliniutitut ataasiakkaanut naleqqussakkanik, akiliutissat pillugit piumasaqaasiortoqarsinnaavoq. Kalaallit Nunaanni tunisassiorortoqaruni malitsigisaanik Kalaallit Nunaat isertitaqarsinnaammat, Kalaallit Nunaanni tunisassiornermut appasinnerusunik akiliuteqartitsisoqarnissaanut tunngavissaqarpoq.

Suliniuummi nioqqutissiortoqassanersooq, nioqqutissiornertu sumiissanersooq aalajangiisuuvoq. Nioqqutissiornermi assersuutigalugu maqitsineq, poortuinerlu ilaasinnaapput.

Nioqqutissiormi assartuinerinnaq imaluunniit imermik annertuukkuutaanik, tankimut nuutsineq ilaatinneqanngillat.

Taamaalilluni imermik annertuukkuutaanik avammut tunisinermi, imeq suliarinagu imaluunniit poortueqqaarani imaluunniit tamanna siunertaralugu annertoq assartorneqartarmat immikkoorutigaa.

Qinnuteqartup avammut tunisinissaminik qinnuteqarnermini paasissutissiissutigissavaa, tunisassiornissaq Kalaallit Nunaanni imaluunniit avataani pissanersaq imaluunniit imermik annertuukkuutaanik avammut tunisisoqarniarnersaq, tak. siunnersuummi § 34, imm. 1, nr. 2.

Imm. 4-mut.

Aalajangersakkap aalajangersarpaa, § 24 malillugu akuersissuummi piumasaqaatit aalajangersarneqartut naapertorlugit piginnittussaataasup akiliutissaq akilinnippagu, akiitsut pisortanut akiitsutut isigineqassapput.

Kalaallit Nunaanni pisortanut akiitsut akilersinniarneqartarnerini malittarisassat atuuttut naapertorlugit akiitsut Akileraartarnermut Aqutsisoqarfimmit akilersinniarneqarsinnaapput.

Akiitsut 100.000 koruunit sinneqarpata § 38, nr. 1, tak. § 12, imm. 2, tak. § 14 malittarisassat naapertorlugit akuersissutit utertinneqarnissaanut tunngaviusinnaavoq. Akiliutissap akilerneqarnissaa pillugu piumasaqaat annertuumik imaluunniit ataasiaannaarani unioqquatinneqarpata, § 38, nr. 3-mi malittarisassat naapertorlugit akuersissut utertinneqarsinnaassaaq. Taamaakkaluartoq pisuni tamani tamanna naleqqutissanersaq nalilerneqartuaannassaaq, matumani aamma aningaasatigut unamminartut qaangiuttusaanersut ilanngullugu. Utertitsineq pillugu malittarisassat ersarinnerusumik misissornissaannut, § 38, nr. 1-imut aamma 3-mut nassuiaatit innersuussutigineqarpata.

Imm. 5-imut.

Akiliutissat pillugit malittarisassanik ersarinnerusunik, aalajangersakkap Naalakkersuisut aalajangersaasinnaatippai.

Tamanna nalunaarummi pisinnaavoq.

Imm. 1-3 malillugit akiliutissap naatsorsorneqarnissaa, annertussusissaalu pillugit Naalakkersuisut malittarisassanik aalajangersaasinnaapput. Tassani imm. 3 tunngavigalugu, suliarinninnerit annertussusaat apeqqutaatillugit assigiinngitsunik akigititaqartoqarsinnaavoq, matumanilu aamma imeq suliarinneqqaarani imaluunniit assersuutigalugu puujaasamut maqeriarlugu umiarsuarmik assartorneqarnerisat ilanngullugu. Taassuma saniatigut akigititanik aalajangersaanermi tunngavissat allat ilaatinneqarsinnaassapput, matumani aamma soorlu niuernermi akigititat, unammilleqatigiinnermilu atugassaritat ilanngullugit.

Taassuma saniatigut aningaasanut inatsimmi aalajangersarneqarlutik aningaasatigut sinaakkutissat iluini akiliutissat annertussusissaat aalajangersarneqarsinnaassasoq naatsorsuutigineqarpoq.

Taassuma saniatigut akiliutissanut piumasaqaatinik, matumani piffissaliussat ilanngullugit Naalakkersuisut ersarinnerusunik malittarisassiorsinnaanissaannut pisinnaatinneqarput.

### § 25-mut

Imm. 1-imut.

§ 4 malillugu akuersissutip tunniunneqartup malitsigisaanik ingerlatsinermiit ajoqusikkat taarserneqarnissaat, piginnittussaatitaasup akisussaaffigigaa aalajangersakkap aalajangersarpaa. Akuersissut malillugu ingerlatsinikkut ajoqusikkat akisussaaffigineqarnissaanut, akisussaasutut tunngaviusariaqartumik aalajangersagaq aalajangiivoq. Taassumap kingunerisaanik piginnittussaatitaasup taarsiissussanngortinneqarnissaani, mianersugaalliornermik ersersitsisoqarnissaa piumasaqaataannngilaq.

Ajoqusernerit suulluunniit, matumani inunnik aamma pigisanik ajoqusiinerit ilanngullugit, akisussaaffigineqassapput.

Piginnittussaatitaasup akisussaaffigisassaminik ajoqusiisimasooq ajoquserneqartup nammineerluni uppersarsaasiinnnginnissaa akisussaaffiliinerup qulakkiissavaa. Ajoquserneq ingerlatap pineqartup kingunerisaanik ajoqusernerusooq, ajoquserup kisiat uppersarsassavaa,. Akuersissuteqartariaqarlutik ingerlatat ajoqusiinissamut immikkut aarlerinarsinnaanerit, matumani avatangiisinut ajoqusiisinnaanerit imaluunniit allat piinik ajoqusiisinnaanerit ilanngullugu, akisussaasutut tunngaviusariaqarnermut patsisaavoq.

Akuersissummut ilaanatik ingerlatat malitsigisaannik ajoqusertoqarpat, taarsiissuteqarnissamut nalinginnaasumik inatsisitigut malittarisassat naapertorlugit imaluunniit inatsit alla naapertorlugu akisussaaffik nalilerneqartariaqarpoq.

Imm. 2-mut.

Ajoqusertoq ajoqusiinermut pisooqataasimappat, imm. 1 malillugu taarsiineq annikillisinneqarsinnaavoq imaluunniit atorunnaarsinneqarsinnaavoq. Taamaattoq ajoquserneqartoq piaarluni imaluunniit mianersugaalliorujussuarluni ajoqusernermut pisooqataasimappat aatsaat, taarsiineq annikillisinneqarsinnaavoq imaluunniit atorunnaarsinneqarsinnaavoq.

Soorlu assersuutigalugu ajoquserup assiaqutit isumannaallisaataasut peersimappagit, iseqqusinnginnerit isiginngitsuusaarsimappagit imaluunniit mianersooqqussutit ersarilluinnartut malissimannngippagit. Ajoqusertoq patsisissaqarani sumiiffimmi

ulorianarsinnaasunik ingerlatsivimmiissimaguni, ulorianartorlu pillugu ersarissumik allagartalersuisoqarsimatillugu imaluunniit allatigut paasissutissiisoqarsimatillugu annertuumik mianersuaalliornerusinnaavoq.

### § 26-mut

Imm. 1-imut.

§ 4 malillugu akuersissut tunniunneqartoq malillugu ingerlatat inuussutissarsiornermi akisussaanermut sillimmasersimassasut, allatigulluunniit qularnaveeqquserneqarsimassasut aalajangersakkap aalajangersarpaa. Ingerlatat kinguserisaannik ajoqusernerusinnaasut matussuserneqarsinnaaniassammata aningaasatigut qularnaveeqqusersimanissaq qulakkiissallugu, piumasaqaatip taassumap siunertaraa. Inuiaqatigiit aamma inuit imaluunniit suliffeqarfiit, ingerlatanit pineqartumut eqqorneqarsinnaasut illersorneqarnissaanni tamanna pingaaruteqarpoq.

Pisinnaatitsissummik pigisaqartup ingerlatsinermi kingunerisaanik taarsiissuteqarnissamik piumasaqaataaratarsinnaasumut qularnaveeqqusersimanissaa, sillimmasiissuteqarnissamik piumasaqaatip qulakkiissavaa.

Imm. 2-mut.

Sillimmasersimanissamik imaluunniit qularnaveeqqusiinissamik piumasaqaat naammassineqarsimatinnagu ingerlatat aallartinneqaqqusaanngitsut, taamaalillunilu ajoquserneqaratarsinnaasut taarsiiffigineqarnissaannut qularnaveeqqusiisoqarsimanissaa imm. 2-p ersarissarpaa..

Imm. 3-mut.

Sillimmasiinissamut imaluunniit qularnaveeqqusiinissamut pisussaaffik pillugu piumasaqaatinik ersarinnerusunik Naalakkersuisut aalajangersaasinnaapput. Tamanna ilaatigut qanoq annertutigisumik sillimmasersimanissamik, sillimasiissutillu aningaasartassaannut ersarissaanerusinnaavoq. Taassumap saniatigut akuersissut malillugu ingerlatanik ingerlatsinermi nioqqutinik pilersuisut taarsiinissamut akisussaaffigisaannut tunngatillugu, piginnittussaataasup nioqqutinik imaluunniit sullissinernik pilersuisui sillimmasersimanissaannik imaluunnit allatigut qularnaveeqqusiisimanissaannik piumasaqaatinik Naalakkersuisut aalajangersaasinnaapput.

Imm. 4-mut.

Sillimmasersimanissamut aamma qularnaveeqqusersimanissamut piumasaqaatinik ersarinnerusunik, aalajangersakkap Naalakkersuisut aalajangersaasinnaatippai. Uani sillimmasiissutit aningaasartassaannut, matussusiinissap annertussusissaannut kiisalu qanoq ittunik, qanorlu annertutigisumik qularnaveeqqusersimanissamut piumasaqaatit ilaatinneqarsinnaapput.

*§ 27-mut**Imm. 1-imut.*

Avatangiisinik, nunatamillu pineqartumik iluarseeqqinnissamut aningaasartuutaasinnaasut matussuserneqarnissaannut piginnittussaataasup aningaasatigut qularnaveeqqusiisimanissaa pillugu, Inatsisartut inatsisaat manna malillugu akuersissummi tunniunneqartumi, aalajangersakkap Naalakkersuisut piunasaqaatinik aalajangersaasinnaatippai. Avatangiisit ajoquserneqarsimatillugit piginnittussaataasup nammineerluni iluarseeqqinngippat, aningaasanik atugassaqaarnissaanut qularnaveeqqusiussat naammassapput, taamaalilluni iluarseeqqinnissami aningaasartuutissat pisortanit akiligassanngortinneqannginnerussammata..

Ingerlatat naammassineqareerpata iluarseeqqinnissaq aalajangersakkami pingaarnertut siunnerfigineqarpoq, aammali piffissap akuersissuteqarfiusup ingerlanerani § 26 malillugu sillimmasiissutitut ilaannngitsumik iluarseeqqittoqartariaqartoq naliliisoqartillugu pingaaruteqarsinnaalluni.

Qularnaveeqqusiinissamut Naalakkersuisut akuersissummi ersarinnerusunik piunasaqaasiorsinnaapput, matumani pisut suut qularnaveeqqusiinissamut ilaatinneqassanersut, aningaasanillu atugassiineq ilanngullugu.

*Imm. 2-mut.*

Suliniutip qanoq ittuunera, annertussusaa, avatangiisinut sunniutaasinnaasut kiisalu iluarseeqqinnissami aningaasartuutissatut missiliussat tunuliaqutaralugit qularnaveeqqusiussassat annertussusissaat, ilusissaallu Naalakkersuisunit aalajangersarneqassasut, aalajangersakkap aalajangersarpaa.

Qularnaveeqqusiussaq assersuutigalugu aningaaserivimmi qularnaveeqqusiunneqassasoq, akiligassanut akissat qularnaveeqqutitut toqqorneqassasoq imaluunniit ingerlatseqatigiiffik piginnittoq qularnaveeqqusiissasoq Naalakkersuisut aalajangersarsinnaavaat.

Naleqquttumik tunngaveqartitsinissamut aalajangersagaq atavoq, tassanilu ingerlatat kingunerisaannik avatangiisitigut akornusiisinnaanernut naapertuuttumik qularnaveeqqusiisoqassalluni. Akornuserneqaratarsinnaasunut, iluarseeqqinnissamilu aningaasartuutaasinnaasunut qularnaveeqqusiussat naapertuunnissaat, ingerlatallu assigiinngissusaasa isiginiarneqarnissaat taassumap qulakkiissavaa.

*Imm. 3-mut.*

Pissutsit annertuumik allanngorpata, Naalakkersuisut qularnaveeqqusiinissamut piunasaqaatinik allannguinissaannut imm. 3-p periarfissippai. Uani assersuutigalugu tassaasinnaavoq avatangiisinut sunniutissat imaluunniit iluarseeqqinnissami

aningaasartuutissat ilimageqqaakkamit annertunerussasut paasissutissat takutippassuk. Soorlu aamma akuersissutip annertussusaa allannguiffigineqarpat, soorlu assersuutigalugu sumiiffik akuersissuteqarfiusoq allanngortinneqarpat. Taamaalilluni aularnarveeqqusiineq peratarsinnaasunut qaqugukkulluunniit naleqqussarneqarsinnaavoq.

Qularnarveeqqusiinissamut piumasaqaatinik allannguineq, imm. 2-mi tunngaviit naapertorlugit pissaaq.

### § 28-mut

Imm. 1-imut.

Inatsisartut inatsisaat malillugu akuersissummi piumasaqaatit allat aalajangersarneqarsinnaasut, imm- 1-imi aalajangersagaq tamakkiisuunngitsumik allattugartaqarpoq. Taamaalilluni § 4 malillugu atuinissamut akuersissutit aamma § 10 malillugu avammut tunisinissamut akuersissutit pineqarput. Akuersissutip suussusaa, suliniullu pineqartoq apeqqutaatillugit piumasaqaatinut nikerarsinnaasunut, aalajangersagaq pingaarnertut sinaakkutissiivoq.

Malittarisassatigut pisariaqartumik Naalakkersuisut eqaassuseqartinniarlugit, ilutigisaanillu sumi nalinginnaasumik piumasaqaatinik aalajangersaanissap pisariaqarsinnaaneramik qitiusumik takussutissiitillugu, aalajangersagaq siammasissumik oqaasertalerneqarpoq. Taamaakkaluartoq ingerlatsinermi inatsisitigut nalinginnaasumik tunngavissat naapertorlugit, matumami naligiissitsinissamut tunngavik aamma naleqquttumik tunngaveqartitsinissaq ilanngullugit, piumasaqaatinik aalajangersaasoqartassaaq.

Nr. 1

Akuersissutit uninnessaat, atorunnaarnissaat aamma utertinneqarnissaat pillugit ersarinnerusunik piumasaqaasiortoqarsinnaavoq, akuersissutillu eqaatsumik aqunneqarnissaat taassumap qulakkiissallugu, matumani aamma sumiginnaasoqartillugu, pissutsit allanngornerini imaluunniit malittarisassat naleqqussarneqarnissaannik pisariaqartitsisoqarnissaa ilanngullugit.

Aalajangersakkap kingunerisaanik akuersissut qaqugukkut, susoqartillugulu uninnessaanut, atorunnaarnissaanut imaluunniit utertinneqarnissaanut piumasaqaatinik aalajangersaasoqarsinnaavoq.

Piffissap atorunnaaneratigut imaluunniit akuersissutip nalinginnaasumik pisoqarneratigut naammassineratigut uninneq pissaaq.

Akuersissummi piumasaqaataasoq imaluunniit piffissaliussaq malinneqanngippat, atorunnaarsitsinermi akuersissut immi atorunnaartarpoq. Akuersissummik atorunnaarsitsineq imaaliillaannaq pissaaq, tamannalu pillugu ingerlatsinermi inatsisitigut immikkut aalajangiisoqassanani. Assersuutigalugu ingerlatseqatigiiffik akuersissummik

tunineqarsimasoq pinngitsaaliisummik atorunnaarsitaasimappat, allatigulluunniit atorunnaarsimappat atorunnaarsitsisoqarsinnaavoq.

Utertitsinerup kingunerisaanik, ingerlatsinermi inatsisitigut aalajangiinerup kingunerisaanik akuersissut unissaaq. Sumiginnaaneq, siuariartunnginneq, akuersissutilluunniit atorunnaarsinneqartariaqarneranut pissutsit allat tunuliaqutaralugit tamanna pisinnaavoq. Taamaalluni utertitsineq naliliinermik, aalajangiinermillu tunngaveqartariaqarpoq, tassanilu suliat suliarineqartarnerinut inatsimmi malittarisassat malinneqassapput, ingerlatsinermi inatsisitigut nalinginnaasumik tunngavissat isiginiarneqassapput, matumani illuatungerisamik tusarniaanissaq pillugu malittarisassat ilanngullugit.

Nr. 2

Pisuussut qanoq annertutigisoq atorneqassanersoq aamma atorneqarsinnaanersoq pillugu piumasaqaatinik Naalakkersuisut aamma aalajangersaasinnaapput.

Piginnittussaataasup pisuussut minnerpaamik qanoq annertutigisoq atussallugu pisussaaffigineraa pillugu Naalakkersuisut piumasaqaasiorsinnaapput. Taamaalluni suliniut aningaasatigut, ingerlatsinikkullu piujuartissinnaallugu, pisuusummik atuineq minnerpaatut ingerlanneqarnissaa qulakkeerneqassaaq.

Taassuma saniatigut piginnittussaataasup pisuussut annerpaamik qanoq annertutigisoq atussaneraa Naalakkersuisut piumasaqaasiorsinnaapput. Uani assersuutigalugu pisuusummik piujuartitsisussamik atuinissaq qulakkeerumallugu naleqqussinnaavoq.

Annertussuseq pillugu piumasaqaasiormi, § 33 imm. 1, nr. 3 malillugu piginnittussaataasup pisuussut naatsorsuutigisamik atugassatut suliniutissatut pilersaarummi taasaa Naalakkersuisut ilaatigut ilanngussinnaavaat. Assinganik sermeq, imerlu avammut nioqqutissatut missiliorlugu qinnuteqartup qinnuteqaammini paasissutissiisutigisaa, avammut tunisinissamut akuersisummi piumasaqaatinut ilaatinneqarsinnaavoq.

Aalajangersagaq § 22-mi ingerlatsisussaataitanermut atatillugu isigineqassaaq, taassumallu kingorna piginnittussaataasooq akuersisummut naapertuuttumik ingerlatsinissamik pisussaaffeqassalluni. Minnerpaamik ingerlatsinissap qulakkeerneqarneratigut minnerpaaffiliineq ingerlatsisussaataitanermut tunngavissiivoq, akuerisaasumillu annerpaamik atorsinnaasap pisuusummik annerpaamik atuinissaq killilerlugu.

Nr. 3

Iluarsaassineq, iluarseeqqinnerlu pillugit piumasaqaatinik aalajangersaasoqarsinnaavoq. Taassumap kingunerisaanik, assersuutigalugu ingerlatat unitsillugit piginnittussaataasooq sumiiffik illersorneqarsinnaasumut utertillugu iluarseeqqinnissaanik imaluunniit ataavartumik iluarsaassisarnissaanik pisussaaffilerneqarsinnaavoq.

Nr. 4

Aarlerinarsinnaasut millisinniarlugit, ingerlatsinerlu illersorneqarsinnaasoq qulakkeerumallugu teknikkikkut, isumannaallisaanermut, pinngortitamut, avatangiisinullu tunngasunut piumasaqaasiortoqarsinnaavoq. Assersuutigalugu atortut uppersaasarsimanissaannut, ikuallattoqaratarsinnaaneranut illersuinissamut aamma aqqutissianik nakkutilliinissamut, atortut avatangiisinut ulorianannginnissaannut, eqqagassalerinermullu tunngatillugu piumasaqaataasinnaapput. Pinngortitamik, avatangiisinullu illersuinissaq pillugu piumasaqaatit aamma piumasaqaataasinnaapput.

Nr. 5

Sermeq aamma imeq iluaqutissatut, illup iluani, assigisaanilluunniit atorneqartussaattillugu inuit peqqissusaasa illersornissaq eqqarsaatigalugu pitsaassutsimut tunngasunut aamma peqqissutsimut tunngasunut piumasaqaatinik aalajangersaasoqarsinnaavoq.

Piumasaqaatinik aalajangersaanermi nunami niuerfimmi tuniniagassat imaluunniit avammut tunisassat immikkoortinneqarsinnaapput.

Nr. 6

Aalajangersagaq nr. 5-imut atasutut isigineqassaaq. Sermeq aamma imeq iluaqutissatut, illup iluani, assigisaanilluunniit atorneqartussaattillugu piumasaqaatinik aalajangersaanermi, nakkutilliinissaq pillugu aamma piumasaqaasiortoqarsinnaavoq, matumani malittarisassat atuuttut malinneqarnissaasa qulakkeerneqarnissaannut, piginnittussaattitaasup nammineq nakkutilliinissaa ilanngullugu.

Imm. 2-mut

§ 4 aamma § 10 malillugit akuerisissutit naapertorlugit sermimut, imermullu atorneqartumut aamma avammut tunisassiarineqartunut uppersaasiisarnissaq pillugu malittarisassanik ersarissunik aalajangersaasinnaanissaannut, imm. 2-p Naalakkersuisut piginnaatippai. Taamaalilluni akuersisummik pissarsiniarluni, nioqqutit pitsaassusissatut aalajangersakkanik malinninnissaat pillugu malittarisassanik aalajangersaasoqarsinnaavoq. Uppersaasiineq nioqqutit pitsaassusiinik qulakkeerinissamut sakkusaallunilu, nioqqutit uppersaakkamik qaffasissumik pitsaassusilerlugit nioqqutigineqarnissaannut sakkusaapput. Ilaatigut uppersaasiinissamik atorneqarsinnaasumik, qanoq pitsaassuseqarneranik nalunaarnissamut immikkoortunik aalajangersaasoqarsinnaavoq.

§ 29-mut

Imm. 1-imut.

Pinngortitamik illersuineq pillugu Inatsisartut inatsisaanni § 41, imm. 1-imi malittarisassat malillugit qinnuteqartoq pinngortitamut kingunissaanik naliliissasoq, aalajangersagaq pumasaqaammik aalajangersaavoq.

Aalajangersakkap kingunerisaanik annertunerusumik illuliortiternissamik, sanaartornissamillu imaluunniit suliffeqarfinnik pilersitsinissamik pilersaaruteqartoq, suliniut aallartitinnagu pinngortitamut kingunissaanik naliliissaaq. Tassani suliniummut pilersaarutit kiisalu nunamut imaluunniit kangerlummumut aamma immamut qanoq kinguneqassangatinneqarnerisooq nassuiaatigineqassapput.

Naatsorsuutigisamik nunamut imaluunniit kangerlummumut aamma immamut aamma pinngortitamut kingunissai, pinngortitamut kingunissaanik naliliinerup ersarissassavaa. Suliniutip kingunerisaanik nunap aamma sumiiffiup isikkuanut, pinngortitallu qanoq issusaanut allannguutissaviit, naatsorsuutigisamillu allannguutissat pinngortitamut kingunissaanik naliliinissami allaaserineqassapput. Uani assersuutigalugu nunap ilusaa, kangerlummumut imaluunniit immamut sunniutissat kiisalu uumasut najortagaannik, naasoqarfinnillu akornusersuinerit imaluunniit aserorterinerit ilanngullugit.

Naalakkersuisut suliniutip kingunissaanik naliinissaanni, akuersissummilu piimasaqaasiornissaannut, pinngortitap illersorneqarnissaanut pinngortitamut kingunissaanik naliliineq tunngavissiissaaq. Taamaattumik Inatsisartut inatsisaat malillugu Naalakkersuisut akuersissummik tunniussitinnagit, pinngortitamut kingunissaanik naliliineq tunniunneqarsimassaaq. Tassunga atatillugu qinnuteqaatip imarisassaa pillugu § 32-mi nassuiaatit innersuussutigineqarput.

Suliniutip pinngortitamut sunniutigeratarsinnaaneranik naliliinermik aallaavilimmik, pingaaruteqassusianik naliliisoqassaaq. Taamatut naliliinissami suliniutip qanoq ittuussusaa, annertussusaa, sumiiffiup mianernassusaa, allannguutaasinnaasullu qanoq annertutigissanersut pingaartinneqarsinnaavoq. Uumasunut sunniutissat eqqarsaatigalugit suliniut uumasooqarfinnut, piaqqiorfinnut imaluunniit timmissatmiluumasut, nunamilu uumasut ingerlaarfiinut sunniuteqassanersooq pingaartinneqarsinnaavoq. Suliniummi sanaartortoqartariaqassappat, Inatsisartut inatsisaat manna malillugu akuersissut imminermi sanaartukkanik pilersitsinissamut periarfissiinnngikkaluartoq, pingaaruteqassutisimmut piimasaqaataasup naammassineqarnissaanut tamanna imminermi tapertaasinnaavoq. Taamaakkaluartoq suliniutip ingerlanneqarnissaanut sanaartortoqarnissaa aalajangiisuusinnaavoq, taamaattumillu akuersissummik tunniussoqartinnagu pinngortitamut kingunerisinnaasai tamakkerlugit qulaajarneqarsimanissaat aalajangiisuulluni.

Nassuiaasiussalluni qinnuteqartup akisussaavoq, taanna suliniutip sunniutigisinnaasaannut ilisimasaqarnerpaammat. Suliniummik pilersaaruteqarlunilu ingerlatsisoq, avatangiisinut kingunerisinnaasaanik uppersaanissamut aamma akisusaaaneranik tunngaviusumut aalajangersagaq naapertuuppoq.

Imm. 2.

Pinngortitamut kingunissaanik naliliinissamut piumasaqaatit pillugit, aalajangersakkap Naalakkersuisut ersarinnerusunik malittarisassiorsinnaatippai. Pinngortitamut kingunissaannik naliliinissap imarisassaaa aamma annertussusissaa, uppersaasiinissamut piumasaqaatit, suliamut ilisimasalinnik naliliisitsinerit kiisalu nassuiaatip ilusissaanut piumasaqaatit pillugit piginnaatitsissummut aalajangersagaq nalunaarutitigut atortuulersinneqarsinnaavoq.

Nalinginnaasunik malittarisassiortoqarsinnaavoq imaluunniit suliniutit, sumiiffiilluunniit aalajangersimasut siunnerfigineqarsinnaallutik.

Taassuma saniatigut sermimik, imermillu misissueqqaarnissamut aamma atuinissamut atatillugu pinngortitamik illersuinissaq pillugu malittarisassanik Naalakkersuisut aalajangersaasinnaatinneqarput. Tassani assersuutigalugu ungasissutsinut piumasaqaatit pillugit malittarisassat, ataavartumik nalunaarusiortarnissaq aamma sermimik, imermillu assartuinnermut aamma uninngasuuteqarnermut, sumiiffinniillu aalajangersimasunit sermimik aamma imermik qanoq annertutigisumik atuisoqarsinnaanernut killissat pillugit malittarisassat ilaatinneqarsinnaapput.

### § 30-mut

Imm. 1-imut.

Akuersissut malillugu ingerlatat unitsinneqarnissaannik Naalakkersuisut peqqusinissaannut, aalajangersakkap inatsisitigut tunngavissaqartippai.

Aalajangersakkap kingunerisaanik, ingerlatat aalajangersimasut unitsinneqarnissaannik Naalakkersuisut peqqusisinnaapput. Ingerlataq nunap isikkuanut, kangerlummumut aamma immamut imaluunniit pinngortitamut ilimanartumik annertuumik ajoqusiisinnaasoq ilimagineqarpat, unitsitsinissamut peqqusisoqarsinnaavoq.

Suliniut ilimanartumik annertuumik ajoqusiissanersoq pillugu naliliinissami pisoq, pissutsillu piviusut aallaavigineqassapput. Assersuutigalugu soorlu akuersissutip tunniunneqarneranit ilimagisimasamit ingerlatassaq annertunerussasoq paasinarsippat imaluunniit avatangiisit naatsorsuutiginngisamik sunnerneqarpata.

Unitsitsinissamik peqqussut ataavartuunngilaq, pissutsillu ersarinnerusumik misissorneqarsinnaanissaasa imaluunniit ikiuutaasinnaasunik iliuuseqartoqarnissaata tungaanut annertuumik ajoqusiinissap pinngitsoortinnissaa siunertaralugu tunniunneqassalluni.

Avatangiisit innarlitsaaliorneqarnissaanik Inatsisartut inatsisaat naapertorlugu peqqussuteqarnissamut periarfissat aalajangersakkap ilavai. Nunap, kangerluup aamma immap imaluunniit pinngortitap annertuumik ajoqusernissaa aalajangersakkap pinaveersaartissavaa, taamaalillunilu ajoqusiisoqanngitsoq suli atuutilereerluni. Ingerlataq alla ajoqusiisoq pineqarpat, aalajangersagaq tunngavigalugu peqqussuteqartoqarsinnaanngilaq,

tamannali inatsit alla malillugu pisariaqarluni, matumani Avatangiisit innarlitsaaliorneqarnissaanik Inatsisartut inatsisaat ilanngullugu. Uani assersuutigalugu peqqissutsimut imaluunniit avatangiisitigut ajornartorsiuteqalermik kinguneqartumik allat ingerlatsinerini atuuppoq.

Akuersissummik tunniussisoqartinnagu qinnuteqartup pinngortitamut kingunissaanik naliliinissamik pisussaaffia pillugu, aalajangersagaq § 29-mut atasutut isigineqassaaq. Pinngortitamut kingunissaanik naliliineq suliarineqareersimagaluartoq, akuersissutip tunniutereernerani ingerlataq nunap isikkuanut, kangerlummumut aamma immamut imaluunniit pinngortitamut ilimanartumik annertuumik ajoqusiisinnaasoq ilimagineqalerluni nutaanik pissuteqarsinnaavoq, nutaanilluunniit ilisimasaqartoqalersinnaalluni.

Ingerlataq annertuumik ajoqusiisinaanani, pissutsillu iluarsineqarsinnaanngippata pissutsit patsisaallutik § 38, nr. 5 malillugu akuersissut utertinneqarsinnaavoq. Utertitsineq pillugu malittarisassat ersarinnerusumik misissornissaannut, tassunga nassuiaatit innersuussutigineqarput..

Imm. 2-mut.

Imm. 1 malillugu ingerlatamut inerteqquteqarnissamut aalajangersakkap Naalakkersuisut inatsisitigut tunngavissaqartippai. Aalajangersagaq imm. 1-ip malitsigisaatut isigineqassaaq, ajoqusiinerlu unitsitsinikkut imaluunniit pinaveersaataasumik iliuuseqarnikkut pinngitsoorneqarsinnaatinnagu aamma nunap isikkua, kangerluk aamma imaq imaluunniit pinngortitaq illersorniarlugit pisariaqartutut nalilerneqartillugu atuutissalluni.

Ingerlataq ilimanartumik annertuumik ajoqusiissasoq nalilerneqarpat, pissutsillu iluarsineqarsinnaatinnagit inerteqquteqarneq atorneqarsinnaavoq.

Ingerlatamut inerteqquteqarneq pisut apeqqutaatillugit, § 38-mi aalajangersakkat malillugit akuersissut utertinneqarsinnaavoq. Matumani aamma nunap isikkuanut, kangerlummumut aamma immamut imaluunniit pinngortitamut annertuumik ajoqusiinissamik ilimanaateqanngitsunik allatigut ingerlatatigut ingerlatsisuussaataitaneq naammassineqarsinnaanngippat.

### *§ 31-mut*

Imm. 1-mut.

Qinnuteqariaatsimut pingaarnertut sinaakkutit, Inatsisartullu inatsisaat malillugu Naalakkersuisut akuersissutiniq qanoq tunniussisinaanersut aalajangersakkap aalajangersarpaa.

Qinnuteqartoqarneratigut imaluunniit imm. 2-mi malittarisassat malillugit tamanut ammasumik qinnuteqartitsinikkut (neqeroortitsineq) Naalakkersuisut akuersissutinik tunniussinissaannut, aalajangersakkap periarfissaqartippai.

Neqeroortitsinermi akuersissut ataaseq imaluunniit amerlanerusunut tunniunneqarsinnaapput. Taassumap saniatigut neqeroortitsineq sumiiffimmut ataatsimut imaluunniit amerlanerusunut tunngassuteqarsinnaavoq.

Imm. 2-mut.

Tamanut ammasumik qinnuteqaqqusineq qinnuteqarfissamut killissarititaasoq naatinngu minnerpaamik ullorsiutini ulluni 90-ini saqqumitinneqassasoq imm. 2-p ersarissarpaa. Saqqummiineq Naalakkersuisut nittartagaanni aamma allatigut pissaaq, matumani aamma assersuutigalugu aviisini, tusagassiorfinnilu allani saqqummiussinikkut.

Taassumap saniatigut toqqaanissami piumasaqaatinik naleqquttunik, kinaassusersiunngitsunik, immikkoortitsinerunngitsunillu Naalakkersuisut aalajangersaasinnaapput. Tamanna kinaassusersiunngitsumik toqqaanissamik piumasaqaatinut aamma atuuppoq. Tamanna piumasaqaatinik sunik atuisoqarnissaanik naliliinissamik tunngaveqarpoq. Qinnuteqartut akornanni toqqaanissap naleqquttumik, isertuaatsumillu ingerlanissaa toqqaanissamik piumasaqaatinik aalajangersaanerup qulakkiissavaa.

Imm. 3-mut.

Aalajangersakkami allassimavoq, suleriaatsit aalajangersarneqarsimasut malillugit qinnuteqartoqarsimagaluartorluunniit Naalakkersuisut akuersissummik tunniussinngissinnaasut. Akuersissummik tunniussinissaq qaqugukkut naleqqutissanersaq pillugu Naalakkersuisut aalajangiisinnaanissaannut tamanna eqaassuteqartitsivoq, aamma qinnuteqarnissamut pisortatigoortumik piumasaqaataasut qinnuteqaatip naammassippagit.

Qinnuteqartoq akuersissut inatsisitigut pisinnaatitaaffiunngitsoq aalajangersakkap ersarissarpaa. Taamaakkaluartoq qinnuteqaatinik itigartitsitsinerni tamani ingerlatsinermi inatsisitigut nalinginnaasumik tunngavissat malillugit, Inatsisartullu inatsisaanni malittarisassat allat naapertorlugit pisassaaq.

Imm. 4-mut.

Neqeroortitsinissat qanoq ingerlanneqarnissaannut malittarisassanik ersarinnerusunik Naalakkersuisut aalajangersaasinnaanissaannut aalajangersakkap pisinnaatippai. Uani suleriaasissap qanoq aaqquissuunneqarnissaannut malittarisassat ilaatinneqarsinnaapput, matuma qinnuteqarnissamut piffissaliussaq, uppenarsaanissamullu piumasaqaatit ilanngullugit.

Qinnuteqaatinik toqqaanissami piumasaqaatit suut pingaartinneqassanersut pillugit, Naalakkersuisut aamma malittarisassanik aalajangersaasinnaapput. Assersuutigalugu

misilittakkat, aningaasatigut imaluunniit teknikkikkut nammassinnaasat pingaartinneqarsinnaapput.

Taassumap saniatigut naliliinissami ataatsimiititaliaq pillugu, taassumallu katitigaanissaa pillugu Naalakkersuisut malittarisassanik aalajangersaasinnaapput. Assersuutigalugu paasisimasqaarnissamut piumasaqaataasinnaapput imaluunniit oqartussanik akuutitsinerusinnaalluni.

### § 32-mut

Imm. 1-imut.

Misissueqqaarnissamut, atuinissamullu piumasaqaatit pillugit qinnuteqaatinut piumasaqaatit § 32-p aalajangersarpai.

Atuinissamut akuersissutinik qinnuteqaatit § 33 naapertorlugu suliniutitut pilersaarummik ilaqassapput. Suliniutitut pilersaarummut piumasaqaatit misissornissaannut tassunga nassuiaatut innersuussutigineqarput.

§ 41 naapertorlugu qinnuteqaat suliarineqarsinnaaqullugu pisariaqartutut nalilernerqartillugu, Naalakkersuisut qinnuteqartumit paasissutissanik annertunerusunik noqqaasinnaapput. Ersarinnerusumik misissuinissamut tassunga nassuiaatit innersuussutigineqarput.

Qinnuteqaammut piumasaqaatissat, paasissutissallu tunniunneqartussat annertussusissaasa inissinnissaanni suliniutip annertussusaa eqqarsaatigineqassaaq. Suliniutini mikinerusuni paasissutissat pisariaqartut, suliniutitut anginerusunut sanaartukkanik il.il. pilersitsiviusariaqartunut sanilliullugu annikinnerusinnaapput.

Nr. 1

Ingerlatassat akuersissummik qinnuteqarfigineqartut, qinnuteqaammi nassuiarneqarsimassapput.

Atuinissamut ingerlatsinissamut imaluunniit misissueqqaarnissamut akuersissummik qinnuteqartoqarnerisat tassani allanneqassaaq. § 4 malillugu ataatsimoortumik qinnuteqaat eqqarsaatigalugu, § 8 malillugu kisermaassisussaatitaaffilerlugu qinnutigineqarpat taanna aamma allanneqassaaq.

Taassumap saniatigut ingerlatassat ataasiakkaat nassuiaatigineqassapput. Pilersaarutaasumik ingerlatassat ersarissumik paasineqarsinnaanngorlugit nassuiaat peqqissaartumik allassimassaaq, taamaalilluni inatsit atuuttoq naapertorlugu nalilernerqarsinnaaniassammata.

§ 4 malillugu atuinissamut qinnuteqaatit eqqarsaatigalugit aalajangersagaq § 33-mut, suliniummut immikkut pilersaaruteqarnissaanik qaavatigut piumasaqaateqartumut atasutut isigineqassaaq.

## Nr. 2

Sermimik, imermillu atuinissamut ingerlatassanik ingerlatsinissamut akuersissummik nunataq qinnuteqarfigneqartoq pillugu qinnuteqaat paasissutissartaqassaaq.

§ 19, sumiiffik akuersissuteqarfiusoq naleqqanik, killiliussanik imaluunniit sumiiffimmut allatigut pingaarutilinnik aalajangersakkatigut killilersorneqarsinnaanerani ersarissaasoq innersuussutigineqarpoq. Taamaalilluni akuersissutip eqqortumik suliarineqarnissaa, killilersorneqarnissaalu qulakkeerumallugu sumiiffiit ingerlatanik ingerlatsiviusussat pillugit, qinnuteqartup eqqortumik nalunaarutiginninnissaa pingaaruteqarpoq.

## Nr. 3

Piginnittussaataasumut §§ 11-13-imi piumasaqaatinik qinnuteqartup naammassinninneranut, qinnuteqaat uppersaatinik ilaqassaaq.

§ 11 naapertorlugu ingerlatseqatigiiffik qinnuteqartoq aktianik piginneqatigiiffiussaaq imaluunniit piginneqataassuteqarluni ingerlatseqatigiiffiussaaq Kalaallit Nunaanni angerlarsimaffeqartoq. Tassunga uppersaatatit assersuutigalugu CVR-inut nalunaarsuiffimmit uppersaata, ingerlatseqatigiiffiup suuneranik, sumilu angerlarsimaffeqarneranik uppersaasoq atorneqarsinnaavoq.

Taassumap saniatigut qinnuteqartup § 12-imi aningaasatigut piumasaqaatit naammassillugit, qinnuteqartup uppersassavaa. Pisortanut akiitsut pillugit akileraartarnermut aqutsisoqarfimmit uppersaata tassunga uppersaataasinnaavoq. Assersuutigalugu ingerlatseqatigiiffimmi aqutsisunut imaluunniit piginnittuvinnut Pinerluuteqarsimasunik Qitiusumik Nalunaarsuiffimmit uppersaatatit (pinerluuteqarsimannginnermut uppersaatatit) kiisalu ingerlatseqatigiiffimmut piumasaqaatit eqqarsaatigalugit ilumoorluinnarluni nalunaarutit aamma uppersaatingeqarsinnaapput.

Kiisalu § 13 naapertorlugu pisariaqartumik qinnuteqartut paasisimasaqarlutik qinnuteqartup uppersassavaa. Tamanna qinnuteqartut piginnaasaannik, misilittagaannillu paasissutissatigut, inuillu attuumassuteqartut CV-annik saqqummiussinikkut uppersarneqarsinnaavoq.

Ersarinnerusumik misissornissaannut §§ 11-13-imut nassuiaatit innersuussutigineqarput.

## Nr. 4

Suliniutip teknikkikkut, aningaasatigullu ingerlanneqarsinnaanera pillugu § 15-imi piumasaqaatit suliniutip naammassissagai pillugu, qinnuteqaat aamma uppersaateqassaaq.

§ 15-imi allassimasutut suliniut teknikkikkut, aningaasatigullu ingerlanneqarsinnaasoq qinnuteqartup qularnarunnaarsippagu aatsaat, akuersissut tunniunneqarsinnaavoq. Piffissami qinnuteqarfiusumi tamanna qularnarunnaarsinneqarsinnaanngippat, piffissaliussatut

aalajangersarneqartup iluani ingerlanneqarsinnaaneranut uppersarsaatip saqqummiunneqarnisaanik piumasaqaatitalimmik, piumasaqaatitalerlugu akuersissummik tunniussisoqarsinnaavoq, tak. § 16.

Akuersissutit, oqartussallu akuersissutaat pisariaqartut allat, qinnuteqartup piffissami qinnuteqarfiusumi pissarsiarisimasai qinnuteqaammut ilanngunneqarsinnaapput.

Ersarinnerusumik misissornissaannut §§ 15-imut aamma 16-imut nassuiaatit innersuussutigineqarput.

Nr. 5

Taassumap saniatigut § 39-mi malittarisassat malillugit, qinnuteqaat pinngortitamut kingunissaanik naliliinermik ilaqassaaq. Qinnuteqartoq isumaqaruni pinngortitamut kingunissaanik naliliisoqartariaqanngitsaq, tamanna qinnuteqaammi tunngavilersorneqassaaq, tak. § 29, imm. 2.

Pinngortitamut kingunissaanik naliliinissamut piumasaqaatit ersarinnerusumik misissornissaannut, § 29-mut nassuiaatit innersuussutigineqarput.

Nr. 6

Illuaraqarfinnut, piniariartarfinnullu sunniutigisinnaasaannik qinnuteqaat naliliinertaqassaaq. Sanaartukkanik pilersitsinermut imaluunniit imermik maqitsinermut atatillugu nipiliornerit malitsigisaannik sumiiffiit taakkua sermimik, imermillu atuinissamik suliniutinit ataasiakkaanit sunnerneqarsinnaapput.

Nr. 7

Kiisalu qinnuteqaat paasissutissanik pingaarutilinnik allanik imaqassaaq. Tassani paasissutissaasinnaapput nr. 1-5-imi eqqaaneqaratik, qinnuteqaammik tamakkiisumik aamma eqqortumik naliliinissamut pisariaqartut.

Taamaalilluni nr. 1-5-imi allattukkat tamakkiisuunngillat.

Naalakkersuisut qinnuteqaammik suliaqarnerini paasissutissat pingaaruteqarsinnaasut, qinnuteqartullugu pigisai aalajangersakkami aamma pineqarput. Aalajangersagaq § 41-mut atasutut isigineqassaaq, taassuma kingorna qinnuteqartup ingerlataminnik oqartussat suliaqarnerini paasissutissat, uppersarsaatillu pisariaqartut tamaasa tunniutissavai. Assersuutigalugu sumiiffimmi pissutsit pillugit annerusumik uppersarsarlugit paasissutissiissutigineqarnissaat pineqarsinnaavoq. Assersuutigalugu pinngortitamik, kulturikkut avatangiisinik imaluunniit uumasooqassutsimut sunniutaagallartussat pillugit aarlerinarsinnaasut pillugit aalajangersimasumik imaluunniit ilassutitut naliliinerit aamma pineqarsinnaapput. Qinnuteqartoq qinnuteqartinnani sumiiffik imaluunniit suliniut pillugu pissutsinik piviusunik imaluunniit inatsiseqarnermut tunngasunik nalunaarusiortitsisimaguni, taakkua pisut aallaavigalugit aalajangersakkamut ilaasutut paasissutissatut pingaarutilittut isigineqarsinnaapput.

Imm. 2-mut.

Qinnuteqaatip imarisassaanutpiumasaqaatinut ersarinnerusunik piumasaqaatinik Naalakkersuisut aalajangersaanissaannut, aalajangersakkap piginnaatippai. Uani assersuutigalugu qinnuteqartoq, ingerlatseqatigiiffiup qinnuteqartup aaqqissuussaana aamma aqutsisui pillugit paasissutissat ersarinnerusut pillugit piumasaqaataasinnaapput kiisalu pinerluuteqarsimasunik nalunaarsuiffimmit aallarnissamut pisariaqartumik akuersissutit piumasaqaataasinnaasut. Suliniut pillugu paasissutissanut kiisalu allatigut uppernarsaanissamut piumasaqaatit pillugit malittarisassanik aamma aalajangersaasoqarsinnaavoq. Soorlu assersuutigalug nunap assingaasinnaapput, teknikkimut paasissutissaasinnaapput imaluunniit saaffissaasinnaapput.

Taassumap saniatigut § 4 malillugu akuersissutinik qinnuteqaatinut atugassamik nalinginnaasumik qinnuteqarfissamik Naalakkersuisut suliaqarsinnaatinneqarput, taassumallu atorineqarnissaanut piumasaqarsinnaatinneqarlutik.

### § 33-mut

Imm. 1-imut.

§ 4 malillugu atuinnissamut akuersissummik qinnuteqaat, suliniutitut pilersaarummik ilaqarnissaa pillugu aalajangersagaq piumasaqaasiivoq.

§ 4, imm. 3 malillugu misissueqqaarnissamut immikkut akuersissutinut imaluunniit malitsigisaanik § 10 malillugu avammut tunisinissamut akuersissummik qinnuteqaammut piumasaqaat aallaavittut atuutinngilaq.

Taamaakkaluartoq § 41 naapertorlugu, suliap suliarineqarnissaani pisariaqartunik paasissutissanik annertunerusumik Naalakkersuisut piumasaqarsinnaapput.

Pissutsinik nr. 1-7-imi taaneqartunik nassuiaat paasissutissartaqassaaq.

Suliniutitut pilersaarummut § 33-mi piumasaqaataasut, suliniutip nassuiaataata imarisassaanut minnerpaatut piumasaqaataapput. Suliniutip annertussusaa, katitigaaneralu apeqqutaallutik paasissutissat qanoq annertutigissanersut nikerarsinnaavoq. Suliniutitut mikinerusunut paasissutissat annikinnerusunik pisariaqartinneqarsinnaapput, suliniutinulli anginerusunut pissusissamisoortumik paasissutissat annertunerussallutik. Imaappoq, paasissutissatut naatsorsuutigineqartut, suliniutip annertussusaata ersersissinnaagai.

Nr. 1

Suliniutip siunertaa nassuiaammi nassuiaatigineqassaaq. Suliniutip suna angussallugu siunertarineraa, ingerlatassallu suut ingerlanneqassanersut nassuiaammi ersarissumik nassuiarneqarsimassaaq.

Suliniutip annertussusaa qinnuteqartup nassuiaatigissavaa. Uani suliniutip angissusaa, pisuussut sunarpiaq atorneqarniarnersoq, nunatarlu suna pineqarnersoq pillugu nassuiaat ilanngunneqarsinnaavoq.

Suliniut qanoq ingerlanneqartussatut pilersaarutigineqarnersoq qinnuteqartup nassuiaatigissavaa. Assersuutigalugu suliniut maskiinanik angisuunik atuiffiusariaqarnersoq, umiarsuit suut atorniarneqarnersut, sanaartugassanik pilersitsinissaq il.il. allassimasinnaapput.

Suliniutip ingerlanneqarsinnaanera, aarlerinartullu Naalakkersuisut nalilersinnaaniassammatigit suliniummi immikkoortut pingaaruteqarnerpaat, immikkoortunilu tamani naatsorsuutigisamik piffissamik atuinissat piffissaliussami allassimassapput.

Nr. 2

Suliniutissatut pilersaarut, suut nioqqutissiarineqassanersut pillugit paasissutissartaqassaaq. Nioqqutissat suuneri, pitsaassusaallu nassuiaatigineqassapput, matumani nioqqutissat iluaqutissatut imaluunniit suliffeqarfinni siunertanut, assersuutigalugu nunalerinermi atorneqassanersut ilanngullugu.

Nr. 3

Taassumap saniatigit pitsaassutsip qulakkeerneqarnissaanut suleriaatsit imaluunniit malittarisassat suut atorneqassanersut pillugu suliniutissatut pilersaarummi allassimassaaq. Uani nioqqutissiarineqartut malittarisassanik pingaarutilinnik naammassinninnissaasa qulakkeerneqarnissaanut pingaaruteqarsinnaasut ilaatigut pitsaassutsimik nakkutilliinerit imaluunniit uppersaasnerit ilaatinneqarsinnaapput.

Nr. 4

Sermeq, imerlu naatsorsuutigisamik qanoq annertutigisoq atorniarneqarnersoq suliniutitut pilersaarummi allassimassaaq. Annertussusissat pillugit kisitsisitigit paasissutissat eqqortut, soorlu assersuutigalugu qaammammut imaluunniit ukiumut naatsorsuutigisamik pissarsiassat literinngorlugit paasissutissat kiisalu kisitsisit taakkua qanoq naatsorsorneqarnersut paasissutissiissutigineqassaaq.

Nr. 5

Suliniutitut pilersaarut aningaasalersuinissamik pilersaarutitaqassaaq, aningaasatigullu angusassatut naatsorsuutigisat pillugit nassuiaatitaqassalluni. Tassani isertitassatut naatsorsuutigisat takussutissartaa ilaatinneqassaaq, soorluttaaq suliniutip aallartisarneqarnera, ingerlanneqarneralu qanoq aningaasalersorneqarnissaat pillugu nassuiaammik ilaqassasoq. Assersuutigalugu nammineq aningaasaatitigit, allat aningaasaliinerisigit imaluunniit allatigit aningaasalersuineq pissanersoq, imm. 1-ilu naapertorlugu piffissaliussami taaneqarlutik immikkoortuni assigiinngitsuni aningaasat ataavartumik qanoq atorneqassanersut aamma allassimassaaq.

Suliniut aningaasatigut ingerlanneqarsinnaaneraniq qinnuteqartup qularnarunnaarsitsinissaanik piumasaqartumut § 15-imut, aalajangersagaq atasutut isigineqassaaq. Taassumap ersarinnerusumik misissornissaanut tassunga oqaaseqaatit innersuussutigineqarput.

Nr. 6

Kalaallit Nunaanni aamma avataanit sulisunik, pilersuisunillu atuinissaq pillugu suliniutitut pilersaarut nassuiaatitaqassaaq. Assersuutigalugu najukkami suliffeqarfinnik imaluunniit nunat tamalaat akornanni suleqatigisanut suleqatigiinnissamik isumaqatigiissutit, piginnaasanillu sunik tapersiissanersut paasissutissiissutigineqarsinnaapput.

Nr. 7

Akuersissutip uninnerani imaluunniit utertinnerani suliniut qanoq naammassineqassanersoq, suliniutissatut pilersaarummi nassuiaatigineqassaaq. Torersaanissaq, matumani suleriaatsit malinneqartussat ilanngullugit, pisinnaatitsissummik pigisaqartup qanoq qulakkeerniarnerai ersarissumik allassimassaaq.

Suliniut sanaartornissamik ilaqarpat, akuersissutip uninnerani taakkua qanoq peerneqassanersut imaluunniit aserfallatsaalineqassanersut allassimassaaq. Sanaartukkat qanoq, qaqugukkullu piiarneqassanersut imaluunniit ingerlatassatut, aserfallatsaaliugassatullu tunniunneqassanersut allassimassaaq.

Tassumap saniatigut akuersissutip uninnerani naleqquttumik torersaanissaq imaluunniit aserfallatsaaliinissaq aningaasatigut qanoq qulakkeerneqassanersoq allassimassaaq.

Iluarseeqqinnissamut aningaasartuutissanut qularnaveeqqusiinissaq pillugu § 27-mut atasutut, aalajangersagaq isigineqassaaq. Taassumap ersarinnerusumik misissornissaanut tassunga oqaaseqaatit innersuussutigineqarput.

Nr. 8

Kiisalu suliniutip tamakkiisumik naliliiffigineqarnissaanut paasissutissanik pingaaruteqartunik allanik suliniutissatut pilersaarut paasissutissartaqassaaq. Tassani assersuutigalugu ilassutitut uppersaasatit, piujuartitsinissaq pillugu paasissutissat, aarlerinarsinnaasunik naliliinerit, upalungaarsimanissamut pilersaarutit, teknikikkut imaluunniit inatsisitigut misissueqqissaarnerit kiisalu peqarpat soqutigisaqatigiinnit nalunaarutit ilanngunneqarsinnaapput.

Imm. 2

Pilersaarutip nassuiaataanut, matumani ilusissaa imassaalu ilanngullugit, ersarinnerusunik malittarisassanik Naalakkersuisut aalajangersaasinnaannut aalajangersakkap piginnaatippai. Tassani assersuutigalugu immikkoortitaakkanik nalunaarsuiffimmut, qanorlu annertutigisumik annikitsortaanik ilanngussisoqarnissaanut piumasaqaataasinnaapput.

## § 34-mut

Imm. 1-imut

§ 10 malillugu avammut tunisinissamut akuersissummik qinnuteqaammut piumasaqaatinik aalajangersagaq aalajangersaavoq.

Avammut tunisinissaq akuerineqarsinnaanersoq pillugu, matumani piujuartitsinissaq,

Nr. 1-6-imi allassimasut minnerpaatut piumasaqaataapput. Taamaalilluni qinnuteqaatip suliarineqarnissaani pisariaqartillugu Naalakkersuisut qinnuteqartumit annertunerusumik paasissutissanik noqqaasinnaapput, tak aamma § 41.

Nr. 1.

Avammut tunisinissap siunertaa qinnuteqaammi ersarissumik allassimassaaq, matumani ersarissumik taasamik misissueqqaarnissamik ingerlatsinissaq imaluunniit atunissamik ingerlatsinissaq siunertaralugu avammut tunineqarniarnersoq ilanngullugu.

Nr. 2.

Tunisassiorneq Kalaallit Nunaanni imaluunniit avataani pissanersoq imaluunniit imermik bulkimut avammut tunisisoqarniarnersoq qinnuteqaammi paasissutissiissutigineqassaaq. Siunnersuutip § 24-a malillugu akiliutissaq pillugu piumasaqaatissamik aalajangersaanissamut atatillugu paasissutissaq pingaaruteqarpoq.

Nr.3

Sermeq, imerlu qanoq annertutigisoq avammut tunisassatut missiliuutigineqartut qinnuteqaammi allassimassapput. Annertussusissat pillugit kisitsisitigut paasissutissat eqqortut, soorlu assersuutigalugu qaammammut imaluunniit ukiumut naatsorsuutigisamik pissarsiassat literinngorlugit, kubikmeterinngorlugit imaluunniit tonsinngorlugit ilanngullugit paasissutissiissutigineqartariaqarput.

Nr. 4.

Taassumap saniatigut nuna tunitsivik avammut tunisinissamut akuersissummi allassimassaaq.

Nr. 5.

Piffissaq avammut tunisinissamut akuersissummi qinnutigineqartoq allanneqassaaq, soorluttaaq aalajangersimasumik nassiussassat pillugit paasissutissat ilanngunneqarsinnaasut. Oqaatigineqaassaaq, avammut tunisinissamut akuersissut piffissaligaammat, ukiumullu qinnutigineqaqqittariaqartarluni, tak. § 10, imm. 3.

Nr. 6.

Assartueriaasissaq pillugu, uani assersuutigalugu umiarsuarmik, timmisartumik, allamilluunniit assartuisoqartassanersoq pillugu qinnuteqaat paasissutissartaqassaaq, soorluttaaq assartuinermini avatangiisinut sunniutaasinnaasunik naliliinermik ilaqassasoq.

Naliliinermi ilaatigut umiarsuup qanoq ittuunissaa, ikummatissaq, angallavissamik toqqaaneq, aniatitsinissaq, sumiiffimmi soorlu silaannarmik mingutsitsinertut, nipiliornikkullu avatangiisinut sunniutaasinnaasut imaluunniit artinik allaneersunik siammartiterisinnaaneq nassuiaatigineqarsinnaapput.

Nuna nassitsivik tikillugu assartueriaasissaq tamaat allaatigineqarluni, nassitsivimmit nuna nassitsivik tikillugu assartueriaatsit atorneqartussat tamaasa sapinngisamik paasissutissiissutigineqassapput.

Nr. 7.

Kiisalu avammut tunisinissamut akuersissummik qinnuteqaat, paasissutissanik pingaarutilinnik allanik paasissutissartaqassaaq. Uani assersuutigalu suleqatissat, akuersissutit imaluunniit uppersaasatit attuumassuteqartut, avammut tunisinermi akorngini suleqateqassappat taakkua pillugit paasissutissat imaluunniit paasissutissat avammut tunisinissamik suliniut eqqarsaatigalugu immikkut pingaarutillit pillugit paasissutissaasinnaapput.

Qinnuteqaatip nalilernerqarnissaanut paasissutissanik pingaaruteqarsinnaasunik tamanik, aamma nr. 1-4-mi toqqaannartumik taaneqanngikkaluartunik Naalakkersuisut pissarsisinnaanissaat aalajangersakkap qulakkeerpaa.

Imm. 2-mut.

Sermimut, inermullu inuussutissatut imaluunniit nerisassiornermi atugassatut atorneqartussanut avammut tunisinissamut akuersissummik qinnuteqartoqarpat, peqqissutsimut aamma eqqiluisaarnermut akuersissutit pisariaqartut qinnuteqaammut ilanngunneqassapput. Uani ilaatigut erngup pitsaassusaanut uppersaasat, misissueqqaarnermi inernerit, oqartussanit attuumassuteqartunit inuussutissanut akuersissutit ilanngunneqarsinnaapput.

Imm. 3-mut

Imm. 1-mi aamma 2-mi piumasaqaataasut, § 10, imm. 3 napertorlugu avammut tunisinissamut akuersissutit nutarterneqarnissaanik qinnuteqarnermi aamma atuuttut, aalajangersakkap aalajangersarpaa. Avammut tunisineq allannguuteqanngippat, paasissutissat siornatigut nassiunneqarsimasut ateqqinneqarsinnaassapput.

Imm. 4-mut

Avammut tunisinissamut akuersissutit qinnuteqaatinut ersarinnerusunik malittarisassanik Naalakkersuisut aalajangersaanissaannut aalajangersakkap piginnaatippai, matumani avammut tunisinissamik qinnuteqarnermi uppersaasissamut aamma qinnuteqarfissanik aalajangersimasunik atuinissamik piumasaqaat ilanngullugu.

*Til § 35*

Imm. 1-imut.

Piumasaqaatit §§ 32-34-mi aalajangersarneqartut qinnuteqaatip naammassinngippagit, Inatsisartut inatsisaat malillugu qinnuteqaat Naalakkersuisut itigartissinnaagaat, aalajangersakkap aalajangersarpaa.

Taamaalilluni piumasarineqartunik qinnuteqaat amigaateqarpat, § 35 malillugu qinnuteqaammik itigartitsisoqarsinnaavoq. Qinnuteqaatilli §§ 32-34-mi piumasaqaataasut naammassippagit, inatsisitigulli piumasaqaataasut allat naammassineqanngitsut nalilerneqarpat, ingerlatsinermi inatsisitigut nalinginnaasumik tunngaviit malillugit qinnuteqaat itigartissallugu pissusissamisuusaaq.

Imm. 2-mut.

Qinnuteqaat piumasaqaataasunik amigaateqassappat, imm. 1 malillugu itigartitsisoqannginnerani, qinnuteqartup amigaataasunik tunniussinissaanut naleqquttumik periarfissinneqarnissaanut imm. 2-p periarfissippaa. Qinnuteqaatip itigartinnessaa sioqqullugu, qinnuteqartoq qinnuteqaammik iluarsinissaanut sapaatip akunnerinik marlunnik periarfissinneqassaaq. Piffissaliussap qaangiunnerani qinnuteqartup piumasaqaataasut suli naammassinngippagit, qinnuteqaat erngertumik itigartinneqarsinnaavoq. Taamaakkaluartoq qinnuteqartoq itigartinneqareerluni, qinnuteqaammik nassitseqqinnissaminut mattunneqanngilaq.

Imm. 3-mut.

Qinnuteqaammik iluarsinissamut sapaatip akunnerinik marlunnik piffissaliussamit Naalakkersuisut immikkut akuersissuteqarnissaannut, aalajangersakkat pisinnaatippai.

Paasissutissat ilaat pissarsiariniarlugit utaqqinarsinnaanera, taamaattumillu sapaatip akunnerinik marlunnit sivilisunerusumik piffissamik pisariaqartitsisoqarnera aalajangersakkami eqqarsaatigineqarpoq. Soorlu assersuutigalugu paasissutissat misissoqqissaartariaqarnerisigut, nalilersoqqaartariaqarnerisigut imaluunniit oqartussanit allanit paasissutissanik pissarsisoqartariaqartillugu suliaq sivilisuumik suliarisussaattillugu.

Immikkut akuersissuteqassagaanni pissutsit immikkuullarissuusariaqarput, piffissaliussallu sivitsorneqarnissaa qinnuteqartup tunngavilersortariaqarlugu.

*§ 36-mut*

Imm. 1-imut.

§ 4 malillugu akuersissummik tunniussisoqartinnagu kommunimi pineqartumi kommunalbestyrelsi tusarniaaffigineqassasoq, aalajangersakkap aalajangersarpaa.

Kommunalbestyrelsi sorliup tusarniaavigineqarnissaanni, pisuussutip qinnutigineqartup sumiinnera apeqqutaassaaq. Kommunalbestyrelsi imaluunniit Nunaqqatigiit Siunnersuisoqatigiivi sumiiffimmi annertuumik ilisimasaqarsinnaapput, suliniummullu soqutigisaqarsinnaallutik, matumani pilersaarusiornissaq, attaveqaasersuutit, najukkami inuussutissarsiornermut tunngasut aamma eqqarsaatigalugit. Taamaalillu suliniut pineqartoq aalajangiisoqartinnagu kommunalbestyrelsip pingaarutilinnik immersueqataanissaanut periarfissinneqarnissaa tusarniaanerup qulakkiissavaa.

§ 4 malillugu misissueqqaarnissamut akuersissutit, atuinissamullu akuersissutit aalajangersakkamut aamma ilaapput. Taamaakkaluartoq § 10 malillugu avammut tunisinissamut akuersissutit aalajangersakkamut ilaanngillat. Pissutsilli apeqqutaatillugit qinnuteqaatini taamak ittuni, ingerlatsinermut inatsimmi tunngavimmut naapertuuttumik kommunalbestyrelsi tusarniaaffigissallugu pingaaruteqarsinnaavoq.

Kommunit tusarniaaffigineqarnissaannut malittarisassat, sumiiffiup akuersissuteqarfiusup allilerneqarnissaa imaluunniit allanngortinneqarnissaa pillugu § 20 malillugu aalajangiinissani aamma atuupput, tak. § 20, imm. 2. Ersarinnerusumik misissuinissamut tassunga nassuiaatit innersuussutigineqarput.

Imm. 2-mut.

Suliniut inuiaqatigiinnut, avatangiisitigut imaluunniit inuussutissarsiutitigut annertuumik sunniteqarsinnaasutut nalilerneqarpat, Naalakkersuisut qinnuteqaat tamanut tusarniutigissagaa aalajangersakkap aalajangerpaa.

Inuiaqatigiinnut, avatangiisinut imaluunniit inuussutissarsiornermut tunngasunut suliniut annertuumik kinguneqartussatut isigineqarnersoq, pisumik naliliinermik aallaaveqassaaq.

Piujuartitsisussamik atuinissaq, teknikkimut tunngasut, inuiaqatigiillu soqutigisaat eqqarsaatigalugit, imaluunniit suliniutip allatigut ingerlanneqarsinnaassanngikkaluartup piviusunngortinneqarnissaanut pisariaqartillugu aatsaat kisermaassisussaatitaaneq tunniunneqartarmat, kisermaassisussaatitaaffilerlugu atuinissamut qinnuteqaatit annertuutigit aalajangersakkamut ilaatinneqartassapput, tak. § 8.

Suliniutip sanaartorfigeqqusaanngitsut imaluunniit illuaraqarfiit sunnissappagit aamma nunamut, kangerlummumut, immamulluunniit kingunissaqartillugu imaluunniit aalisarnermut, inuussutissarsiutitigut ingerlatanut allanut imaluunniit pinngortitamut, matumani aamma uumasunut nujuartarnut aamma naasunut kingunissaqartillugu taakkua tamanut tusarniutigineqarnissaanut tunngaviusinnaapput.

Suliniutit anginerusut inuiaqatigiinnut, avatangiisinut imaluunniit inuussutissarsiutinut tunngasunut annertuumik sunniteqarsinnaasutut isigineqartariaqarput.

Killuanik suliniutit annertunngippata, ingerlatallu utaqqiisaagallartuinnaassappata imaluunniit annikitsuinnaassapata imaluunniit inuiaqatigiinnut, avatangiisinut imaluunniit inuussutissarsiutinut tunngasunut malunnaataannngitsunik kinguneqartussatut naatsorsuutigineqarpata taakkua tusarniutigineqartariaqanngissinnaapput.

Suliap naammattumik paasissutissiissutiginissaata qulakkeerneqarnissaa, pisuni tamani aalajangiisuuvoq.

§§ 32-34 malillugit qinnuteqaammi pingaarutillit kisimik tamanut tusarniutigineqarsinnaapput. Taamaalilluni atortussat suut pingaaruteqarnerinik naliliinissaminni, Naalakkersuisut missiliuillutik naliliisussanngortinneqarput. Uani pingaartumik ingerlatassat akuersissummik qinnuteqarfigineqartut nassuiaataat, sumiiffik akuersissuteqarfissatut qinnutigineqartoq pillugu paasissutissat, pinngortitamut kingunissaanik naliliineq, suliniutissatullu pilersaarutip ilaa ilanngutissallugit pingaaruteqarsinnaavoq. Tamanut saqqummiussisoqartinnagu atortut ilanngunneqartussaannngitsunik, matumani aamma isertuunneqartussanik imaluunniit mianersuuttariaqartunik paasissutissartaqarnersut Naalakkersuisut isumaliutigisariaqarpaat. Paasitinneqarsinnaatitaanermut inatsimmi allagaatinik takunnissinnaatitaaneq pillugu malittarisassat, naliliinermi ilaatigut isiginiarneqassapput.

Tamanut tusarniaanissami malittarisassat, sumiiffiup akuersissuteqarfiusup allilernerneqarnissaa imaluunniit allanngortinneqarnissaa pillugu § 20 malillugu aalajangiinissani aamma atuupput, tak. § 20, imm. 2. Ersarinnerusumik misissuinissamut tassunga nassuiaatit innersuussutigineqarput.

Imm. 3-mut.

Tusarniaaneq aallaavittut sapaatip akunnerinik sisamanik sivilissuseqassasoq aalajangersakkap aalajangersarpaa. Tamanna imm. 1 malillugu kommunimut tusarniaanissami, aamma imm. 2 malillugu tamanut tusarniaanissami atuuppoq.

Immikkut pissutissaqarpat, tusarniaanermi piffissaliussaq sivikinnerusinnaavoq imaluunniit sivilissunerusinnaavoq.

Immikkut pissutsit assersuutigalugu tassaasinnaapput suliniutip suussusaa aamma annertussusaa. Suliniutit avatangiisinut imaluunniit inuiaqatigiinnut kinguneqassallutik annertuppata, imaluunniit nunani allani ingerlatsisunik imaluunniit oqartussanik attuumassuteqartunik allanik attaveqarneq pillugu piffissaqarnerunissaq pisariaqartinneqartillugu, tusarniaaneq sivilissunerusinnaavoq.

Tusarniaanermi piffissaq suliniummut naleqqussartussanngorlugu, pissutsit immikkut ittut suliani ataasiakkaani naliliiffigineqartassapput.

§ 37-mut

## Imm. 1-imut.

Inatsisartut inatsisaat malillugu allaffissornikkut suliassat Naalakkersuisut oqartussanut allanut imaluunniit namminersortunut suliakkiussinnaagaat siunnersuutigineqarpoq. Allaffissornikkut suliassanik, assersuutigalugu suliat suliarineqartarnerinik aamma nakkutilliinermik Naalakkersuisut suliakkiisinnaanerinik aalajangersakkap piginnaatippai. Akuersissutuni piumasaqaatinik aamma malittarinninnerusinnaavoq. Tamanna assersuutigalugu nakkutilliinermi imaluunniit qinnuteqaatinik teknikkimut tunngangaatsiartunik suliaqarnermi suliamut ilisimasaqarnissaq naleqqussinnaatillugu naleqqussinnaavoq. Isumalluutitigut allaffeqarfiup avataanit ikiorserneqarnissaa pisariaqartinneqarpat aamma, tamanna naleqqussinnavoq.

Assersuutigalugu namminersortut tassaasinnaapput siunnersuisarfiit, suliassaqaarfimmut ilisimasaqartut.

Suliassanut aalajangersagaq malillugu suliakkiissutigineqartunut Naalakkersuisut suli akisussaapput, matumani Inatsisartut inatsisaat eqqortumik ingerlanneqarnissaa ilanngullugu. Aalajangiisinnaatitaanernik namminersortunut tunniussinissamut aalajangersagaq pisinnaatitsinnilaq.

Nakkutilliinissamik suliassaq oqartussanut allanut imaluunniit namminersortunut suliakkiissutigineqassappat, nakkutilliinissamik malittarisassat atuuttut oqartussap allap, namminersortulluunniit malinnerani Naalakkersuisut nakkutigissavaat.

## Imm. 2-mut.

Auliassat namminersortumut suliakkiunneqassappata, Pisortat ingerlatsineranni suliassat suliarineqartarnerat pillugu Inatsisartut inatsisaat, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma Inatsisartut Ombudsmandiat pillugu Inatsisartut inatsisaat. Imaappoq, suliaq pisortat ingerlatsinerisa avataani suliarineqaraluarpuunniit ingerlatsinermi ileqqorissaarneq pillugu malittarisassat, illuatungerisanut tusarniaanissaq, tunngavigineqartut, sulianillu takunnissinnaatitaaneq suli malinneqassapput.

## Imm. 3-mut.

Inatsisartut inatsisaata atornissaa pillugu, malittarisassanik ersarinnerusunik Naalakkersuisut aalajangersaasinnaanissaannut, aalajangersakkap piginnaatippai. Assersuutigalugu oqartussat allat imaluunniit suliffeqarfiit namminersortut suliamik qanoq isumaginninnissaat pillugu aamma uppersaanissamut, nalunaarusiornissamut, nakkutilliinissamullu suut piumasaqaataassanersut kiisalu suliamut akuusut akornanni paasissutissat ingerlateqqittarnerinut suleriaasissaq pillugit malittarisassaasinnaapput.

Maalaaruteqarsinnaaneq pillugu malittarisassanik Naalakkersuisut aamma aalajangersaasinnaapput. Tamannali maalaaruteqarsinnaanermik, matumani aamma

maalaaruteqarsinnaaneq inatsisitigut aalajangersagaanngitsumik annikilliliisunik malittarisassanik aalajangersaanissamut inatsisitigut tunngavissiiingilaq.

*§ 38-mut*

Nr. 1-6-imi pissutsinik pisoqartillugu, Inatsisartut inatsisaat malillugu akuersissummik Naalakkersuisut utertitsisinnaasut, aalajangersakkap ersarissarpaa.

Akuersissummik utertitsineq ingerlatsinermi inatsisitigut aalajangiineruvoq. Taamaalluni ingerlatsinermi inatsisitigut nalinginnaasumik tunngavissat malillugit, matumani aamma tunngavilersorluanaanissamik tunngavik, misissuinissamut tunngavik, naatsorsuuteqarnissamik tunngavik, naligiissitsinissamut tunngavik, naleqquttumillu tunngaveqartitsinermit tunngavik malillugit utertitsisoqassaaq. Taassumap saniatigut aalajangersagaq malillugu utertitsineq, § 39-mi suleriaaseq naapertorlugu pissaaq. Ersarinnerusumik misissuinissamunt tassunga nassuiaatit innersuussutigineqarput.

Utertitsinissamut patsisit imm. 1-imi allatorneqartut, pissutsit akuersissummik utertitsinissamik kinguneqarsinnaasut nalinginnaanerpaajupput. Allattukkat tamakkiisuunngillat. Taamaalluni imm. 1-imi toqqaannartumik pineqanngitsunik, kisiannili utertitsinissamut tunngavissiiisunik pisoqassappat, pisoq apeqqutaatillugu ingerlatsinermi inatsisit naapertorlugu, Naalakkersuisut akuersissummik utertitsisinnaapput.

Pisinnaatitsissummik pigisaqartup akuersissutip pigiinnarnissaanut nalinginnaasumik suut naatsorsuutigisinnaassanngikkai, aalajangersakkap nassuiarpaa.

Nr. 1

§ 14 naapertorlugu, piffissaq akuersissuteqarfiusoq tamakkerlugu piginnittussaataasumut §§ 11-13-imi piumasaqaataasut naammassissavai. Uani pinsinnaatitsissummik pigisaqartup ingerlatseqatigiiffiata suussusissaanut, angerlarsimaffianut, aningaasaqarnermut tunngasunut, paasisimasaqarnissamullu piumasaqaatit ilaatinneqarput. Piginnittussaataasup piumasaqaatit naammassinngippagit, akuersissut utertinneqarsinnaavoq.

Assersuutigalugu pinsinnaatitsissummik pigisaqartup angerlarsimaffia allanngorpat imaluunniit pinngitsaaliissummik atorunnaarsitaasimappat utertitsisoqarsinnaavoq.

Qaangiuttussamik aningaasatigut unamminartoq pineqarpat, akuersissut utertissallugu naleqqutissagunangilaq.

Oqaatigineqassaaq, Inatsisartut inatsisaat manna malillugu akuersissutit imatut inuussutissarsiummik ingerlatsinissamut akuersissutaanngimmata, sumiiffimmili aalajangersimasumi inuussutissarsiorsinnaanissaq taamaallaat akuersissutigineqarluni..

Piginnittussaataasumut piumasaqaatit ataasiakkaat ersarinnerusumik misissornissaanut §§ 11-14-imi nassuiaatit innersuussutigineqarput.

Nr. 2

Inatsisartut inatsisaat malillugu akuersissut tunniunneqartoq malillugu ingerlatassaq, § 22 naapertorlugu piginnittussaataasup piffissaq akuersissuteqarfiusoq tamaat ingerlatissavai. § 22 malillugu ingerlatsisussaataaneq pisinnaatitsissummik pigisaqartup naammassinngippagu, akuersissut utertinneqarsinnaavoq. Taamaakkaluatoq ingerlatsisussaataaneq aallaavittut aallartinnissamut piffissaliussap atorunnaarneranit aatsaat atuutilissammat, aallartinnissamut piffissaliussamut § 21-mi malittarisassat isiginiarneqassapput.

Ersarinnerusumik misissornissaanut § 22-mi nassuiaatit innersuussutigineqarput.

Nr. 3

Akuersissummi piumasaqaataasut piginnittussaataasup malinngippagit, akuersissut utertinneqarsinnaavoq.

Taassuma saniatigut piginnittussaataasup Inatsisartut inatsisaanni malittarisassanik malinninnginnippat akuersissut utertinneqarsinnaavoq.

§ 38, nr. 3 tunngavigalugu Naalakkersuisut akuersissummik utertitsisinnaassappata piumasaqaatinik imaluunniit Inatsisartut inatsisaanni malittarisassanik unioqqutitsineq annertussaaq imaluunniit ataasiaannarani pisimasuussalluni. Assersuutigalugu sumiiffiup akuersissuteqarfiusup avataani ingerlatsisoqaruni, tamanna akuersissutip piumasaqaataanik annertuumik unioqqutitsinerusinnaavoq. Piumasaqaatinik annikinnerusumik unioqqutitsinerni Naalakkersuisut ataasiaannaratik peqqussuteqarsimappata, akuersissummik utertitsinissamut tamanna aamma tunngaviusinnaavoq. Assersuutigalugu naammassisassat uteqqiasumik naammassineqarneq ajorpata, soorlu assersuutigalugu § 42 naapertorlugu pisussaaffigalugu nalunaarusiortarsimanngikkaanni, akuersissut aamma utertinneqarsinnaavoq.

Nr. 4

Akuersissummik tunniussinermut tunngaviusut annertuumik allanngorsimappata, akuersissut utertinneqarsinnaavoq. Akuerissummut tunngaviusunik allannguisunik nutaanik pisoqarpat imaluunniit nutaanik paasissutissaqalerpat, suliniut illersorneqarsinnaajunnaartutut imaluunniit ingerlanneqarsinnaajunnaartutut isigineqalerpat, tamanna akuersissummik utertitsinermik kinguneqarsinnaavoq.

Pisumik naliliinissaq, allannguinerlu annertuussasoq pineqarpoq. Assersuutigalugu inuunermut aamma peqqissutsimut tunngasut eqqarsaatigisariaqakkat, utertitsinissamut tunngavissaalluassapput.

Paasissutissat nutaat imaluunniit inatsisinut tunngasut, taamani akuersissummik tunniussiviusumi Naalakkersuisunit ilisimaneqanngitsut pineqartariaqarput. Assersuutigalugu soorlu suliniut teknikkikkut imaluunniit aningaasatigut ingerlanneqarsinnaajunnaarluni, pisuussutip tikinneqarsinnaanera pillugu paasissutissat nutaat saqqummerpata. Assersuutigalugu aamma teknologi atorneqartussatut naatsorsuutigineqarsimagaluartoq annertuumik allanngorsimasinnaavoq, imaluunniit piginnaasat, aningaasatigut piginnaasat imaluunniit misilittakkat naammassineqarsinnaajunnaarlutik suliniummi qitiusumik ingerlatsisut taarserneqarsimasinnaapput.

Allat assersuutigineqarsinnaasut tassaapput avatangiisini pissutsit allanngortut, matumani aamma sermip imaluunniit erngup qanoq issusaanik, taamaalillunilu atornissaanut periarfissamut sunniunneqartumik pinngortitami sumiiffiit mianernartut imaluunniit silap pissusaata allanngorneri pillugit kisitsisitigut paasissutissat nutaat ilanngullugit.

§ 38, nr. 4 naapertorlugu akuersissut utertinneqartinnagu, piumasaqaatit allanngorlugit akuersissut pigiinnarneqarsinnaanersoq isumaliutigineqartariaqarpoq. Akuliunneq annertunersoq pisuni tamani naliliiffigineqartassaaq.

#### Nr. 5

Nuna, kangerluk, imaq imaluunniit pinngortitaaq annertuumik ajoquseratarsinnaalerpat akuersissut utertinneqarsinnaavoq. Taamatut pisoqartillugu § 30, imm. 1-imi malittarisassat malillugit ingerlatat unitsinneqassasut Naalakkersuisut peqqusisinnaapput. Pisut iluarsineqarsinnaanngippata, § 30, imm. 2 malillugu ingerlatanut Naalakkersuisut inerteqquteqarsinnaapput.

Ersarinnerusumik misissornissaanut § 30-mi nassuiaatit innersuussutigineqarput.

Utertitsisoqarsinnaatinnagu, aalajangersagaq naapertorlugu ajoquserneq qanoq annertutiginersoq naliliisoqassaaq. Naliliinermi assersuutigalugu ajoqusiinerup annertussusaa, ajoqusernerlu pitsaaliunikkut pinngitsoortinneqarsinnaanersoq pingaartinneqarsinnaavoq. Taassumap saniatigut naleqquttumik naliliinissami suliniut allanik ingerlatsinikkut ingerlanneqarsinnaanersoq kiisalu pisinnaatitsisummik pigisaqartup akuersissummik tigumminniinnarnissaanit nunap isikkua, imaq aamma kangerluk imaluunniit pinngortitaaq pingaarnerunnginnersut pingaartinneqarsinnaavoq.

#### Nr. 6

Inatsisartut inatsisaata kiisalu malittarisassat, piumasaqaatillu Inatsisartut inatsisaanni § 30, imm. 1 aamma § 40, imm. 1 naapertorlugit aalajangersarneqartut malinneqarnissaanik Naalakkersuisut peqqusisinnaapput. Pisinnaatitsisummik pigisaqartup peqqussut malinngippagu, Naalakkersuisut akuersissut utertissinnaavaat.

Ersarinnerusumik misissornissaanut § 30, imm. 1 aamma § 40, imm. 1 nassuiaatit innersuussutigineqarput.

Pisoq piginnittussaataasup peqqusummik, matumani aamma § 30, imm. 1 malillugu peqqusummik malinninnginnera aalajangersakkami píneqarput. Taamaalilluni piginnittussaataasup peqqusummik malinnissimasinnaalluni, pinngortitarli eqqarsaatigalugu akuersissut utertinneqarsinnaalluni aalajangersagaq nr. 5-imit, aalajangersagaq immikkoorpoq.

### § 39-mut

Imm. 1-imut.

Naalakkersuisut akuersisummik utertitsinissaq pillugu aalajangiitinnagit, piginnittussaataasoq pissutsinik akuersisummik utertitsinissamut tunngavissiisunik iluarsinissaminut piffissalernerqassasoq aalajangersakkap aalajangersarpaa. Akuersisummik utertitsinissaq pinngitsoortillugu, pissutsinik akuersisummik utertitsinermik kinguneqarsinnaasunik piginnittussaataasup iluarsinissaanut taassumap periarfissippaa.

Piumasaqaatinik naammassinnginneq piffissaliussap iluani iluarsineqarsinnaanersoq pillugu piffissaliineq aamma naliliinermik, pisoq iluarsineqarsinnaanersoq pillugu naliliineq tunngaveqassaaq. Uani assersuutigalugu kukkunerit annikinnerusut tassuugu iluarsineqarsinnaasut imaluunniit ingerlatanik allassimasutut ingerlanneqanngitsunik piginnittussaataasup iluarsisinnaaneri pineqarsinnaapput.

Pisoq iluarsineqarsinnaanngitsoq Naalakkersuisutalilerpassuk, utertitsinissaq sioqqullugu iluarsinissamut piffissaliisoqassanngilaq. Uani assersuutigalugu utertitsinerunngitsumik allatigut pinngitsoortinneqarsinnaanngitsumik nuna annertuumik ajoquseratarsinnaatilluguusinnaavoq, matumani aamma inuunermut imaluunniit peqqissutsimut ulorianalerpat. Taamaakkaluatoq § 30-mi aalajangersakkat innersuussutigineqarput, taassuma kingorna ingerlatat unitsinneqarnissaannik Naalakkersuisut inerteqquteqarsinnaammata, pissutsillu iluarsiivigineqarsinnaanngippata allanngortinneqarsinnaanngitsumik inerteqquteqarsinnaallutik.

Imm. 2-mut.

Utertitsinissamut pissutaasoq imm. 1 naapertorlugu piffissaliussap ilauni piginnittussaataasup iluarsinngippagu, Naalakkersuisut akuersisummik utertitsisinnaasut aalajangersakkap aalajangersapaa.

Oqaatigineqassaaq, utertitsineq ingerlatsinermi inatsisitigut aalajangiinnerummat, utertitsinissarlugu sioqqullugu ingerlatsinermi inatsisitigut nalinginnaasumik tunngavissat isiginiarneqassammata.

*§ 40-mut*

Imm. 1-imut.

Pisinnaatitsissummik pigisaqartut eqqarsaatigalugit Naalakkersuisut nakkutilliisussaasut aalajangersakkap aalajangersarpaa. Inatsisartut inatsisaat malillugu piginnittussaataitaasup ingerlatsineranik Naalakkersuisut nakkutilliissapput.

Piginnittussaataitaasup Inatsisartut inatsisaanni aalajangersakkanik, Inatsisartullu inatsisaat naapertorlugu malittarisassianik aamma piumasaqaatinik malinninnersoq nakkutilliinermi aamma nakkutigineqassaaq.

Taassumap saniatigut Inatsisartut inatsisaata kiisalu Inatsisartut inatsisaat malillugu najoqqutassat aamma piumasaqaatitut aalajangersarneqartut malinneqarnissaannik, Naalakkersuisut peqqusisinnaapput.

Imm. 2-mut.

Nakkutilliinermi pisariaqartillugu, nakkutilliinermi oqartussaasuni sulisut eqqartuussivimmi aalajangiinertaqanngitsumik aammalu pisariaqartumik kinaassutsimut uppersaammik takutitsinikkut piginnittussaataitaasup suliffeqarfianut tamarmut isersinnaasut, aalajangersakkap aalajangersarpaa.

Pisariaqartutut nalilerneqartillugu siumut nalunaaruteqanngitsumik nakkutilliisoqarsinnaaneranut aalajangersagaq inatsisitigut tunngavissiivoq. Tamanna pillugu suliffeqarfik siumut nalunaarfigineqarnissaa pillugu piumasaqaateqanngilaq.

Nakkutilliinissami pisariaqartillugu taamaallaat isersinnaanissaq kisimi pineqarpoq, inullu nakkutilliisoq nakkutilliisuni sulisutut uppersaasiisinnaassasoq piumasaqaataalluni.

§ 37 naapertorlugu suliassaq suliakkiunneqarsimatillugu, nakkutilliineq pisortani oqartussamit allamit imaluunniit suliffeqarfimmit namminersortumit aamma ingerlanneqarsinnaavoq

Imm. 3-mut.

Piginnittussaataitaasup naleqquttumik piffissaliunneqartup iluani peqqussutigineqartoq naammassinngippagu, pisinnaatitsissummik pigisaqartup akiligaanik, annasaqaatigisinnaasaanillu Naalakkersuisut taakkua suliakkiissutigisinnaagai, imm. 3-mi aalajangersarneqarpoq.

Taamaalilluni aalajangersagaq marloqiusaavoq. Siullermik imm. 1 malillugu peqqusummik naammassininnisaminut pisinnaatitsissummik pigisaqartoq naleqquttumik piffisalerneqassaaq. Taamaalilluni peqqussutip imaaliannaq naammassineqarnissaanut, aalajangersakkap Naalakkersuisut aalajangiisinnaatinngilai.

Naleqquttumik piffissaliussap iluani piginnittussaataitasup peqqussutigineqartoq naammassinngikkuniuk, peqqussutip naammassineqarnissaanut pisariaqartumik iliuusissat Naalakkersuisut aallartissinnaavaat. Taamatut pisoqartillugu Naalakkersuisut peqqussut naammassissavaat, kisianni pisinnaatitsissummik pigisaqartup akiligaanik, annaasaqaatigisinnaasaanillu pissalluni.

Piginnittussaataitasup akiligassaanik Naalakkersuisut inerteqquteqarpata, aningaasartuutit pisinnaatitsissummik pigisaqartumut akilersinneqassapput. Assersuutigalugu atortussanut aningaasartuutaasinnaapput, sanaartugassanik suliassinneqartartunut aamma siunnersortinut akiliutaasinnaapput, assartuussinermi aningaasartuutaasinnaapput aamma inerteqquteqarnermut atatillugu allaffissornermut aningaasartuutaasinnaallutik.

Imaappoq, § 26 aamma § 27 naapertorlugit piginnittussaataitasup inuussutissarsiornermi akisussaanermut sillimmasiissutaanit imaluunniit qularnaveeqqusiussaanit aningaasartuutaasut akilersinniarneqassasut. Akileqquneqartoq inuussutissarsiornermi akisussaanermut sillimmasiissummit imaluunniit qularnaveeqqusiissummit matussuserneqarsinnaanngippat, piginnittussaataitasumut toqqaannartumik akileqquneqartariaqarpoq.

Imm. 4-mut.

Imm. 3 malillugu peqqussut piginnittussaataitasup naammassinngisaa Naalakkersuisut naammassippassuk, tassunga atatillugu aningaasartuutit pisortanut akiitsutut isigineqassapput. Kalaallit Nunaanni pisortanut akiitsut akilersinniarneqartarnerini malittarisassat atuuttut naapertorlugit, akiitsut Akileraartarnermut Aqutsisoqarfimmit akilersinniarneqarsinnaapput.

Piginnittussaataitasup akiligassaanik, ajutoorpallu akisussaaffigisaanik Naalakkersuisut aningaasartuutigisimasai pisinnaatitsissummik pigisaqartup akilinngippagit, aalajangersagaq atuutissaaq. Taamaalilluni Naalakkersuisunit akileeqqusissut piffissaagallartillugu piginnittussaataitasup akilinngippagu, aningaasartuutit pisortanut akiitsutut isigineqassapput.

Aningaasartuutini aningaasartuutitut aalajangersimasunut killiliinngilaq, peqqussutilli piginnittussaataitasup nammineerluni naammassinngisaata naammassineqarnissaanut Naalakkersuisut aningaasartuutigisimasaat tamakkerlugit pineqarsinnaallutik. Siuliani imm. 3-mut nassuiaatit innersuussutigineqarput.

Imm. 5-imut

Nakkutilliineq pillugu Naalakkersuisut ersarinnerusunik malittarisassiornissaannut aalajangersakkap piginnaatippai. Uani nakkutilliinissap ingerlanneqarnissaa pillugu malittarisassat pineqarsinnaapput, matumani aamma assersuutigalugu nakkutilliinissap qanoq ittuunissaa, akulikissusissaa aamma nakkutilliinerup qanoq ingerlanneqarnissaa pillugu malittarissat ilanngullugit.

*§ 41-mut*

Pisinnaatitsissummik pigisaqartup, aamma Inatsisartut inatsisaat malillugu akuersissummik qinnuteqartut, suliffeqarfimmi imaluunniit ingerlatami oqartussat suliamik suliarineqarnissaannut paasissutissanik aamma uppersaatissanik pisariaqartunik tamanik tunniussinissaannut, aalajangersagaq pisussaaffiliivoq.

Naalakkersuisut sunnuteqarluartumik nakkutilliinissaminut paasissutissanik pisariaqartunik pissarsisinaanissaat, Inatsisartut inatsisaallu naapertorlugu aalajangiisinnaanissaat aalajangersakkap periarfissaqartippai. Oqartussat sulianik suliarineqarnerinut paasissutissanut pisariaqartunut tamanut, paasissutissiisussaataaneq atuuppoq, matumani aamma qinnuteqaammik suliaqarnissami paasissutissat pisariaqartut tamarmik paasissutissiisussaataanerme pineqarput.

Paasissutissat, uppersaatillugu qanoq tunniunneqarnissaannut, matumani qanoq iluseqarnissaat, qanorlu ilanngullugit, Naalakkersuit aamma piumasaqarsinnaapput. Assigiissaartumik, pitsaasumillu suliat suliarineqartarnissaannut, matumani paasissutissat digitaalikkut, allaffissornikkulluunniit pisariaqartitanut allanut naapertuuttumik suliarineqarsinnaatillugit formatimik qanoq ittumik tunnunneqarnissaat ilanngullugu, qulakkeerinissamut tamanna periarfissiisaaq.

*§ 42-imut*

Imm. 1-imut.

Akuersissut malillugu ingerlatat akuersissummi piumasaqaataasut aamma Inatsisartut inatsisaanni malittarisassat naapertorlugit ingerlanneqartut piginnittussaataasut ukiumoortumik uppersaasarnissaannik, aalajangersagaq pisussaaffiliivoq.

Naalakkersuisunut ukiumoortumik nalunaarusiamik nassitsisarnikkut uppersaasoqarsinnaavoq. Ingerlatat suut ingerlanneqarsimanersut, matumani aamma misissueqqaarnerit imaluunniit misissuinerit suut ingerlanneqarsimanersut nalunaarusiami nassuiaatigineqartassaaq. Taassumap saniatigut piumasaqaatit qanoq malinneqarsimanersut nassuiaatigissallugu pingaaruteqarsinnaavoq. Uani pingaartumik pinngortitamik aamma avatangiisinik illersuinissamut piumasaqaatit, matumani aamma pinngortitamut kinguneqarsimanersooq pineqarsinnaapput

Imm. 2-mut.

Ukiumoortumik nalunaarusiami pisinnaatitsissummik pigisaqartup sermeq, imerlu qanoq annertutigisoq atorsimanerlugu paasissutissiisutigisassavaa. Imeq atorsimasaq kubikmeterinngorlugu, sermerlu tonsinngorlugu allanneqassaaq.

Aalajangersagaq nassuiaammut "atuineq"-mut atasutut isigineqassaaq. Taamaalluni pisuussummik pinngortitamit piiaanerup aallartiffianit atuineq naatsorsorneqassaaq, suulluunniillu sermimik imaluunniit imermik tigussilluni iluutsit tamarmik pineqarlutik.

Imm. 3-mut.

§ 10 malillugu avammut tunisinissamut akuersissuteqarluni pinsinnaatissummik pigisaqartup avammut tunisani nalunaarusiortassavai. Piffissap avammut tunisinissamut akuersissuteqarfiusup naanerani nalunaarusiorneq pissaaq. § 10-mi aalajangersakkat naapertorlugit avammut tunisinissamut akuersissut qaammatisiutit ukiuata naaneri tamaasa nutarterneqartassaaq. Taamaalluni minnerpaatut qaammatisiutit ukiuata naaneri ukiumoortumik nalunaarusiortoqartassaaq.

Nioqqutit suut aamma sermeq, imerlu qanoq annertutigisut avammut tunisimanerlugit piginnittussaataasup nalunaarusiami paasissutissiissutigisassavaa. Avammut tunisineq nunanut tunisiffinnut qanoq agguataarneqarsimanersoq paasissutissiissutigineqassaaq.

Sermeq, imerlu avammut tunineqarsimasut pillugit paasissutissat imermut kubikmeteri, sermimullu tonsi allanneqassapput. § 24-mi malittarisassat naapertorlugit akiliutissap naatsorsorneqarnissaannut paasissutissat tunngavissiissapput.

Nioqqutit pillugit paasissutissiinermi assersuutigalugu sermeq imaluunniit imeq suliarineqarsimanersut, puujaasanut maqitsisoqarsimanersoq imaluunniit imeq taamaatsiinnarlugu avammut tunineqarsimanersoq paasissutissiissutigineqarsinnaavoq.

Nassiussat nioqqutissanik eqqussisumit tamakkiisumik imaluunniit ilaannakortumik tigujumaneqarsimanngippata, pissutsit suut tigusiumannginnermut patsisaanersut pinsinnaatissummik pigisaqartup paasissutissiissutigisassavaa. Uani assersuutigalugu pitsaassutsikkut, isumaqatigiissutigut, nassiussalerinermilu unamminartitat patsisaasinnaapput.

Imm. 4-mut.

Imm. 1-3-mi nalunaarusiortussaataaneq pillugu Naalakkersuisut malittarisassanik ersarinnerusunik aalajangersaanissaannut, aalajangersakkap piginnaatippai. Uani assersuutigalugu uppersaanissamut piumasagaatit aamma paasissutissat suut paasissutissiissutigineqassanersut pillugit malittarisassat ersarinnerusut pineqarsinnaapput.

#### § 43-mut

Naalakkersuisut piginnittussaataasooq peqqusinnaavaat, akiliutissap qanoq naatsorsorneqarneranut ilaliussatut uppersaatinik saqqummiussissasoq. Avammut tunisat annertuussusaat tunuliaqutaralugu § 24, imm. 2 naapertorlugit akiliutissat

aalajangersarneqassapput. Taamaalilluni ilaliussatut uppersaaitit tassaasinnaapput akitsuuseriviup allatai imaluunniit assartuinnermi uppersaaitit.

Taassumap saniatigut Naalakkersuisut piginnittussaataasooq peqqusinnaavaat, akiliutip akilerneqarneranut ilassutitut uppersaammik saqqummiussissasoq. Uani assersuutigalugu aningaaserivimmuut nuutsinerup uppersaataa pineqarsinnaavoq.

Taassumap saniatigut paasissutissat tunniunneqartut Naalakkersuisut misissorsinnaavaat, tamannalu § 40-mi nakkutilliinnermut atatillugu isigineqassalluni. Taamaalilluni § 42, imm. 3 naapertorlugu nalunaarut eqqornerisooq, annertussutsillu aamma akiliut akuersissutit piumasaqaataanut napertuunnersut Naalakkersuisut nakkutilliisinnaassapput.

#### *§ 44-mut*

Imm. 1-imut.

Aalajangersakkap kingunerisaanik, Inatsisartut inatsisaat malillugu akuersissut, Naalakkersuisut akuersinerisigut tunniunneqarsinnaavoq. Toqqaannartumik imaluunniit toqqaannanngikkaluartumik tunniussinerit tamarmik akuerineqarsimassapput.

Toqqaannartumik tunniussineq tassaavoq, akuersissummut piginnittussaataasumit ataatsimit inatsisitigut pisinnaatitaasumut, §§ 11-13-imi piumasaqaataasunik naammassinnittumut allamut tunniussineq.

Toqqaannanngitsumik tunniussinnermi piginnittussaataasup pigisaani imaluunniit nakkutilliinerani allannguutit pineqarput, matumani aamma akuersissutit tunniunneqarnerani inunnut peqataannagitsunut akuersissutit tunniunneqarneranik kingunilimmik sunnuteqarsinnaaneq ilanngullugu. Assersuutigalugu aktianik imaluunniit piginneqataassutsinik tunniussinikkut, kattunnikkut, immikkuulernikkut imaluunniit aaqqissuusseqqinnikkut pisinnaavoq. Taamaalilluni akuersissut pisortatigoortumik tunniunneqanngikkaluartorluunniit, akuersinissamut piumasaqaataasooq aamma atuuppoq.

Arlaqartut akuersissummik pigisaqaqatigiittut akornanni tunniussinernut, aalajangersagaq aamma atuuppoq.

Akuersissummik tunniussinnermi piumasaqaataasut Naalakkersuisut aamma akuersissutigissavaat. Piginnittussaataasumi ingerlatseqatigiiffimmik ingerlatsinnermi maleruagassaannik allannguinnissat akuersissutigineqarnissaa uani ilaatinneqanngilaq. Taamaakkaluartoq piumasaqaatit suut piumasaqaatigalugit akuersissutit tunniunneqarnissaa pillugu akuersinissaq pineqarsinnaavoq. Pingaartumik illuatungeriit akornanni

isumaqatigiissutaanni piumasaqaatit, piginnittussaataalersup akuersissut toqqissisimanartumik ingerlateqqissinnaanerani naliliinissami sunniuteqarsinnaasut pineqarsinnaapput. Taamaalilluni Naalakkersuisunit saqqummiunneqarsinnaasumik illuatungeriit tunniussinissami, assigisaanilluunniit isumaqatigiissusiorsimanissaat, isumaqatigiissullu Naalakkersuisunit akuerineqarsimatinnagu isumaqatigiissut atuutilersinnaanngitsoq piumasaqaataavoq.

Tunniussinissamut Naalakkersuisut piumasaqaatinik aalajangersaasinnaapput. Assersuutigalugu qularnaveeqquusiinissaq pillugu piumasaqaataasinnaapput.

Imm. 2-mut.

Tunniussinerup kingorna pisinnaatitsissummik pigisaqartup §§ 11-13-imi piginnittussaataitaasup piumasaqaataasut suli naammassippagit aatsaat, tunniussineq Naalakkersuisut akuerisinnaagaat aalajangersakkap ersarissarpaa. Pisinnaatitsissummik pigisaqartoq akuersissummik pigisaqalertup piumasaqaatit naammassissavai.

§ 11 naapertorlugu piginnittussaataitaasoq Kalaallit Nunaanni aningerlarsimaffeqarluni aktianik piginneqatigiiffiussaaq imaluunniit piginneqataassuteqarluni ingerlatseqatigiiffiussaaq. Taamaalilluni ingerlatseqatigiiffinnut typinut allanut imaluunniit ingerlatseqatigiiffinnut nunani allani angerlarsimaffeqartunut akuersissummik tunniussiniarneq Naalakkersuisut akuersissutigisinnaanngilaat.

§ 13 naapertorlugu piumasaqaataavoq, paasisimasariaqakkanik piginnittussaataitaasoq paasisimasaqartuassasoq. Taassumap saniatigut § 12 piginnittussaataitaasup aqutsisuinut aamma piginnittuunermut tunngasunut piumasaqaateqarpoq, matumani aamma inuit attuumassuteqartut aningaasatigut pinerluttuliorsimasutut eqqartuunneqarsimassanngitsut imaluunniit ingerlatseqatigiiffiup ingerlanneqarneranut sunniuteqarsinnaasumik killilersorneqarsimassanngitsut. Ersarinnerusumik misissuinissamut §§ 11-13-imut nassuiaatit innersuussutigineqarput. Taamaalilluni ingerlatseqatigiiffimmi peqataalersut nutaaq § 12-13-imi piumasaqaataasunik naammassinnissapput.

Imm. 3-mut.

Inatsisartut inatsisaat manna malillugu akuersissut akiitsoqarfinnit malersorneqarnernut atorineqarsinnaanngitsut, aalajangersakkap aalajangersarpaa. Taamaalilluni akuersissummi akiliussisoqasinnaanngilaq imaluunniit parnaarussisoqarsinnaanngilaq, akuersissullu akiliisinnaajunnaarsitaanermik suliaqarnermi arsaarinnissutigineqarsinnaanani. Kisianni piginnittussaataitaasup akiliisinnaajunnaarsitaappat, § 12, imm. 1-imi piumasaqaataasut piginnittussaataitaasup nammassisussaannngimmagit, § 38, nr. 1 naapertorlugu akuersissut utertinneqarsinnaassaaq.

Aalajangersagaq imm. 1-imut aamma 2-mut atasutut isigineqassaaq, Inatsisartut inatsisaallu malillugu piginnittussaataasumut piumasaqaataasut naammassineqannginnerat patsisaalluni, inummumut nammineq pisinnaatitsissummik pissarsisinnaanngitsumut akuersissutit tunniunneqannginnissaa qulakkiissallugu.

#### § 45-mut

Imm. 1-imut.

Inatsisartut inatsisaat manna malillugu akuersissutit qinnuteqaatit, aalajangiinerillu allat suliarineqarnerinut atatillugu Naalakkersuisut akiliuteqartitsisinnaanissaannut, aalajangersakkap piginnaatippai.

Suliap suliarineqarneranut atatillugu allaffissornikkut aningaasartuutitut akiliutissanik, akileeqqusisoqarsinnaavoq.

Suliap suliarineqarneranut atatillugu Naalakkersuisut aningaasartuutaannut, akiliutissaq naapertuutissaaq.

Imm. 2-mut.

Akuersissutit tunniussinnermut akiliutit pillugit Naalakkersuisut ersarinnerusunik malittarisassisinnaanissaannut, aalajangersakkap piginnaatippai, pisussaattillugillu.

Assersuutigalugu akiliutissat annertussusissaat, matumani aamma suliap suliarineqarnerini alloriaatissat apeqqutaatillugit akiliutissat assigiinngitsut pillugit malittarisassanik aalajangersaasoqarsinnaavoq. Taamaalilluni akuersissutitut typenut assigiinngitsunut assigiinngisitaartunik akiliutinik aalajangersaasoqarsinnaassaaq

#### § 46-mut

Imm. 1-imut.

Kalaallit tunisassiaasa avammumut nioqqutigineqartarnerat pillugu akuersissuteqartarnermut Inatsisartut peqqussutaat, Inatsisartut inatsisaat manna malillugu avammumut tunisinissamut akuersissutit malillugu avammumut tunineqartartunut, sermip erngullu avammumut tunisassiarineqarneranut atuutinngitsaq, aalajangersakkap aalajangersarpaa.

Taamaalilluni niuernermik siunertaqartumik sermimik, imermillu avammumut tunisineq siunnersuutitigut malittarisassiuunneqarpoq, aammalu Kalaallit tunisassiaasa avammumut nioqqutigineqartarnerat pillugu akuersissuteqartarnermut Inatsisartut peqqussutaat malillugu akuersissutit pillugit piumasaqaammumut ilaatinneqarani. Taamaalilluni siunnersuutit malillugu avammumut tunisinissaq marloriaammik akuersissuteqarfiussanngilaq.

Avammumut tunisinissamut akuersissutitut tunngatillugu § 10-mut nassuiaatit innersuussutigineqarput.

## Imm. 2.

Kalaallit Nunaannut, Kalallit Nunaannit Kalaallit Nunaannilu usinik imaatigut assartuineq pillugu Inatsisartut peqqussutaat, ingerlatanut akuersissummi Inatsisartut inatsisaat manna malillugu tunniunneqartumi pineqartunut ilaasunut atatillugu imaatigut assartuussinermut atuutinngitsoq, aalajangersakkap aalajangersarpaa.

Taamaalilluni siunnersuut malillugu akuersissut malillugu sermimik, imermillu imaatigut assartuinerit siunnersuummit malittarisassiunneqarput, aammalu Kalaallit Nunaannut, Kalallit Nunaannit Kalaallit Nunannilu usinik imaatigut assartuineq pillugu Inatsisartut peqqussutaat malillugu akuersissuteqarnissamut piumasaqaammut ilaatinneqarani. Taamaalilluni marloriaammik akuersissuteqarfiussanngilaq.

## Imm. 3-mut.

Inatsisartut inatsisaat manna malillugu akuersissut tunniunneqartoq malillugu ingerlatanut, Kalaallit Nunaata imartaani akisussaaffeqarfiusumi inuussutissarsiornikkut ingerlataqartarnej pillugu Inatsisartut inatsisaat atuutinngitsoq aalajangersakkap aalajangersarpaa.

Taamaalilluni ingerlatat siunnersuummut ilaasut, siunnersuullu malillugu akuerisaasut Kalaallit Nunaata imartaani akisussaaffeqarfiusumi inuussutissarsiornikkut ingerlataqartarnej pillugu Inatsisartut inatsisaanni akuersissuteqarnissamik piumasaqaataasumut ilaanngillat, naak Kalaallit Nunaata imartaani umiarsuarmit sivilisunerusumik inuussutissarsiornissaq pineqaraluartoq. Taamaalilluni marloriaammik akuersissuteqarfiussanngilaq.

## § 47-mut

## Imm. 1-imut.

Pissutsit Inatsisartut inatsisaanni pineqartunut ilaasut pillugit aalajangiineq, piffissamut killiliussap ukiumik ataatsimik sivilisussuseqartup iluani eqqartuussivinnut suliaqqiunneqarsinnaasut, aalajangersakkap aalajangersarpaa. Taamaalilluni Inatsisartut inatsisaat malillugu pissutsinut tamanut Naalakkersuisut aalajangiinerinut, aalajangersagaq atuuppoq.

Taamaattoq §§ 48 aamma 49 malillugit arsaarinnissuteqarnermi immikkut malittarisassaqqarpoq. Ersarinnerusumik misissuinissamut tassunga nassuiaatit innersuussutigineqarput.

## Imm. 2-mut.

Aalajangiinermik eqqartuussivinnut suliaqqiineq aallaavittut kinguartitsinermik sunniuteqassanngitsoq imm. 2-p ersarissarpaa. Imaappoq, aalajangiineq eqqartuussivimmut suliaqqanngortinneqarsimagaluarpalluunniit atuutiinnassasoq. Maalaaruteqartumut tunngatillugu imaappoq, aalajangiineq malillugu aalajangiinerusimasinnaasut imaluunniit

iliuusissatut aalajangerneqarsimasut, eqqartuussivimmi aalajangiisoqarnissaata tungaanut atuutiinnassasut.

Taamaakkaluartoq aalajangiineq kinguartinneqarsinnaasoq Naalakkersuisut aalajangiisinnaapput. Taamatut pisoqartillugu aalajangiinerup inatsisitigut kingunissai kinguartinneqassapput, inaarutaasumillu eqqartuussinikkut suliaq eqqartuussivimmi naammassineqarpat imaluunniit eqqartuussineq naammassippat imaluunniit allatigut naammassippat aatsaat, aalajangiinerup kingunerisaanik kingunerusinnaasut atuutilissallutik.

Kinguartitsinissamik aalajangiineq, suliassat sularineqartarnerat pillugu inatsimmi malittarisassanut ilaalluni ingerlatsinermi inatsisitigut aalajangiineruvoq.

Imm. 3-mut.

Suliat imm. 1-imi taaneqartut siullertut Nunatsinni Eqqartuussivimmut suliassiissutigineqassasut, imm. 3-mi ersarissarneqarpoq.

Suliap Kalaallit Nunaata avataani eqqartuussivimmut innersuunneqarnissaanik kinguneqarsinnaasumik, suliat eqqartuussivimmi sumi sularineqartarnissaannut malittarisassanit aalajangersaq sanioqqutitsineruvoq. Ilutigisaanik aamma suliat imm. 1-imi pineqartut qanoq ittuugaluarpataluunniit imaluunniit qanoq annertutigigaluarpataluunniit eqqartuussivimmut suliassanngortinneqarsinnaanngillat.

Imm. 4-mut.

Aalajangiinernik Nunatsinni Eqqartuussivimmut aamma isumaqatigiissitsiniarnikkut eqqartuussivimmut tunniussinissamut piffissaliussaq, ullormi aalajangiinerup illuatungerisamut nalunaarutiginerani atuutilissasoq, aalajangersakkap aalajangersarpaa.

#### *§ 48-imut*

Imm. 1-imut.

Piginnittussaataasup, Namminersorlutik Oqartussallu namminneq iluaqutissaattut, pinngitsaaliisummik taarsiissutitalimmik pigisanik piginnikkunnaarsitsineq pigisanik aalaakkaasunik pissarsinissamut, aalajangersakkap Naalakkersuisut piginnaatippai.

Inatsisartut inatsisaat malillugu ingerlatat ingerlanneqarnissaannut pigisanik aalaakkaasunik pinngitsaaliisummik taarsiissutitalimmik pigisanik piginnikkunnaarsitsineq pisariaqasassoq, aalajangersagaq malillugu piumasaqaataavoq. Pisariaqasassoq ima paasineqasaaq, pigisanik aalaakkaasunik pinngitsaaliisummik taarsiissutitalimmik pigisanik piginnikkunnaarsitsineq siunertaa annikinnerusumik iliuuseqarnikkut anguneqarsinnaasimanngitsoq.

Inooqatigiit ataatsimut iluaqutissaat pillugu pisariaqarpat, pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq tunngaviusumik piumasaqaataavoq. Sermmimik aamma imermik niuernermik siunertaqartumik suliniutit ingerlanneqarsinnaanissaat inuiaqatigiinut pingaaruteqassasoq. Matumani aamma immikkoortup ineriartortinneqarnissaa, suliffinnik pilersitsinissaq, akiliutiniillu nunap karsianut isertiaqarnissaq siunertaralugu.

Tassunga ilanngullugu tamakkiisumik taarsiiffigitinnikkut pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq kisimi pisinnaavoq.

Pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq pillugu inatsisartut inatsisaanni malittarisassat malillugit pinngitsaaliissummik taarsiissutitalimmik pigisanik piginnikkunnaarsitsineq pissaaq. Taamaalluni kinaassusersiunngitsumik pisariaqartumik, naleqquttumillu pissuseqarnissaq pillugu nalinginnaasumik tunngavissat malinneqarnissaa qulakkiissammagu.

Aalajangersagaq malillugu pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsinermi aningaasartuutit, Pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq pillugu Inatsisartut inatsisaanni § 9, imm. 3 malillugu pisinnaatitsissummik pigisaqartumit akileqquneqassat sulisaasermi piumasaqaataavoq.

#### *§ 49-mut*

Namminersorlutik Oqartussat imminerminnut, pisortallu pilersuineri ingerlatsiviinut iluaqutissat, pinngitsaaliissummik taarsiissutitalimmik pigisanik piginnikkunnaarsitsineq nammineq pigisanik pissarsinissamut, aalajangersakkap Naalakkersuisut piginnaatippai. Taassumap saniatigut Inatsisartut inatsisaat malillugu akuersissutip tunniunneqarsimasup utertinnissaanut imaluunniit annikillisinnissaanut Naalakkersuisut piginnaatinneqarput.

Inooqatigiit ataatsimut iluaqutissaat pillugu pisariaqarpat, pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq tunngaviusumik piumasaqaataavoq. Pisortat pilersuinerisa qulakkeerneqarnissaanut pisariaqartillugu, akuersissummik pinngitsaaliissummik taarsiissutitalimmik pigisanik piginnikkunnaarsitsineq aamma annikillisitsineq aalajangersagaq malillugu kisimi pisinnaavoq. Assersuutigalugu nammineq pigisaq imaluunniit akuersissut tunniunneqareersoq attaveqaasersuutini pisariaqavissunik soorlu innaallagissamik, imermik imaluunniit kiammik pilersuivimmik pilersitsinissamut imaluunniit pioreersunik attassiinnarnissamut akornutaatillugit tamanna pingaaruteqarsinnaavoq.

Tassunga ilanngullugu tamakkiisumik taarsiiffigitinnikkut pigisanik aalaakkaasunik arsaarinninneq kisimi pisinnaavoq.

Pigisanik aalaakkaasunik pinngitsaaliisummik taarsiissutitalimmik pigisanik piginnikkunnaarsitsineq pillugu inatsisartut inatsisaanni malittarisassat malillugit pinngitsaaliisummik taarsiissutitalimmik pigisanik piginnikkunnaarsitsineq pissaaq. Taamaalilluni kinaassusersiunngitsumik, pisariaqartumik, naleqquttumillu pissuseqarnissaq pillugu nalinginnaasumik tunngavissat malinneqarnissaat qulakkiissammagu.

### *§ 50-imut*

Imm. 1-imut.

Inatsisartut inatsisaanni qitiusumik aalajangersakkanik unioqqutitsinerit, Kalaallit Nunaanni pinerluttulerinermut inatsimmi maleruagassat malillugit akiliisitsinermik pineqaatissiinermik malitseqarsinnaasoq aalajangersakkap aalajangersarpaa.

Pineqaatissiinerit Kalaallit Nunaanni pinerluttulerinermut inatsimmi maleruagassat malillugit pissasut aalajangersakkap aalajangersarpaa, matumani pineqaatissiissutissap aalajangersarneqarnissaa, akiligassiissutissallu annertussusissaata naatsorsorneqarnissaat ilanngullugu.

Nr. 1

§ 3, imm. 1-imi, § 16, imm. 2, oqaaseqatigiit siullianni aamma § 19, imm. 1-imi aalajangersakkat aalajangersarpaat, Inatsisartut inatsisaat malillugu akuersissut malillugu niuernermik siunertaqartumik taamaallaat sermimik, imermillu misissueqqaartoqarsinnaasoq, atuisoqarsinnaasoq imaluunniit avammut nioqquteqartoqarsinnaasoq. Taamaalilluni pisariaqartumik akuersissutaasariaqartumik pigisaqarani Inatsisartut inatsisaat malillugu ingerlatanik aallartitsineq, aalajangersagaq malillugu akiliisitsinermik kinguneqarsinnaavoq.

§ 5, imm. 2 aamma § 6, imm. 2 malillugit misissueqqaarnissamut imaluunniit atuinissamut akuersissummi akuerisaasoq qaangerlugu inuk ingerlatanik ingerlatsippat, aalajangersakkami aamma pineqarpoq.

Nr. 2

Sillimmasersimanissamut imaluunniit allatigut qularnaveeqquersimanissamut § 26, imm. 1-imi piumasaqaataasoq naammassinagu ingerlatsisoqaruni, tamanna akiliisussaataitanermik kinguneqarsinnaasoq aalajangersakkap aalajangersarpaa, tak. § 26, imm. 2. Assersuutigalugu piginnittussaataitaasup piumasaqaatigineqartutut sillimmasersimanani imaluunniit piumasaqaatigineqartutut qularnaveeqquusiisimanani piginnittussaataitaasoq atuinarluni ingerlatsippat. Sillimmasersimanissamu, allatigulluunniit qularnaveeqquersimanissamut malittarisassat ersarinnerusumik misissornissaanut § 26-mut nassuiaatit innersuussutigineqarput.

Nr. 3

§ 30, imm. 1 aamma imm. 2 aamma § 40, imm. 1 malillugit peqqussutigineqartumik imaluunniit inerteqqutigineqartumik unioqqutitsineq, akiliisussaatitaanermik kinguneqarsinnaasoq aalajangersakkap aalajangersarpaa.

Assersuutigalugu suliniut nunamut, kangerlummot, immamulluunniit imaluunniit pinngortitamut annertuumik ajoquseeratarsinnaammat ingerlatap unitsinneqarnissaanik peqqussummik unioqqutitsinerusinnaavoq. Inatsisartut inatsisaata imaluunniit taanna malillugu malittarisassat malinneqarnissaannik peqqussutaasinnaavoq.

Peqqussuteqarnermut, inerteqquteqarnermullu malittarisassat ersarinnerusumik misissornissaannut § 30, imm. 1 aamma imm. 2, aamma § 40, imm. 1-imut nassuiaatit innersuussutigineqarput.

Nr. 4

Akuersissummut piumasaqaataasunik malinninnginneq akiliisussaatitaanermik kinguneqarsinnaasoq aalajangersakkap aalajangersarpaa. Inatsisartut inatsisaat naapertorlugu immikkut akuersissutitut aamma inatsisartut inatsisaat malillugu malittarisassianut aamma atuuppoq.

Assersuutigalugu § 8, imm. 4, § 10, imm. 1, § 20, imm. 4, § 26, imm. 3, § 27, imm. 1 imaluunniit § 28, imm. 1 naapertorlugit akuersissummi piumasaqaatinik aalajangersakkanik unioqqutitsinerusinnaavoq, akiliisitsinermik kinguneqarsinnaasoq.

Nr. 5

Pisortani oqartussamut eqqunngitsunik imaluunniit allamut saasaarisunik paasissutissiineq akiligassiinermik kinguneqarsinnaasoq aalajangersakkap aalajangersarpaa.

Inatsisartut inatsisaat malillugu imaluunniit inatsisartut inatsisaat malillugu malittarisassiat naapertorlugit pisortani oqartussamut paasissutissiisussaatitaanermik malinninnginneq, akiliisussaatitaanermik kinguneqarsinnaasoq aalajangersakkap aalajangersarpaa.

Qinnuteqaammi eqqunngitsunik paasissutissiineq aalajangersakkami ilaatinneqarsinnaapput. § 42 malillugu nalunaarusiortussaatitaanermut atatillugu eqqunngitsunik imaluunniit amigartunik aamma paasissutissiinerusinnaavoq imaluunniit § 41 naapertorlugu nalinginnaasumik paasissutissiisussaatitaanermik malinninnginnerusinnaalluni.

Nr. 6

§ 40, imm. 2 malillugu nakkutilliisussamik isitsaaliuineq, akiliisussaatitaanermik kinguneqarsinnaasoq aalajangersakkap aalajangersarpaa. Piginnittussaatitaasup assiaqusiilluni

nakkutilliinissami oqartussamik isitsaaliuippat, aalajangersakkami pingaartumik siunnerfigineqarpoq.

Imm. 2-mut.

§ 4, imm. 4, § 5, imm. 3, § 6, imm. 3, § 8, imm. 5, § 10, imm. 4, § 16, imm. 5, § 20, imm. 4, § 26, imm. 4, § 28, imm. 2, § 29, imm. 3, aammam § 42, imm. 4 malillugit malittarisassiuunneqartuni akiliisitsinertut pineqaatissiinernik aalajangersaasoqassasoq, aalajangersakkap aalajangersarpaa.

Kalaallit Nunaanni pinerluttulerinermut inatsimmi maleruagassat, matumani aamma pineqatissiissutissanik aalajangersaanissaq, akiligassiissutissallu naatsorsorneqarnissaat pillugit malittarisassat malillugit akiligassiisoqassaaq.

Imm. 3-mut.

Inatsisartut inatsisaat tunngavigalugu akiliisitsinerit imaluunniit Inatsisartut inatsisaat naapertorlugu peqqussutaasut, Kalaallit Nunaanni pinerluttulerinermut inatsimmi maleruagassat malillugit inummut inatsisitigut pisinnaatitaasumut pisussaaffiliissutigineqarsinnaasut aalajangersakkap aalajangersarpaa.

Imm. 4-mut.

Akiliisitsinerit, Inatsisartut inatsisaat imaluunniit Inatsisartut inatsisaat malillugu aalajangersakkat aalajangersarneqartut malillugit pineqaatissiissutigineqartut, Nunatta Karsianut nakkartinneqassasut aalajangersakkap aalajangersarpaa.

Imm. 5-imut.

Kalaallit Nunaanni pinerluttulerinermut inatsimmi arsaarinnissuteqarnermut malittarisassat aamma atuuttut aalajangersakkap aalajangersarpaa.

Imm. 1-2-mi allassimasumik pisoqartillugu arsaarinnissuteqartoqarsinnaavoq.

Arsaarinnissutigineqartut Nunap Karsianut nakkartinneqassapput.

### *§ 51-imut*

Imm. 1-imut.

Siunnersuutigineqarpoq, Inatsisartut inatsisaat 1. januar 2027-mi atuutilissasoq.

Imm. 2-mut.

Siunnersuutigineqarpoq, Inatsisartut inatsisaata matumani atuutilernera ilutigalugu, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq atorunnaarsinneqassasoq.

Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq atorunnaarsinneqareerpat, ingerlatanut Inatsisartut inatsisaata § 1-iani ilaatinneqartunut Inatsisartut inatsisaat manna atuutissaaq. Imaappoq, sermimik aamma imermik niuernermik siunertaqarluni misissueqqaarneq aamma atuineq, kiisalu sermimik aamma imermik Kalaallit Nunaata avataani niuernermik siunertanut avammut tunisineq.

Sermimik, imermillu niuernermik siunertaqartumik atuinissamut akuersissutit, qinnuteqaatillu imm. 3-4-mi malittarisassat naapertorlugit suliarineqassapput.

Imm. 3-mut.

Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu piginnittussaatitaasup atuinissamut akuersissummik tunineqarsimaguni, akuersissummi piumasaqaataasooq malillugu piginnittussaatitaasup atuinissamut pilersaarutit aamma uninnissamut pilersaarutit akuerineqarnissaat qinnutigissavaa. Atuinissamut akuersissummi ersarinnerusumik piffissaliussap iluani tamanna piginnittussaatitaasup qinnutigissavaa. Piginnittussaatitaasup ingerlatat aallartissinnaassagunigit akuersissut pigisariaqarpoq.

Siunnersuutigineqarpoq, pilersaarutit akuerineqarnissaannik qinnuteqaat aallaavittut Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi malittarisassat malillugit suliarineqassasoq. Atatitsiinnarnissaq pillugu imm. 3-mi malittarisassat assinganik atuutissapput.

Atuinissamut pilersaarutit, uninnissamullu pilersaarutit akuerineqarnissaannik qinnuteqaat imm. 1 malillugu Inatsisartut inatsisaata atortuulersinneqarnissaa sioqqullugu, kingornaluunniit tunniunneqarpata aalajangersagaq atuuppoq.

Inatsisartut inatsisaanni matumani malittarisassat malillugu qinnuteqaatip suliarineqarnissaannik piginnittussaatitaasup noqqaassutigisinnaavaa. Taamaattoqassappat inatsisartut inatsisaanni matumani piumasaqaataasut, matumani § 32 malillugu qinnuteqaatip imarisassaa ilanngullugu, piginnittussaatitaasup naammassissavai. Inatsisartut inatsisaat malillugu § 4 malillugu piumasaqaatit akuersissummi aalajangersarneqassapput. Qinnuteqaatip suliarineqarnerani piginnittussaatitaasup Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu atuinissamut qinnuteqaammik tunniussinerminut atatillugu paasissutissiissutigisai, periarfissaatillugu ilaatinneqarsinnaapput.

Imm. 4-mut

Inatsisartut inatsisaat manna malillugu ingerlatassanut akuersissummik qinnuteqaatit, Inatsisartut inatsisaata atuutilernera sioqqullugu imm. 1 naapertorlugu tunniunneqartut, naammassillugilli suliarineqarsimanngitsut, Inatsisartut inatsisaat manna malillugu suliarineqarnerat ingerlateqqinneqassasoq siunnersuutigineqarpoq.

Taamaalilluni suliamik suliaqarnermi Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi, atorunnaartussatut siunnersuutigineqartumi malittarisassat malinnagit, Inatsisartut inatsisaanni matumani malittarisassat malinneqassapput.

Qinnuteqaatit nutaat naammassillugit suliaineqanngitsut aalajangersakkami kisimik pineqarput. Imm. 1 naapertorlugu Inatsisartut inatsisaata atortuulersinneqarnissaa sioqqullugu Inatsisartut inatsisaat malillugu ingerlatanut akuersissummik tunniussisoqareersimappat, atuinissammut pilersaarutit aamma uninnissamut pilersaarutit akuerineqarnissaannik qinnuteqaatinik suliaqarnek pillugu imm. 4-mi malittarisassat atuupput.

Imerkik pilersuivinnit imermik sinneruttuutaannit sermimik, imermillu atuinermut siunnersuut atuutinngilaq, tak. § 1, imm. 3. Tamanna pillugu imermik sinneruttumik niuernermik tunngavilimmik atuinissamut qinnuteqaatit, ingerlatsinerunngilaq Inatsisartut inatsisaannut ilaatinneqartoq. Taamaalilluni ingerlatseqatigiimmut pisortat imermik pilersuivianit imermik sinneruttumik atuinissamik isumaqatigiissusiorsimalluni niuernermik tunngavilimmik atuinissamut akuersissummik qinnuteqaatit, imm. 1 malillugu Inatsisartut inatsisaata atortuulersinneqarnissaa sioqqullugu tunniunneqartut, naammassillugilli suliarineqarsimanngitsut, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu suliarineqassapput. Akuersissutitut taamak ittunut imm. 3 aamma atuuppoq.

## Ilanngussaq 1

**Tusarniaaneq pillugu allakkiaq**

Siunnersuut piffissami 20. juni 2025 – 15. august 2025 tulluuttunut tusarniaaffigineqartunut tusarniutigineqarpoq:

- Naalakkersuisut Siulittaasuata Naalakkersuisoqarfia
- Aningaasaqarnermut Akileraartarnermullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
- Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Isumaginninnermut, Suliffeqarnermut Nunamullu Namminermut Naalakkersuisoqarfik
- Pinngortitamut, Avatangiisinullu Naalakkersuisoqarfik
- Peqqissutsimut inunnullu Innarluutilinnut Naalakkersuisoqarfik
- Ineqarnermut, Attaveqaasersuutinullu Naalakkersuisoqarfik
- Sulisitsisut
- Grønlandsbanken
- BankNordik
- SIK
- BDO
- Deloitte
- BK Revision
- PWC Grønland
- Nunatsinni Advokatit
- Grønlands revision
- SISA
- NUSUKA
- Kommunit ataatsimut paasissutissiiviat
- Avannaata Kommunia
- Kommuneqarfik Sermersooq
- Kommune Qeqertalik
- Qeqqata Kommunia
- Kommune Kujalleq
- Kalaallit Nunaanni politidirektøri
- Nunatta Eqqartuussisuuneqarfia

- Nunatsinni Eqqartuussivik
- INI A/S
- Illuut A/S
- Nukissiorfiit

Taassumap saniatigut piffissami tassani siunnersuut [www.naalakkersuisut.gl](http://www.naalakkersuisut.gl)-imi tusarniaavimmi tamanut saqqummiunneqarpoq.

Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfik tusarniaanermut akissuteqaatinik tusarniaavigineqartunit tulliuttunit tigusaqarpoq:

- ArctiCulture ApS
- Pinngortitamut Avatangiisinullu Naalakkersuisoqarfik
- Sulisitsisut
- Kommuneqarfik Sermersooq, Sanarfinermut Avatangiisinullu Ingerlatsivik
- Nukissiorfiit
- Nuna Law
- Qeqqata Kommunia
- SIK

Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfik tusarniaanermut akissuteqaatinik oqaaseqaateqanngitsunit tusarniaavigineqartunit tulliuttunit tigusaqarpoq:

- Meeqqanut, Inuusuttunut Ilaqutariinnullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Nunatsinni Eqqartuussivik
- Naalagaaffiup politiivi

Siunnersuutip imarisaa pillugu tusarniaanermut akissuteqaatit oqaaseqaatitalit tamakkiisumik ikkunneqarput, naalakkersuisoqarfiullu oqaaseqaatai uingasumik allataallutik. Teknikkikkut kiisalu oqaatsitigut kukkunerit, amigaatillu tusarniaanermut akissuteqaammi erseqqissaatigineqartut, annerusumik oqaaseqaateqarfiginagit iluarsineqarput.

## 1. ArtiCulture ApS

”§ 24 malillugu qanoq annertutigisoq avammut tunineqarnerisigut tunuliaqutaralugu aalajangersarneqartumik sermimik, imermillu avammut tunisinermut Namminersorlutik Oqartussanut akiliuteqartoqartassaaq. Nassuiaatit malillugit imermik avammut tunisineq massakkut tunisassiornermut akitsuummik, literimut 0,04 koruuninut aalajangersarneqartumik (kubikmeterimut 40,00 koruuninik) aallaaveqassasoq, kisiannili nikerarsinnaassasoq

naatsorsuutigineqarpoq. Tassunga Arcticulture ApS isumaqarpoq, akigitaq taanna niuernermit pissutsinut naapertuutinnitsoq. Massakkut niuernermit qaffasissutsimit, pisuussummillu assinganik atuinnermit inatsisini atortinneqarfianni allani piumasaqaatinik qaffasinnerujussuulluni.”

”Arcticulture ApS-ip innersuussutigaa, § 24-mi tunisassiornermut akitsuut tullittut eqqarsaatigalugit ataavartumik naleqqussarneqartassalluni najoqqutassaq eqaatsoq tunuliaqutaralugu aalajangersarneqartassasoq:

- Imermut suliarineqanngitsumut nunarsuatsinni niuerfinni akit atuuttut.
- Assinganik iluaquteqarnermi, avammullu tunisaqarnermi nunat assigiinngitsut akornanni unammilleqatigiinnermi atugassarititaasut.
- Suliniutip aningaasaqarnera, matumani pilersitsinissamut, ingerlatsinissamullu pisariaqarlutik annertuumik aningaasaliinerit ilanngullugit.”

**Akissut:** *Ilai ilanngunneqarput*

*Akitsuutip aalajangersarneqarnissaanut tunngaviit eqqarsaatigalugit, siunnersuutip § 24-ni aalajangersagaq iluarsineqarpoq. Tunisassiornermut akitsuuteqartitsinikkut, tunngaviumillu akiliuteqartitsinikkut akitsuutissat pillugit piumasaqaat, akuersissutini ataasiakkaani aalajangersarneqartassapput. Tunisassiorneq Kalaallit Nunaanni, avataaniluunniit pinersaq imaluunniit imermik bulkimut avammut tunisinissaq suliniummi pineqarneris apeqquaatillugu akitsuutitut akigitat nikerarsinnaapput, tak. § 24, imm. 3. Taassuma saniatigut akitsuutitut akigitat nalunaarutitigut ersarinnerusumik malittarisassiuunneqarsinnaapput, akuersissummi piumasaqaatinik aalajangersaanissamut tunngavissiillutik. Akigititanik malittarisassiuussinnermi ilaatigut niuernermit akit, unammilleqatigiinnermi atugassarititaasut ilanngunneqarsinnaassapput. Akiliutissanik aalajangersaanermi suliniutit ataasiakkaat suunerat eqqarsaatigineqarnerunissaat, sinnersuutip § 24-ata siunertaraa.*

## 2. Sulisitsisut

”Avammut tunisinissamut akuersissutit atuinnissamut akuersissutinit immikkoortinneqarnerat nakkutilliinnermut, nunallu assigiinngitsut akornanni uppersaanissami annertusaataasinnaavoq. Taamaakkaluartoq ukiut tamaasa nutarterinissamik piumasaqaataasoq siunissamut ungasinnerusumut aningaasalersuinissamut, patajaatsumillu avammut tunisinissamut isumaqatigiissutitut ajornalersitsilluni nalornilersitsisinnaavoq. Tamanna pillugu innersuussutigaa, ingerlatsisunut piumasaqaatinik uppersakkamik malinnittunut ukiuni arlalinni atuuttussamik avammut tunisinissamut akuersissuteqassasoq kiisalu avammut tunisinissamut akuersissutit suliarineqarnissaannut ersarissunik piffissaliussaqaassasoq. Unammillersinnaasumik aningaasaliisinaanissaq qulakkeermallugu, avammut tunisinissamut akuersissutit atuinnissamut akuersissutituulli sivisussuseqartariaqarpoq. Avammut tunisinissamut akuersissutit tunuarsimaartitsineq nakkutilliinertut atornagu, paasissutissat tamarmik oqartussanut anngunneqarnissaasa qulakkeerneqarnissaanni, nalunaarusiortussaataaneq atorneqarsinnaavoq.”

**Akissut:** *Ilanngunneqanngilaq.*

*Inatsit massakut atuuttoq malillugu sermimik, imermillu atuinissamut akuersissummik tunniussinermut atatillugu avammut tunisinissamut immikkut akuersissummik tunniussisoqarneq ajorpoq. Avammut tunisinissamut akuersissut atuinissamut akuersissummi, piumasaqaatit assigiinngitsut ilaattut piumasaqaataavoq. Piginnittussaatitaasup avammut tunisinissamut immikkut akuersissummik ujartuina akitsuuserisunut, aningaasaliisartunut il.il. takutissatut naleqquttutut isigineqartarpoq.*

*Paasissutissat nutaanngilisimasut tunuliaqutaralugit avammut tunisisoqartannginnissaa qulakkeerumallugu, avammut tunisinissamut akuersissutit killilimmik atuuffeqartarnerat nalinginnaasumik suleriaasiuvoq. Avammut tunisinissamut akuersissutit qaqugukkulluunniit pissutsinut atuuttunut naapertuunnissat, ilutigisaanillu nunami tunisiffimmi uppersaartitut atuuttutut akuerineqarsinnaanissaasa qulakkeerneqarnissaa, ukiut tamaasa nutarterisarnissami pingaarnertut siunertaavoq. Taamaalluni allaffissornikkut nakkutilliinermut, piginnittussaatitaasullu nunat assigiinngitsut akornanni uppersaasiisinaaneranut nutarterineq annertusaaqataavoq.*

*Nalunaarusiortussaatitaaneq nakkutilliinissami tunngavissatut atornerarpoq, oqartussalli avammut tunisinissamut akuersissutinik tunniussinissaannut aamma nutarterinissaannut tunngavissaasa atatiinnarneqarnissaanut pisariaqartumik nutartereriaatsimut taarsiisinaanani.*

”Suliniutit sumiiffimmi imermik pilersuinermit sunniuteqanngikkajuttarmata, sumiiffimmi pisariaqartitat qulakkeerneqarnissaannut annikitsumik iliuuseq tassaassaaq, Kalaallit Nunaanni imermik pilersuineq assigalugu akiliuteqartitsinikkut imermik atuisinnaatitsineq.”

**Akissut:** *Ilanngunneqanngilaq.*

*Pisinissamut pinngitsoorani aaqqiissuteqarnissamut siunnersuummi aalajangersaanissaq naleqquttutut isigineqanngilaq. Taamaakkaluartorli pisariaqartitsisoqassappat piginnittussaatitaasut, ingerlatsisullu attuumassuteqartut, matumani aamma pisortat pilersuiviisa akornanni nammineq kajumissutsimik isumaqatigiissusiornissaaq mattunneqanngilaq.*

*Taassuma saniatigut oqaatigineqassaaq, pigisanik aalaakkaasunik arsaarinnissuteqarnermi pisortat pilersuinerisa qulakkeerneqarnissaani pisariaqartillugu akuersissummik utertitsinissamut imaluunniit annikilliliinissamut, siunnersuutip § 49-a naapertorlugu Naalakkersuisut tunngavissaqarmata. Pigisanik aalaakkaasunik arsaarinnissuteqartarneq pillugu Inatsisartut inatsisaanni malittarisassat malilluu pigisanik aalaakkaasunik arsaarinnissuteqartoqassaaq, taassumallu kingiorna inatsisartut inatsisaannut naapertuuttumik taarsiissutissaq aalajangersarneqassalluni.*

”Najukkami suliarinninnissamut tunngavissatut akiliutit nikerartinneqarnissaannut isumaqataavugut, pilersarusiornermilu isumannaassusermik pilersitsiumalluni piffissamut akuersissuteqarfiusumut tamarmut akiliutit aalajangersimasuutinneqartariaqarput imaluunniit tunngaviit ersarissut malillugit malittarisassiuunneqartariaqarlutik.”

**Akissut:** *Ila ilanngunneqarput.*

*Akuersissutini ataasiakkaanni tunngaviusumik akiliutissaq, tunisassiornermilu akitsuut pillugit akiliutissaq pillugu piumasaqaatinik aalajangersaasoqarsinnaasoq ersarissarlugu, siunnersuutip § 24-a allanngortinneqassaaq. Kalaallit Nunaanni, avataaniluunniit tunisassiortoqarnersoq kiisalu bulkimut avammut tunisisoqarnersoq tunuliaqutaralugit akiliutit nikerarsinnaapput. Akitsuutinut akigitat nalunaarummi aalajangersarneqassasut, ataavartumillu naleqqussarneqartassasut, tamannalu tunuliaqutaralugu akitsuutit pillugit piumasaqaatit akuersissutini ataasiakkaanni aalajangersarneqartassasut siunertaavoq. Taamaalluni suliniutip qanoq issusaanut, tunisassiornissarlugu apeqqutaatillugit akiliutissaq aalajangersarneqarsinnaavoq.*

”Akuersissuteqarniarnermi avatangiisit eqqarsaatigineqarnissaasa ilaatinneqarnissaata pingaruteqassusia aamma akueraarput, kinaassusersiunnginnissarli qulakkeerumallugu, suliniutit mikinerusut naleqqutinngitsumik aningaasartuuteqartinneqannginniassammata, pinngortitamut kingunissaanik naliliinissami piumasaqaat suliniutip annertussusaanut, qanorlu annertutigisumik sunniuteqarnissaanut naleqqussarneqartariaqarpoq.”

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq. Suliniut nunamut, kangerlummumut, immamullu annertuumik allannguissappat imaluunniit pinngortitamut sunniuteqassappat, pinngortitamut kingunissaanik naliliisoqarnissaanik piumasaqaatip aatsaat atuutsinneqarneratigit, siunnersuutip § 29-a naleqquttumik oqimaaqatigiissitsinissamik aalajangersagartaqarpoq. Tamanna pillugu suliniutit mikinerusut tassannga naammassinninngitsut, pinngortitamut kingunissaanik naliliisoqarnissaanik piumasaqaammumut ilaatinneqanngillat. Suliniut pinngortitamut kingunissaanik naliliisoqarnissaanik pisariaqanngitsoq qinnuteqartoq nalilerpagu, tamanna qinnuteqaammi tunngavilersorneqassaaq.*

*Taassuma kingunerisaanik siunnersuutip § 29, imm. 3-a malillugu, pinngortitamut kingunissaanik naliliinissaq pillugu piumasaqaatinik, matumani qanoq annertutigissanersooq imarisassaalu ilanngullugit, Naalakkersuisut ersarinnerusunik malittarisassiorsinnaapput. Uani suliniutip annertussusaa, sunniutaasinnaasullu tunuliaqutaralugit annikitsortai qanoq annertutigisumik ilanngunneqarnissaanut periarfissaq aamma ilaatinneqarpoq.*

”§ 23-mut tunngatillugu, allamut pisinnaatitsinerit pisinnaatitsissummik pigisaqartumut ataqatigiissaarneqarnissaat, atuinissamullu akuersissutit nalinganut ajorseriartitsinnginnissaa aalajangiisuuvoq. Ingerlatsinerit imermik atornikumik kuutsitsisussat, allatigulluunniit

mingutsitsisussat akuerineqartariaqanngillat, tassani pisuussut imeqarfimmut killeqarfimmiittutut tunngaviusumik isigineqartariaqarmat, tassani ingerlatsinerit killeqarfiit taakkua iluini nalinginnaasumik akuerineqartartut kisimik ingerlanneqarsinnaammata.”

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq, tusaatissatulli tiguneqarluni. § 23-mi aalajangersakkap Naalakkersuisut akuersissummi piumasaqaatinik aalajangersaasinnaatippai. Piumasaqaatit taakkua pisinnaatitsissummik pigisaqartumuinnaq pituttuipput. § 23-mi aalajangersagaq allap pisinnaatitaaffiitut allannguinnermik kinguneqanngilaq. Allap pisinnaatitaaffiit annikilliliinissaq pisariaqassappat, tamanna siunnersuutip § 48-ani aamma 49-ani aalajangersakkat naapertorlugit, inatsilluunniit alla naapertorlugu pissaaq. Sumiiffinni ingerlatsinerit allat inatsimmut atuuttumik naapertuuttumik pissapput. Allat ingerlatsineri pisinnaatitsissummik pigisaqartup pisinnaatitaaffigalugu naatsortuutaanut ataqatigiissinneqarsinnaanissaat qulakkiissallugu, aalajangersakkami siunertaavoq.*

### **3. Kommuneqarfik Sermersooq, Sanarfinermut Avatangiisinullu Ingerlatsivik**

”§19-imut oqaaseqaatit: Imermik/sermimik atuinnissaq nunaminertamik atugassinneqarnissamik pisariaqassappat, nunaminertanut oqartussanut immikkut qinnuteqartoqassaaq (tak. Namminersorlutik Oqartussat nalunaarutaat nr. 4, 25. jan. 2024-meersumi § 37, matuma kingorna Pilersaarusiornermut inatsit).

§36 – Qinnuteqaat qaqugukku ”inuiaqatigiinnut, avatangiisinut imaluunniit inuussutissarsiutinut tunngasunik annertuumik kinguneqarsinnaasoq” pillugu naliliinissami piumasaqaatit suut tunngavigineqarsinnaanersut siunnersuusiortoqarsinnaakutsoorpoq. Tassunga tunngatillugu innersuussutigineqarpoq, Pilersaarusiornermut inatsit naapertorlugu pisortat tusarniaaneritut killissarititaq sapaatip akunneritut 6-8-nut aalajangersarneqassasoq.”

**Akissut:** *Ilai ilanngunneqarput.*

*Siunnersuutip § 7-ia malillugu, siunnersuut malillugu akuersissutinut tunniunneqartunut piginnittussaataasut inatsisit allat malillugit akuersissutinik pisariaqartunik pissarsinissaannut pisussaajunnaarsitsinngitsoq. Uani pingaartumik nunaminertamik atuneq, nunaminertanut oqartussanit isumagineqartoq pineqarpoq.*

*Tusarniaanerup sivilissusaa pillugu § 36, imm. 3-mik allannguinnissamut, akissut pissutissaqartitsinngilaq. Taamaakkaluartoq tusarniummut akissut tusaatissatut tiguneqarpoq, siunnersuutillu § 36, imm. 2-anut aamma 3-anut nassuiaatit paasineqarnissaannut itisilernerqarlutik.*

*Inuiaqatigiinnut, avatangiisinut imaluunniit inuussutissarsiornermut tunngasunut suliniut annertuumik kinguneqartussatut isigineqarnerneq, pisumik naliliinnermik aallaaveqassasoq § 36, imm. 2-mut nassuiaatini ersarissarneqarpoq. Taassuma saniatigut naliliinnermi*

*kinaassusersiunngitsutut isigineqarsinnaasunik assersuusiorluni tamanna itisilerneqarpoq. Uani ilaatigut tassaasinnaapput suliniutip annertussusaa, qanoq ittuunera, sumiiffimmullu sunniutissai.*

*Pissutsit apeqqutaatillugit tusarniaanermi piffissaq sivikinnerusinnaallunilu sivilunerusinnaammat, tak. siunnersuummi § 36, imm. 3, sapaatip akunnerini sisamani tusarniaasarnissaq atatiinnarneqassaaq. Sivikinnerusumik imaluunniit sivilunerusumik tusarniaanissamut pissutsit immikkut ittut suut tunngavissiisinnaanerinik assersuusiorluni imm. 3-mut nassuiaatit itisilerneqarput, matumani suliniutip suussusaa, annertussusaa, katitigaanera, ingerlatsisunullu allanut ataqatigiissaarinissamik pisariaqartitsineq ilanngullugu.*

*”Ilaatigut nunaminertamik atuneq pillugu paasissutissanik nalunaarsuineq, aallernerlu pillugit Pilersaarusiornermut inatsimmi § 5, imm. 3 aamma § 6 innersuussutigineqarput. Nunagis-imut nalunaaruteqartarneq oqartussat allat pilersaarusiornerinut, sulianillu suliaqarnerinut sakkussaqalersitsissaaq.”*

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq, pilersaarusiornermulli inatsimmut innersuussutigineqartoq tusaatissatut tiguneqarpoq.*

#### **4. Nukissiorfiit**

*”Taamaakkaluartoq inatsisissatut siunnersuutip § 1, imm. 3-ata aalajangersarpaa, ”Imerkik pilersuinnissamut sermimut aamma imermut imaluunniit Kalaallit Nunaanni imermut sinneruttumut imermik pilersuiviit pisortat pilersuinerini sermip, erngullu atorineqarneri imaluunniit imermut sinneruttumut pisortat pilersuiviisa atorsinnaasaannut Inatsisartut inatsisaat atuutinngilaq.”*

*Massakkut sulisaasermi tamanna allannguineruvoq, siunnersuullu malillugu imermik pilersuivinnit imermik sinneruttumik atuinnissamut akuersissutit malittarisassanut ilaajunnaarsinneqarlutik, taamaalillunilu siunnersuut malillugu tassunga atuinnissamut akuersissutinik tunniussisoqarsinnaassanngitsoq.”*

*”Nassuiaatini aamma nalilerneqarpoq, imermik pilersuivinnit imermik sinneruttumik atuinerup malittarisassiuunneqarnera immikkoortinneqaruni, pilersaarutinullu taakkununga naleqquttumik, taakkuninngalu malittarisassiuussinissamik pisariaqartitsinermut immikkut inatsimmi malittarisassiuunneqaruni naleqqunnerussasoq.*

*Nukissiorfiit tassunga isumaqataasinnaapput.”*

*”Sermimik, imermillu niuernerimik tunngavilimmik atuneq pillugu inatsisip nutaap atulerneru ilutigalugu, imermik sinneruttumik tunniussinissaq pillugu niuersinnaallutik*

pisinnaatitsissummik pigisaqartunut isumaqatigiissusiornissamut Nukissiorfiit manna tikillugu suleriaasianut tunngatillugu maleruagassatigut tunngavik illuatungeriit misissussagaat, tamannalu inatsisip nutaap 2026-p aallartinnerani atortuulersinneqarnissaa sioqqullugu qulaajarsimassagaat innersuussutigineqarpoq.”

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq, Nukissiorfiilli innersuussutaa tusaatissatut tiguneqarpoq. Nukissiorfiit imermik sinneruttuutaanik niuermik tunngavilimmik atuineq pillugu oqaloqatigiinneq, qulaajaanissaq siunertaralugu nanginneqassasoq.*

*Taassuma saniatigut oqaatigineqassaaq, Inatsisartut inatsisaat 1. juli 2026-mi atortuulersinneqassasoq siunnersuutigineqarluni, atortuulersinneqarfissaa allanngortinneqarmat.*

## 5. Nuna Law

”Akuersissutini il.il. tunniussinissami piumasaqaaterpaaluit inatsisissatut siunnersuummi ersarissarneqarput. Taakkua ilaatigut isertuaatsuutitsinnginnissamut tapersiipput – sualuppoq qinnuteqartup sunik paasissutissiinissaa eqqarsaatigalugu.

Taamaakkaluartoq Naalakkersuisut akuersissutini tunniussinissaat, aalajangiinerit aamma missiliuinerit oqimaatigiissitsinissami ersarluttunik aallaaveqarsinnaarpasipput.”

”Taamaalilluni siumut nalunangereersitsinissamut ajorseriartitsisumik, inatsisitigullu isumannaallisaaffigineqarneq isigalugu ernumanartumik, inatsisissatut siunnersuummi arlalinni oqartussat annertuumik missiliuinertalimmik, eqaatsumillu aalajangiisinnaatinneqarput.”

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq. Inatsit massakkut atuuttoq malillugu, akuersissummik tunniussisoqassanersoq Naalakkersuisut naliliinissaanni annertuumik missiliuisinnaatinneqarput. Tamanna siunnersuummi allanngortinneqanngilaq.*

*Piumasaqaatinik aalajangersimasunik naammassinninnikkut qinnuteqartoq akuersissummik tunineqarnissaminut inatsisitigut pisinnaatitaaffeqassasoq, siunnersuutitigut siunertaanngilaq. Taamaakkaluartoq suliniutit suut akuerineqarnissaat pillugu Naalakkersuisut naliliinissaanni, missiliuisinneqartarnerat nalinginnaalluinnarpoq. Missiliuisinnaanissaq, qinnuteqartumilu pissutsit aamma suliniutit ataasiakkaat eqqarsaatigalugit, aammali inuiaqatigiit siammasinnerusumik soqutigisaat akuutillugit aalajangiisoqarnissaa qulakkeerumallugu, eqaassuseqartitsinissaq taanna pisariaqartinneqarpoq.*

*Qinnuteqaatinik naliliinissami, missiliuinissamilu siunnersuut aalajangersimasunik piumasaqaasiivoq, tamannalu qinnuteqartumut, pisinnaatitsissummik pigisaqartumut, soqutigisalinnullu allanut annertunerusumik siumut nalunangereersitsinissamik kiisalu inatsisitigut isumannaallisaaffigineqarnerup annertusineqarnissaanik siunertaqarluni. Ilutigisaanik ingerlatsinermut inatsimmi malittarisassat, tunngaviillu nalinginnaasut isiginiarneqartassapput, matumani kinaassusersiunngitsumik, naleqqutumik, assigiimmillu pinninnissaq ilanngullugit.*

”Avammut tunisinissamut akuersissut atuinissamut akuersissummit immikkoortinneqarluni periutsip nutaap kingunerisaanik, piginnittussaataasoq atuisinnaanermut akuersissutaatillip ilumut avammut tunisinissamut akuersissummik tunineqassanerluni – imaluunniit ukiut tamaasa nutarterneqartarneratigut – inatsit taamatut paasineqartillugu – ukiut tamaasa pisumik naliliinikkut atatiinneqarsinnaassanersoq ilisimassanngilaa.

Imaappoq, piginnittussaataasoq avammut tunisinissamik akuersissummik pissarsisinnaanngimmat, atuinissamut akuersissummik atorsinnaanngitsumik pigisaqalersinnaavoq. § 10, imm. 1-imi taasatut oqimaaqatigiissitsinissaq aamma inatsimmut nassuiaatit tunuliaqutaralugit, aalajangiinissami tunngavissillutik piumasaqaatit erseqqinngillat, taamaattumillu suna piumasaqaataanersoq siumut nalunangereerani.”

”Ilutigisaanik tamanna sulisaanermi annertuumik nalorninartoqalersitsivoq, suliniutillu ingerlanneqarnissaanut akimmiffeqalersitsisinnaalluni. Suliniutip aallartisarnerani suliniutip pisariaqartunik aningaasalersorneqarnissaa eqqarsaatigalugu, aammali piginnittussaataasoq pilersuinissamik imaluunniit ukiut arlaqartut ingerlanerini pilersuinissaminik tunngaviusumik qulakkeerisinnaatinnagu, pisisartunut tunisinissamik isumaqatigiissusiornermi ukiorpassuarni atuuttussamik, annertuumillu niuernissaq pingaartumik eqqarsaatigalugit.”

**Akissut:** *Ilanngunneqanngilaq.*

*Tusarniummut akissut siunnersuummik allannguinnissamut pissutissaqartitsinngilaq. Sermimik, imermillu avammut tunisinermi Kalaallit Nunaata aningaasaqarnikkut, inuiaqatigiinnullu tunngatillugu soqutigisai, matumani aamma pilersuinerup isumannaassusaa eqqarsaatigalugit avammut tunisoqartarnissaa qulakkeerneqarnissaa siunertaralugu, avammut tunisinissamut akuersissutit pillugit siunnersuutip § 10-a ilusilersugaavoq. Taassuma saniatigut piginnittussaataasup immikkut akuersissummik ujartuina akuerisinnaassallugu aalajangersagaq siunertaqarpoq.*

*Akuersissutit allat assigalugit Naalakkersuisut naliliinissami, avammut tunisinissamut akuersissummik tunniussisoqassanersoq imaluunniit nutaanguisoqassanersoq naliliisussanngortinneqarput. Tassunga atatillugu inuiaqatigiinni eqqarsaatigineqartariaqartut tamaasa isigialugit naliliinissaq periarfissaatillugu, naliliinissami siammasissumik piumasaqaateqarnissaa aalajangersakkap aalajangersarpaa. Avammut tunisinissamut akuersissummik tunisoqassanersoq pillugu naliliinissami suut*

*eqqarsaatigineqarsinnaanersut assersuutitalerlugu, nassuiaatini ersarinnerusumik ersarissarneqarpoq. Ilutigisaanik pisuni tamani naliliinissami ingerlatsinnermut inatsimmi malittarisassat, tunngaviillu nalinginnaasut isiginiarneqartassapput, matumani kinaassusersiunngitsumik, naleqqutumik, assigiimmillu pinninnissaq ilanngullugit. Taassuma saniatigut Naalakkersuisut naliliisinnaatitaanerit pillugu siuliani akissut innersuussutigineqarpoq.*

*Avammut tunisinissamut akuersissutip ukiut tamaasa nutarterneqartarnissaa pillugu siunnersuutip § 10, imm. 3-ani piumasaqaataasoq eqqarsaatigalugu, pissutsit annertuumik allanngorsimatillugit avammut tunisinissaq Kalaallit Nunaata aningaasaqarneranut, inuiaqatigiinnullu tunngatillugu soqutigisaanut, matumani aamma pilersuinerup isumannaassusaanut naapertuutinngitsutut isigineqanngippat, aallaavittut suliatiguinnaq nutarterneqartassasoq naatsorsutigineqarpoq. Paasissutissat nutaannngilisimasut tunuliaqutaralugit avammut tunisisoqartannginnissaa, ukiut tamaasa nutarterinissap ilaatigut qulakkiissavaa, ilutigisaanillu avammut tunisinissamut akuersissut takutinneqarsinnaasoq pissutsinik aallaaveqassalluni.*

*Siuliani Sulisitsisunut akissut innersuussutigineqarpoq.*

## **6. Qeqqata Kommunia**

”Taamaakkaluartoq siunnersuutip § 20, imm. 2, tak. imm. 1 malillugu, piginnittussaataitasup qinnuteqarneratigut, alliliineq annertunngitsutut isigineqarpat kommunalbestyrelsi tusarniaaffiginagu sumiiffik akuersissuteqarfiusoq Naalakkersuisut allisinnaavaat imaluunniit allanngortissinnaavaat.

[...]

Allannguinnissaq imaluunniit alliliinissaq annertuutut imaluunniit annikitsutut nalilernerqarnera apeqqutaatinnagu, kommunalbestyrelsi tusarniaaffigineqartuaannartussanngorlugu § 20 allanngortinneqassasoq Qeqqata Kommuniata siunnersuutigaa. Allannguneq imaluunniit alliliineq sumiiffimmi pilersaarutitut imaluunniit soqutigisanut kinguneqassanersoq naliliinissami, kommunalbestyrelsi qaninnerpaavoq.”

### **Akissut: Ilanngunneqarpoq**

*§ 36-mi malittarisassat naapertorlugit tusarniaaneq pisussanngorlugu, siunnersuutip § 20, imm. 1-ia allanngortinneqarpoq. Taamaalluni sumiiffiup akuersissuteqarfiup allinissaa imaluunniit allanngortinnissaa pillugu Naalakkersuisut aalajangiitinnagit, kommunalbestyrelsi tusarniaaffigineqassaaq. Taassuma saniatigut alliliineq imaluunniit allannguneq inuiaqatigiinnut, avatangiisinut imaluunniit inuussutissarsiutinut annertuumik kinguneqassasoq nalilernerqarpat tamanut tusarniaasoqassaaq.*

## **7. SIK**

”§ 24-mut tunngatillugu sermeq imaluunniit imeq suliareqqaagaassanersoq, puujaasanut maqitassaassanersoq imaluunniit imeq annertuukkuutaat avammut tunisassiarineqassanersoq pillugu tunisassiamut paasissutissanut ilanngunneqartarnissaat pillugu.”

**Akissut:** *Ilanngunneqarpoq.*

*Akitsutit nikarsinnaatillugu, siunnersuutip § 24-ani aalajangersagaq allanngortinneqarpoq. § 24-mi imm. 3 naapertorlugu tunisassiorneq Kalaallit Nunaanni imaluunniit avataani pinersoq imaluunniit imeq annertuukkuutaat avammut tunisisoqarniarnersoq apeqqutaatillugu, akiliutit nikerarsinnaapput. Tamanna avammut tunisinissamik qinnuteqarnermut atatillugu paasissutissiissutigineqassaaq, tak. siunnersuummi § 34, imm. 1, nr. 2.*

”SIK

Sermip erngullu niuernikkut iluaqutigineqarnissaat pillugu Inatsisartut inatsisaata, tassungalu nassuiaatit tusarniutigineqarneranut, 1. januar 2026-milu atortuulersinneqarnissaanut SIK isumaqataavoq.”

**Akissut:**

*Oqaatigineqassaaq, Inatsisartut inatsisaat 1. juli 2026-mi atortuulersinneqassasoq siunnersuutigineqarluni, atortuulersinneqarfissaa allanngortinneqarmat.*

*Siunnersuut kingorna allanngortinneqarpoq, taamaalilluni 1. januar 2027-mi atortuulersinneqassasoq siunnersuutigineqarluni.*